

# JESÚS ORÉCAMACI FINÓCAFUIAI

## Los Hechos de los Apóstoles

*Ñuera Joreño billifue uícodo llogáuai*

<sup>1</sup> Cue izíruiğa Teófilomo nane omo cueticue. Cue nánoidibemo nana Jesús bie éniemo illa llezica nanómona ie llogáfuiai ie finócafuiai diga omo cueticue.

<sup>2</sup> Ua ie monamo jáillarui mo finócafuiai cueticue. Nai monamo ie jáiñena llezica ie orécamacina nizede. Níziano Ñuera Joréñodo íaiõina llote nie izói finóllena.

<sup>3</sup> Ie tílla meífodo, Jesús dáamie cómena íaiõimo cíocaide. Cuarenta dígarui uáfori cíocaifirede. Afe ciónanuedo ie cáanano ñue uáfueña daiítate. Afe llezica Juziñamui illáimana illíruido íaiõimo úrite.

<sup>4</sup> Orécamaciri illa llezica, Jesús íaiõina rairuide Jerusalémona oni jáiñeillena. Íaiõina daide:

—Cue Moo uafue uai llote: “Ie Ñuera Joreño ómoimo fecáacade.” Afe fecállirui omoí úiñori, nauri ómoimo cue llua izói.

<sup>5</sup> Uáfueña Juan fia jáinoido báutizade. Mei íadi íanori íllamona Ñuera Joreño óitiomoi, —daide.

*Jesús caifo monamo jáillafue*

<sup>6</sup> Jesumo gairíllano jicánotiaiõí:

—Ocuíraima, ¿ua birui Israel nairai illáimaillena meine caimo itátaitio?

<sup>7</sup> Jira Jesús uai ote:

—Moo afefue finóllirui ómoimo ónonide. Dama afémiemo ríino afefue finóllena ite.

<sup>8</sup> Mei íadi Ñuera Joreño ómoimo bíadi, ríino óitiomoi. Iemona cuedo úrizaitiomoi, ua Jerusalemo, nana Judea éniemo Samaria énie diga. Ua jamánomo jica ite itínuiamo llujítomoi, —daide.

<sup>9</sup> Daií daina meífodo, nana íaioi éroillamo, afémie caifo ráiñuano monamo uiga. Iemo mona ero úillie íena ferínote. Iemona jaca íena cióñediaioi.

<sup>10</sup> Jesús caifo jáidemo monamo eróioidiaioi. Afe llezica mena come úzecuiro jitada íaioi abimo cíocaide. Juzíñamui abi íaillinoi.

<sup>11</sup> Daidíaillinoi:

—Galilea ííñiai, ¿nibái mei monamo eróioidiomoi? Dámie Jesús, afe ómoimona caifo úilliedo jáidimie, afémie ie jáillana omoi ciona izói daje izói meine ana biite, —daide.

### *Judas meifo méidollena Matías nizédiaioi*

<sup>12</sup> Ie mei Olivo ídumona oni jáillano abido Jerusalemo bitíaioi. Jerusalén áinori afe idu ite. Ua ocózinaillaruido macácana jailla daa kilómetro dieze izói ite.

<sup>13</sup> Afe jófuemo dúcillano caifófecomo íaioi ífirenenomo jáidiaioi. Bie íaioi mámeciai: Pedro, Santiago, Juan, Andrés, Felipe, Tomás, Bartolomé, Mateo, Alfeo jitó Santiago, Iere Járidotimacimo dúidimie Simón, Santiago ama Judas.

<sup>14</sup> Nana afémaci dáanomo gairífirediaioi Juzíñamuimo úrillena. Afénomo Jesús ámatiai gairífirediaioi, ie ei María diga naa jáie ringóniari.

<sup>15</sup> Aféruillaído Pedro afe ámatiai dainámaci cigiri caifo náidaillano úrite. Afe ámatiai ciento veinte dígamiede. Afémacina daide:

16 —Amatiai, Ñuera Joreño Cuegáuaimo Davido llote: “Judas meifo cai cígiri méidolle jitáirede,” daide. David cuegáuai uícodo llote: “Judas Jesús lláitaitimaci ífoite.”

17-18 Mei jii, afe Judas dani cáimona. Bie cai táijina afémie dibénemo ite. Mei íadi afe meífodo cimo; cúinano ágüicaillano caifona ifo dinena éniemo baiíde. Baiíllamona ie jebe bójicaide. Afemona nana ie eromo itínuiái jino cocide. Afe mei ie fiénidifue iba úcubedo ja ie raillíbiri íbádiaioi.

19 Jerusalén itímaci áfena íaioi fídiano, afébirina “Acéldama” jitádiaioi. Afe mámecei íaioi uaido dibénedo “Die illábiri” dáiiacade.

20 Mei jírari Salmos íbénicomo daí daide:

Daí o jofo zóofefiteza

Buna afécomo íñeilleza.

Jíáífuedo daide:

Afémie táijina jíáima ólleza,

—daide.

21 Cai Ocuíraima Jesús nana cai diga illáruillaído cairi macádino birui cai cígimo itíaioi.

22 Jesús báutizaruimona, ie monamo jáillarumo cairi jáicadiaioi. Mei jira afémacimona dáamie cai dájellena jitáirede, Jesús meine abido cáaillafuemo uai nabáillena.

23 Jira daínamacimona mena come oni naidánetaioi. Dáamie daámani mámeceirede: José Barsabás Justo. Jíáimie Matías.

24 Ie mei Juzíñamuimo úritiaioi; daídíaioi:

—Cai Ocuíraima Juzíñamui, nana comini comeci onódimiedioza. Bíailinoimona o nizécamie caimo onótari orécamie táijina finóllena.

25 Afe táijnamona Judas ie fiénidifue ícoinia oni baiíde. Baiíllano dama ie zefuínainnomo jaide.

26 Iemo onótaraji dotádiaioi. Jae Matíasmo nájide. Afe llezícama afémie once orécamiainmo dájena jaináicaide.

## 2

### *Ñuera Joreño billafue*

1 Pentecostés irui ráfue mo jae dúcide. (Afefue güille jofo óinarui rafue.) Afe rafue dúcidemo jae nana dáanomo gairídiaioi.

2 Ie mei rairéfeicana minica izói ficire monámona cácaide. Jairifo riire jáiñua izói cácaide. Nana íaioi ráinaco eromo cácaizaibite.

3 Iemona ífiaí izói iráiciaí íaioimo cíocaide. Nana illa dígamierie íaioimo nájizaibitiaioi.

4 Afe llezica nana Ñuera Joreño úicaigaiaioi. Iemona jíáie náiraiaí uáillaído como úritiaioi; mei afe Ñuera Joreño íaioi úritade.

5 Aféruillaído Jerusalemo aillo judíuai náganuaímona bitiaioi. Ua íaioi Juzíñamuimo jítáirede finóllifuaí finuaíbitiaioi.

6 Afe riire ficirenana cacáillano comini dáanomo ofídiaioi. Níie izói comeci fácana onóñediaioi nágazie daní íaioi uáillaído íaioi cacana jira.

7 Abí fáigacaidiaioi; daídíaioi:

—¿Nana bie úrirainí Galiléamona bitímaci; uáfueñede?

8 Nágamierie daní cai uaido íaioi úrillana ¿níie izói cacáfiredicaí?

<sup>9</sup> Benomo nágaziai ite: Partía imaci, Media imaci, Elam imaci, Mesopotamia imaci, Judea imaci, Capadocia imaci, Ponto imaci, Asia énie imaci,

<sup>10</sup> Frigia imaci, Pamfilia imaci, Egipto imaci, Africa illánie Cirene batífenemona bitímaci diga. Afe dáanomo áinori ite romano imaci gairídíai. Bie románomana dáarie judíona jococa. Jiái romano imaci judíuai Juzíñamui mo ínuafuena jeire otíai.

<sup>11</sup> Afe llezica Creta imaci bitíai Arabia imaci diga. “Mei íadi Juzíñamui caimare llogáfuiái ñue finócafuiái diga, nágamierie dani cai uáillaído cacádícai,” daidíai.

<sup>12</sup> Nana fáigacaidíai. Iai comei fácana onóñediai; jira jicánotíai:

—Nana bie caimo comuídí fue, ¿ñie izói caina daííacade? —daidíai.

<sup>13</sup> Mei íadi jiáimaci íai uai áífeduano daidíai:

—Bimaci jifáidíai, —daidíai.

### *Comínina Pedro daínafue*

<sup>14</sup> Ie mei Pedro once diga orécamaciri náidaillano comínimo riire úrite; daide:

—Judea comíni naa Jerusalemo itínuiari cácarei. Bie ráfuena omoi onoiri. Dáitícueza ñue omoi cacáreiri.

<sup>15</sup> Bie ííñiai jifáíñedímaci omoi comei faca ízoi. Jitoma nai fuiri dáidemo. Jítiramo dibénemo comíni jaca jifáífinidíai.

<sup>16</sup> Bífue jíáfodo ite. Afe bífue uai lloraima Joel jaiai úcodo llogáuai. Afémie daide:

<sup>17</sup> Juzíñamui ómoína daide:

“Tirairuillaído cue Joreño nana náiraiaina, jainoi tua izói fáicanocaiñeno íaióna úcaitítí fue.

Omoí jítótiaí jízatíai díga cuedo úritiaíoi.

Jitócomini nicaído ciónafuiaí izóí cíotiaíoi.

Einamací ñuera nicaído nicáiritiaíoi.

<sup>18</sup> Aféruillaído cue Joreño cue táijitagamíaina naa  
cue táijitaga ringóniáiri ñue úcaítaiticue.

Iemona cuedo úritiaíoi.

<sup>19</sup> Caifo monamo jacínaitadinona cíotaiticue;

Aféruimo ana éniemo onótajafuena fínoíticue.

Afe onótajafue díena cíotaite; iraina cíotaite,  
jamánomo irai úilliena cíotaite.

<sup>20</sup> Afe monado jitoma jítirefícaite, fíui díe izóí jáite.

Daí iite caí Ocuíraíma Jesucristo billíruimo naí  
dúciñenia.

Afémie billíruí iere ebíreitíruí.

<sup>21</sup> Nana Juzíñamuimo íaíoi canóllena íemo jicádino  
jíllobicaitiaíoi.”

Aquíe izóí Juzíñamui Joeldo daíde.

Iemo Pedro naí úrillano daíde:

<sup>22</sup> ‘Mei jíi, Israel nairáí cue daíllifuemo cácareí.  
Nazaret ímie Jesús omoí uícorí Juzíñamui ñue  
facácámie. Uafue aillo fáigatate ráaniaído ñue  
facátaga. Daí Juzíñamui omoí cígíri afémiedo  
finode. Aféfuíaina ñue fidídiomoiíza.

<sup>23</sup> Mei íadí afémie omoí fecállíruimo maíáno  
uitá fatíomoi, Juzíñamui jaiáí uícodo comécíitífuíai  
onótafuíai díga daína izóí. Uafue fiénidímacído íena  
corátatíomoi.

<sup>24</sup> Mei íadí Juzíñamui afe tílla cuinaca raa zuita  
izóí, zúitano íena meine cáatate. Mei tíllafue jaca  
íena anáfenonide.

<sup>25</sup> Mei illaíma David Jesudo úrillano daíde:

Ocuíraímana cue uíécorí cíófirédicue.

Afémie cue nabézimo izói ite, minícana cue jácicaiticue.

<sup>26</sup> Ie jira cue comeci cáimafuena iere ite, afe llezica cue fuemo ite cáimafuiaido úriticue.

Afe jira daje izói cue íeizi ñue ocózinaitaiticue, mei tíllamona meine cue abina cáataitio.

<sup>27</sup> Mei jii cue joréñona tíidinomo fiénocaiñeítio.

Afe izói o izíruiga táijitagamie abi rifáillana ráiruitio.

<sup>28</sup> Cáatatinomo jóoide io cue llófuetio.

Cue diga o íllado, cáimafuena cue oruítaitio, —daí daide David.

<sup>29</sup> ‘Amatiai, cácarei. Cai jáiairagima David tíide raiga uáfodo onórede. Afe raiafo nai cai diga íteza.

<sup>30</sup> Mei afe David uai llóraima. Jaiai Juzíñamui uícodo uafue llóllena ríifuedo íena daide:

—O emódoidiziemona dáamie Cristoite. Afémie o illáimana illánomo ráinaite, —daide.

<sup>31</sup> Jira daí David, uícomo ciona izói Cristo meine abido cáailafuedo úrite. Afe izói daide:

—Cristo joreño tíidinomo fiébiñeite. Ie íeizi rifáillana rairuícaza, —daide.

<sup>32</sup> Mei jii Juzíñamui afe Jesuna meine abido cáatate. Aféfuemo nana cai uai nabáiraimacidicai.

<sup>33</sup> Daí Juzíñamui nabézimo Jesús naidánega; naidánia meífodo Móomona uícodo lloga Ñuera Joreño fecállifue llínote. Llínuana nana bie omoi ciona, omoi cacana raa finode. Nana aféfuiai afémiemona bite.

<sup>34-35</sup> Mei David monamo jáíñedimie, mei íadi dama David daí daína:

“Caifoide Ocuíraima cue Ocuíraimana daide:

—Cue nabézimo rainai, o éoidino cue anáfenolliruimo, —daide.”

36 ‘Nana Israel nairai, mai comeci jizíñeno omoi onoiri: bie omoi coraica Jesús Juzíñamui Ocuíraimana itátate: Crístona itátate, —aci dinó Pedro daide.

37 Aféfuena cacáillano, iere comeci llícitagaiaioi. Afemona Pédromo jicánotiaioi jiáie orécamaci diga:

—Amatiai, ¿ñie izói ñéiticaí?

—daidíaioi.

38 Ie jira Pedro uai ote:

—Omoi illafue Juzíñamui uiécomo meídori. Omoi nágamierie Jesucristo mámeçido báutizatari. Omoi íaifuaí oni dófilleza. Daií Juzíñamui ie Ñuera Joreño ómoína úicaiteza.

39 Afe bie uícodo llogáuai ómoie. Daje izói o jitótiai ie. Daje izói nana jícarié itino ie; ua aféuai nana cai Ocuíraíma Juzíñamui uáídogamací íena, —daide.

40 Aféuailaído dáanomo jiáie uáillaído Pedro íaioi lluno daide:

—Bie duere finóbitimacimona omoi jíllóiri, —daide.

41 Mei daií afémie úrilla uaina jeire otino diga báutizagaiaioi. Aféruido Jesumo ñnotimacimo tres mil dígamiaí dáaziéna jáinacaidiaioi.

42 Nana bimaci orécamaci llófuiafuemo jáícina jáidiaioi. Afe daií conímamo ñue coméçidiaioi. Afe llezica Juzíñamui mo úrifirediaioi, ie mei garíllano Jesús jae íraicaiño güilla izói finódiaioi.

### *Nano fueñe ñnotino illafue*

43 Aféruillaído nana jáicaidiaioi; mei aillo cíoraininafuaí naa onótate raa diga orécamaci finódiaioiza.



44 Jae nana ínotino ñue dájena itíai*oi*, ímona íai*oi* ráaniai conímamo jeruíñoeno ífiredia*oi*.

45 Mei jii íai*oi* illábiri jíáie ráifide raa diga fecádia*oi*. Fécanona afe úcube nágamíai imaci jitailla izói jofo conímamo fecáfiredia*oi*.

46 Nágaruillaido gairíracomo gairídía*oi*. Iai*oi* jófuego pan fécano dáanomo cáinafuedo, comeci mánainafuedo güitía*oi*.

47 Juzíñamui ióbitaoidia*oi*. Afe llezica nana comini afémacimo ñue comécjidia*oi*. Afe daí cai Ocuíraima nágaruido afe ínotimacimo jíáie jílloizaíbitimaci dáamacina itátate.

### 3

#### *Aidaima jílloitate*

1 Jíáiruido jítoma ana ítemo Pedro Juan diga gairíracomo jáidiaillinoi. Afe Juzíñamuimo comécido úrioína llezica.

2 Nágaruillaido jocóinamona aidaima dinomo ífirede. Ie comini gairíracomo íena úifiredia*oi*. Uillano afémiena nazemo ie ráinaifiredia*oi*, jofo jáioidinomona dúecaillano fecaca úcube jícállena. Afe naze mámece Ebíredize.

3 Aidaima Pedro Juan diga gairíracomo jofo jáillana cíoillano dúecaillano fecaca úcube íaillinoimona jícade.

4 Mei jira Pedro Juan diga íemo érocaidiaillinoi. Pedro íena daide:

—¡Cáimo érocai!

5 Iemona afémie náicaide. Comeci anado daide: “Ñibaí minícana cue iite.”

6 Iemo Pedro íena daide:

—Cue úcubenedicue; óronidicue; mei íadi cuemo ítena o íiticue. Nazaret ímie Jesucristo mámeçido náidacai. Maca, —daide.

<sup>7</sup> Iemo Pedro onoi nabézido íena naidánete. Afe daií finua llezica ie idai mairíbicaide, ie idácoiñuai diga.

<sup>8</sup> Iemona aidaima caifo tícacai. Caifo náidaillano macade. Afémie íaillinoído ja jofogairíracomo jaide. Tícatíacana jaide. Juzíñamuimo íóbitaioide.

<sup>9</sup> Nana comini ie máçana ciódiaioi.

<sup>10</sup> Aferi iere jacinaificaidiaioi naa abi fáigacaillafue diga, afémie daií náidacaillari. Afémiena onódiaioiza. Afémie Ebíredize mámeçiredizemo ráifiredimie, gairíracomo úcube jicáfiredimie.

### *Pedro cominimo Salomón jinófenemo macáranomo llófue*

<sup>11</sup> Jíllotaga aidaima Pedro Juan diga íaillinoído níjinijicaide. Aféfuerei fáigacaillano nana comini gairíraco dibénemo jáidiaioi. Salomón jinófenemo macáranomo Pedro, Juan, aidaima diga illánomo afe comini aizícana jáidiaioi.

<sup>12</sup> Pedro áfena cíoillano comínina daide:

—Israel nairai, cácarei. ¿Omoi minícarifáigacaidiomoí? ¿Nibái mei cócomo eróizaibitiomoí? Bie iima dama coco rínodo jíllotano macátaticoco, nibai daií coméçido daidíomoí. Daje izói coco Juzíñamuimo ñue coméçinafuedo afefue finódicoco, daií nibai cócona coméçido daidíomoí. Iadi aféfuiaido finóñedicoco.

13 Mei íadi jíáifodo joide. Cai jáiairagima Abraham, Isaac, Jacob díga, íaiói Moo Juzíñamui ie Jitó Jesumo baímo ñuefueña nitade. Afe Jesús ríimacimo omoi fecácamie. Pilato ie zuitáacana llezica áfena ráiruitiomoiza.

14 Aféruido jáicina nífuenidímie zuitátajana jícañediomoi, mei íadi jíáifodo jícadíomoi. Come fatímie zuitátatiomoi.

15 Afe daíí cáatatino fecádímie titádíomoi. Mei íadi Juzíñamui afémiena tíllanomona meine abído cáatate. Aféfuemo uai nabáiraimadícoco.

16 Bie dáamie Jesús mámecido, ie mámecimo ínuafuedo omoi ciona, omoi onoíga aídaima jae maíríbicaide. Afe Jesumo ínuafue íena ñue jáicina jíllotate, omoi uíécomo cíocaidímie illa izói.

17 ‘Amatíai, onódicueza, mei omoi naa omoi illáiniri Jesuna fáiacana llezica omoi finócafueña onóñeno íena fatíomoi. Uáfueña omoi finócafueña onóñenano finódíomoi.

18 Mei íadi Juzíñamui ie uai lloráimado uícodo daína uai bie izói fuitade. Aféuai daíde: “Ie Cristo duere zefuillífue jítaírede.”

19 Mei ie jira omoi mácafuiái méidori. Omoi illafue Juzíñamui ñue jáicina jóoneri. Omoi íaífuiái oni muiñólleza. Iemona cai Ocuíraíma Jesús caina cánuafuiái mánáinaruillái izói caímo orérede.

20 Aféruimo nano uíécodo ómoíena mamécámie Jesucristo Juzíñamui óreite.

21 Mei íadi birui Jesucristo monamo fiébirede, Juzíñamui naga rafue jáicina nai jóoneíñeilleza. Afe daíí jáiáidíruilláimo ite ñuera uai lloráini daídíaiói.

22 Mei daíí Moisés cai jáiairagimana daíde: “Cai Ocuíraíma Juzíñamui omoi ámatíaimona nahí uai

lloráimana ómoimo óreite, Juziñamui cue ória izói. Afémie ómoína nana daináfuiái jeire omoí oíri.

23 Mei afe uai lloraima dainana jeire oñédino Israel náiraimona oni táinocaite. Uáfueña íficaite.” Daií daide Moisés.

24 Mei daií nana uai lloraini, Samuélmona batine ite lloraini diga bie írairuillaído úrite.

25 Juziñamui ie uai lloráinido uícodo daináuallai ja birui ómoiri jino llotátaga. Juziñamui cai jaiáiragimacimo ibana ñuera raa finóllifue llote ñue omoí íllena. Afefue Abrahamo llote. Daide, “Nana énie nairai o emódomo comuínodo ñue camare ífcaitiaíoi,” daide.

26 Mei Juziñamui ie Jitó caata meífodo nano fueñe ie Jitó ómoimo orede camare omoí íllena, ómoimona nágamíai ie íaífue fáicanocaillena, — daide.

## 4

### *Pedro Juan diga ríiredino uiécomo uiga*

1 Pedro Juan diga nai comínimo úrioidemo, lletáriraini gairíraco úiñotino illaíma diga bitíaíoi. Daje llezica saduceo comini bitíaíoi.

2 Pedro Juan diga comini llófuetiaillinoí. Iaióina daide: “Comini tíllanomona cáatafue Jesudo ácataga.” Daií llófuiari como bitímaci ríicaidiaíoi.

3 Iemona íaillinoína llaitádiaíoi. Llaitano íaillinoína llavéracomo jítiramoidíruimo íbáidiaíoi, ja nauízailla jira.

4 Mei íadi aillo afe úrillauai cacáidino íñotiaíoi. Afena íñotimaci dani íñiaí facádua cinco mil áinomo dúcide.

5 Afe jiáiruimo Jerusalemo judíuai illaini, éinamací, naa ocuícáfue llófuerainiri gairídíaiói.

6 Afe llezica afénomo lletáriraini illaíma Anás ite. Afe daanomo ite Caifás, Juan, Alejandro naa lletáriraini illaini comíniri.

7 Iemo Pedro Juan diga atítatíaiói. Atiano íaiói cígimo naidáneta jicánotíaiói:

—¿Nie ríinodo bífuiai finódiomícoi? ¿Bu mámecido bífuiai finódiomícoi?

8 Mei jira Pedro, Ñuera Joreño úicaigamienaza daíde:

—Nairai illaini, Israel éicomini, omoi cácarei.

9 Mei afe baie iráredimiemo como finoca ñúefuena jicánotiómoi. Mei ñie izói afémie jíllo taga daí daídiómoi.

10 Mei jira omoi uíecomo jino uáfodo llóiticoco, nana Israel nairai fidíillena. Afémie omoi uíecori Nazaret ímie Jesucristo mámecido, omoi coráicamie mámecido íocire ite. Afe coráicamie (Jesucristo) tíllanomona Juzíñamui meine abído cáatate.

11 Bie Jesús omoi jofó níraini oni dotaca jofocai izóidímie. Mei íadi afecai uálliraina jáizaide.

12 Nie jiáimiemo jíllo nafue íñede. Jesucristo jíáie daítade jíllo taraimana caímo íñede, afémiedo caí jíllo illena. Ua nana éniemo daítade jíllo taraimana íñede, —jaca dínori Pedro daíde.

13 Iemona ríimaci Pedro Juan diga méaicaiñeno úrillafue cacáillano, íaillinoi llófueñegaiaillinoi íllana fídía llezica, iere fáigacaidíaiói, jamáimieillinoi illa jira. Iemona ríimaci bíaillinoi Jesudo macádino daí íaillinoimo úibicaidíaiói.

14 Afe emódomo jíllotaga aídaima dínomo íaillinoi abiri naidaide. Ie jira aféfuena jáanoicana daiínide.

15 Mei jira gairídinomona íaillinoina oni orédiaioi, dani jofo conímamo íaioi úriacana jira.

16 Daidíaioi:

—¿Bie iima íaillinoina nie izói ñéiticaí? Mei jii, nana Jerusalemo bitino bie ciórainina onótate raa íaillinoi finuafuena onódiaioi; mei aféfuena jáanonidicaí.

17 Mei íadi mai íaillinoi cai jácidolle, afefue comínido jamánomo jalléiñellena. Afedo íaillinoina ráiruiticaí, Jesús mámeçido ja benómona batine úriñeillena, —daidíaioi.

18 Mei jira íaillinoina jíritiaioi. Iaillinoi dúçidemo ocuídiaioi:

—Jesús mámeçido jii mai due jiza úriñeno iri. Afe daií llófueñeno iri, —daidíaioi.

19 Mei íadi Pedro Juan diga uai ote:

—Juziñamui uiécomo níífue baimo ñuena comeci omoi faca: omoína ñue cai cacárellena, nibai jíáifo Juziñamuina ñue cai cacárellena.

20 Mei jii cai cionafue cai cacánafue diga aféfuemo úrillana fáicanidicaí, —daide.

21 Mei jira riimaci íaillinoina jácidotiaioi. Ie mei íaillinoina zuitádiaioi. Iaillinoi duere finóllifue baiñédiaioi; nana comini afe finua jira Juziñamuimo ióbioidiaioiza.

22 Afe cióraininafuedo jíllotaga aídaima, afémiemo cuarenta fimona baimo ite.

*Finotino méaicaiñenafue comeci riino diga jícadiaioi*

23 Pedro Juan diga íaillinoi zuitaina mei íaillinoi nabáñiaí illánomo jáidiaillinoi. Dínomo afémacimo

nana lletáriraini illaini éinamaci diga íaillinoina dáinana llotíaillinoi.

<sup>24</sup> Aféfuena cacáillano nana dáanomo Juzíñamuimo úritiaioi. Daidíaioi:

—Cai Ocuíraima, O Juzíñamuina; mona, énie, monaillai naga ráaniairi finódimiedio.

<sup>25</sup> O Ñuera Joréñodo, o táijitagamie Davido daidio: ¿Nibái mei náiraiai caillíoidiaioi?

¿Nibái mei comini táinofuiaimo comeci facádiaioi?

<sup>26</sup> Enie illaini Juzíñamuina ie Cristo diga anáfenuabitiaioi.

Daje izói jofue illaini Juzíñamuimo ofidiaioi ie Cristo diga áfedo aféniemo fuirillena, —daide.

<sup>27</sup> ‘Uafue bie jófuego Herodes, Ponico Pilato diga o nífuenide Jitomo fienei gairídiaioi. Afénomo jicánemaci Israel cominiri fienei gairídiaioi, mei íadi omo jaináidimie Jitó illáimana ja jáitatio.

<sup>28</sup> Afe fienei íaioi gairíllafuedo nana o uícomo uaido finócafuaimo dáinana finódiaioi. Afe daí íficaillena jítáiretadio.

<sup>29</sup> Cai Ocuíraima Juzíñamui, mai birui cai íaioi jáciduamo eroi. Jae o táijitagamacidicai. Afemona ñue méaicaiñenafue caimo fecari, o úrillauai jino jácicaiñeno cai llóllena.

<sup>30</sup> Afe llezica omo ite rínodo comini íaioi dúicomona ñue jíllotari. Afe izói o nífuenide Jitó mámecido ciórainina onótate raa finori, —dinori daidíaioi.

<sup>31</sup> Juzíñamuimo íaioi úrilla fúillamona afe íaioi gairíllano docáiricaide. Afe llezica nana Ñuera Joreño úcaigaiáioi. Iemona Juzíñamui úrillauai méaicaiñeno jino llotíaioi.

*Ínotimaci íaiói ráaniaina jeruñeno “Nana caie” daidíaiói*

<sup>32</sup> Afe aillo iraiça ínotimaci dáaziena nana ñue jaináidiaiúi. Ua daje izói dájemo comeci facáoidiaúi; daje comeci jitailla uai íaiói mo ite. Buna afémie ráaniaina “Dama cueie” daiñede, mei íadi nana comini íaiói ráaniaina “Nana caie” daidíaiúi.

<sup>33</sup> Orécamaci Ocuíraima Jesús cáanafuemo aillo ríinodo uai nabáioidiaúi. Juziñamui nana comínina iere caimátaitade.

<sup>34</sup> Iaiói cigiri jitáiredena ráanidimie iñede. Nana íbácana énieredino jofóredino diga áfeniaí fécano afe oga úcube atídiaúi.

<sup>35</sup> Atiano orécamacimo izájidiaúi. Iemona orécamaci nágamieriemo íaiói jítaina dieze fecádiaúi.

<sup>36</sup> Afe izói íaiói cigiri Leví izíe ímie finode. Afémie mámece José. Monáillai zafedu Chípreno jocócamie. Orécamaci íena jíaie mámece jítádiaúi. Afe mámece Bernabé daína Fíradimie.

<sup>37</sup> Afémie ie illánie fecade, fécano afe íba úcube orécamacimo izáíbite.

## 5

*Ananías Safira diga finoca íaifue*

<sup>1</sup> Mei jíaimie Ananías, ie ai Safira diga, daa illánie fecádiaillinoi.

<sup>2</sup> Bímie nano baa nieze úcubena jeruide. Jíaie dájeze úcubena nana ñue ite izói orécamacimo izájide. Aféfuena ie ai nana ñue onode.

<sup>3</sup> Jira Pedro íena daide:

—Ananías, ¿níbái mei Taife o comécina féitate, Ñuera Joréño mo taino o llóllena? ¿Níbái mei o illánie



nano nieze feca iba úcubena abimo maiñódio, daií jífueridío?

<sup>4</sup> ¿Nano fueñe afe énie óieñede? Jii, óie. ¿Afe o fécaja mei afe úcube óieñede? Jii, óie. ¿Nibái mei daií afe finóllena comeci facádío? Comínimo taino lloñédío, mei íadi Juzíñamuimo taino llotío, —daide.

<sup>5</sup> Ie jira áfena cacáillano, Ananías éniemo baiíllano tíbicaide. Nana afefue fídiabítino iere jacínaitiaíoi.

<sup>6</sup> Mei jira nano ba niga jitócomini bite. Ie abi jabínota ie raiájidiaíoi.

<sup>7</sup> Afe mei tres horas íllamona Ananías ai jofo bite. Nai ie ini tíllana fídíñede.

<sup>8</sup> Jira Pedro jicánote:

—Cuemo llone, ¿afe ómicoi daina dieze afe énie fecádíomíco?

Jira afengo daide:

—Jii, áfeze.

<sup>9</sup> Jira Pedro daide:

—¿Nibái mei dáafueritíomíco, Juzíñamui Ñuera Joreño o íco facátallena? Jino batí o ini raiájidino bitíaíoi. Jabe daje izói ona úitiaíoi.

<sup>10</sup> Afe llezica afengo Pedro anamo baiíllano tíbicaide. Jitócomini jofo billano afengo tíllana cíoizaíbitiaíoi. Mei jira jino uillano ie ini abimo íena raiájidiaíoi.

<sup>11</sup> Nana Juzíñamuimo ínotino nana aféfuiaína fidídímaciri iere jacínaitiaíoi.

*Aillo cíórainina raaniai onótate raa díga*

12 Aféruillaído comini cígiri orécamaci aillo onótate raa, ciórainina ráaniai diga finódiaioi. Nana Salomón jinófenemo macáranomo gairídiaioi.

13 Buna jiáimacimona íaioi diga daane gairíllana jacíruitiaioi; mei íadi comini íaioimo ñue izire comécidiaioi.

14 Aillo comini íññiai ringóniai dájeze Ocuíraima Jesucrístomo ínuaibítiaioi.

15 Uafue jamánomo ínnotiaioi. Mei jira iráredino jofu abi íuemo, naa íaioi bíralluairi jino bíródiaioi. Aféno Pedro áfedo jaille llezica afémacimona nano dámierie, Pedro jana anamo itábicaítiaioi. Afedo jíllozítiaioi.

16 Afe llezica aillo áinomo ite jofue comini Jerusalemo bitíaioi. Íaioi iráredinuíai atídiaioi fiénide jóriado áfedogamací diga. Nana jíllotagaíai.

*Ríimaci illaini Pedro Juan diga duere finóllena llaitátatiaioi*

17 Iemona lletáriraini illaíma, afémieoiri ite sa-duceo imaci iere úradoizaidiaioi.

18 Ie jira orécamacina llaitada afe jófuemo ite llavéracomo íbáizaidiaioi.

19 Mei íadi Juziñamui abi ímie naio llavéraco naze tuizáibite. Jino íaioi uánona daide:

20 —Gairíracomo omoí jai. Dinomo naidáillano comínimo nana bie comeci cáataite uáillaído úrizairi, —daide.

21 Aféfuena cacáillano, afe jiáírui monáidacademo jofu gairíracomo jáidiaioi. Jáillano llófuaide.

Afe llezica lletáriraini illaíma afémiemo itínori, Nahíllaini gairíranomo gairídiaioi. Afe Nahíllaini

Israel nairai éicomini. Gairíllano llaveca orécamací atítatíaiói.

<sup>22</sup> Mei íadi llavériraini llavéracomo dúcillano orécamacina baiñédíaiói. Daa fia afefue abido lluíbitíaiói. Daidíaiói:

<sup>23</sup> —Llavéraco ñue riire ibaide naa naze jinófene úiñotinori eróiedíaiói baizájidícai. Mei íadi cai zuitádícaimo afeco eromo buna iñena, —daidíaiói.

<sup>24</sup> Aféfuena cacáillano lletáriraini illaíma, gairíraco úiñoraini illaíma, íemo nanoide lletárirainiri ifo júdaízite; jícanotíaiói:

—¿Bífuíai nínomo jíca jálleite?

<sup>25</sup> Afe llezica daa íma daízabíte; íaióina daide:

—Llavéracomo omoi íbaicogamíai jae gairíracomo comini llófuetíaiói, —daide.

<sup>26</sup> Iemona úiñoraini illaíma naa llavérirainiri íaillinoi uájidíaiói. Mei íadi duere finóñeno íaillinoína atídíaiói, “Comínina nóñena cai níjíte” dainano jacírúitíaiói.

<sup>27</sup> Íaillinoi átianona, Nahíllaini uícomo íaillinoína naidánétíaiói. Iemo lletáriraini illaíma íaillinona daide:

<sup>28</sup> —Afe mámeçido ómicoi llófueñellena jamánomo riire rairuídícai. ¿Ja minica finódiómicoi? Nana Jerusalén comínimo ómicoi llófúíafuíai jíca jalleide. Afe llezica afe íma tílla ícoínia caimo nitácadíómicoi, —daide.

<sup>29</sup> Mei jíra Pedro jíáie orécamací díga uai ote:

—Juzíñamui uai jeire cai olle comini llogáuai baimo ñuera.

<sup>30</sup> Cai jáíairagíma Juzíñamui Jesuna tíllamona cáatate. Bie Jesús coráirabicímo agüíneta omoi fagámie.

<sup>31</sup> Juziñamui caifo monamo uano nabézimo íena rainade. Afe llezica afénomo Illáimana jóonete. Dáanomo Jíllotaraimana jóonete. Daií Juziñamui Israel náiraímo íaioi illafue méidollirui jóonete, íaioi íaifuaí dólleña.

<sup>32</sup> Aféfuemo uai nabáiraímadicaí. Daje izói Ñuera Joreño aféfuemo uai nabaide. Nana ñue cacáredimacimo afe Ñuera Joreño Juziñamui iga, —daide.

<sup>33</sup> Aféfuena cacana llezica, ríicaidiaioi. Iaillinoína fáiacadiaioi.

<sup>34</sup> Mei íadi ríimaci cigiri fariseo ímie ite. Afémie mámece Gamaliel. Afémie ocuícáfue llófueraima. Nana comini íemo ñue comécidiaioi. Afémie náidaillano ocuide:

—Nano dáallegoi bimaci oni jíáinomo ui, —daide.

<sup>35</sup> Afe ifodo ríimacina daide:

—Israel comini, cacai. Baimácimo omoi finóllifue abí omoi rairuiri.

<sup>36</sup> Jíáífuemo omoi úibicairi. Naui nígarui íllamona Teudas dúcizaíbite. Dúciillano daide: “Jamánomoidímiedicue. Illáimaiticue,” daide. Iemona cuatrocientos dígamie afémiedo jáidiaioi. Mei íadi íena fatíaioi. Nana afémiedo jáidino ráidozinaidiaioi. Iemona afefue niné táinocaide.

<sup>37</sup> Afe mei comini mámece cuiájillaruímo, Galilea ímie Judas dúcizaíbite. Aillo comini íedo jáidiaioi. Daje izói íena fatíaioi. Afe izói nana íedo jáidino ráidozinaidiaioi.

<sup>38</sup> Ie jira bimácina omoi fáicanocai; afémacina áifedoño. Mei bifue íñiaí íeza, fuizájite.

<sup>39</sup> Mei íadi Juziñamui ífue, táinocaitanidí omoi. Abí omoi rairuiri, Juziñamui díga omoi

fuirízaiñelleza, —daide.

<sup>40</sup> Nana jae jíeruificaidiaioi. Mei jira orécamaci jíritiaioi. Iaiioi dúcinamona íaioina zechénotiaioi. Afe meífodo Jesús mámecido úrillana íaioina rairuídiaioi. Afe mei íaioina fáicanocaidiaioi.

<sup>41</sup> Orécamaci ríimaci úcomona jino jáidiaioi. Ióbioicaidiaioi, mei Juzíñamui íaioimo ñue comeci facáoillaza. Jesudo jaináinamona méaifuedo duere zefuídiaioi.

<sup>42</sup> Ie mei nágaruido Jesudo úritiaioi. Afe izói llófueoidiaioi. Gairíracomo, comini jófuedo daje izói llófuiaidiaioi.

## 6

*Juzíñamui uai llotino canórainina siete dígamie mámeciga*

<sup>1</sup> Aféruillaido ínotino aillo jebuúoidiaioi. Griego imaci judío imácina zúucaillafuedo jítádiaioi:

—Nágarui güille fécanomo cai fecínguai figo iñégaiaioi, —daidíaioi.

<sup>2</sup> Mei íemo doce diga orécamaci nana ínotinori dáanomomo iráidiaioi. Iaioina daide:

—Juzíñamui úrilla uai jino llófueredicaí. Afena cai fáicanocaillena dani omoi güille cai fecállena figóñede.

<sup>3</sup> Mei jira, ámatiaí, omoi cígimona siete dígamie nize. Nana comínimona ñue comécidimie izóidena jitaide. Ñue onódimiena jitaide. Ñuera Joreño úicaigamiena daje izói jitaide. Ie mei daítadimíai güille fecárainina mai jóoneri.

<sup>4</sup> Mei cai dani Juzíñamuimo comeci facáoiticaí. Afe llezica Juzíñamui úrilla uaido llófueiticaí.

<sup>5</sup> Nana aféfuemo ñue coméçidiaioi. Iemona Ñuera Joreño úicaigamie Esteban nizédiaioi. Afémie Juzíñamui uaina iere ínofiredimie. Daje llezica jíáimíai nizédiaioi: Felipe, Prócoro, Nicanor, Timón, Parmenas, Antioquía ímie Nicolás, nauí nano afémie judíuai íaioi íinoga uaimo dáafueriacadimie.

<sup>6</sup> Ie mei orécamaci illánomo afémacina atidiaioi. Atia mei orécamaci íaioimo onoi bitano Juzíñamuimo úritiaioi. Afedo güille fecárainina mamécaiaioi.

<sup>7</sup> Iemo Ocuíraima Jesucristo úrilla uai comínido oni móonaioicaide. Jerusalemo ínotino aillo je-buídiaioi. Afe llezica aillo judíuai lletáraini aféfuemo ínotiaioi.

### *Esteban llaitádiaioi*

<sup>8</sup> Esteban Juzíñamui izói ríinoredimie Juzíñamui ézicigamie. Ie jira comini cígimo aillo ciórainina raa onótate raa díga finode.

<sup>9</sup> Ie jira Rairuíñegamací llófueriraco ímíaiimona dáarie Estébamo como fueñe ie finócafue júfiduaidiaioi. Afe llezica Cirénemona dáamierie, daje izói Alejandríamona, daje izói Asia éniemo ite Cilíciamona: nana afémaci Estébamo afefue júfiduaidiaioi.

<sup>10</sup> Mei íadí íena anáfenonidiaioi. Ñuera Joreño íemo iga úrillana fibíllafuedo úriteza.

<sup>11</sup> Ie jira taino lloraini íbajidiaioi. Afémacina llotíaioi:

—Mai omoi daiíri: “Esteban Moisená Juzíñamui díga fiénidíuaina dáinana cacádícai,” —daií daiítatiaioi.

12 Aféfuendo comínina éinamaci diga fáillifaiñeitadiaioi, daje izói ocuífue llófueraini. Iemona cirínvano íena llaitádiaioi. Lláitano Caifóidillaini uiécomo íena uitíaiioi.

13 Afe izói taino uailai nabáiraini jenódiaioi. Afémaci daide:

—Bímie cai ñue rairuírede gairíracomo báíñvano fáicanocaitañede. Jaca báíñofirede, daje izói ocuífue.

14 Afémie dáinana cacádicai. Afe daina daide: “Baie Nazaret ímie Jesús afe gairíraco júdaitaite. Moisés caimo iga finóllifuiái meídotaite,” —daí daidíaioi.

15 Iemona ríimaci naa dinó ráiiedinori, Estébamo eróillano, ie uiéco Juzíñamui abi ímie uiécona eróidena cíoidiaioi.

## 7

### *Esteban abi ie ríidua fue llote*

1 Mei jira lletáiraini illaíma Estébamo jicánote:

—¿Meita nana bífuiái uáfuiái?

2 Jira afémie uai ote:

—Ñue coméide ámatiai, móotiai diga, cue úrillamo cácarei. Cai ebíredinoredímie Juzíñamui cai jaiái nanóidímie Abrahamo cíocaide. Ua Abraham Mesopotamia éniemo illa llezica, afémie nai Haramo jaiániñena llezica,

3 Juzíñamui íena daide: “O illánie fiénocai naa o comíniri. Afemona omo cue llole éniemo o jairi.”

4 Mei jira Abraham Caldea éniemona oni jaide; jáillano, Harán jófue nano nie dino ite. Dinomo ie moo tiilla. Iemona Juzíñamui Abraham afe bie omoi illíniemo atide. Ja birui aféniemo itíomoi.

5 Mei íadi ñie feci raana nai afémie Juzíñamui íena íñede. Afe izói due jiza ie macállíniena íemo fecáñede. Mei íadi Juzíñamui uícomo uáfuena daide: “Bie énie óieite. O tilla meífomo o jítótiai íeite.” Mei íadi aféruillaido Abraham nai jítónide.

6 Nane dáanomo Juzíñamui íena daide: “O uícoidigíma jíáimaci éniemo onínemaci izói íítiaíoi. Dínomo afémaci rairuícamací izói íítiaíoi. Dínomo cuatrocientos fimona duere finólliaíoi,” daide.

7 Mei íadi nane dáanomo Juzíñamui daide: “Omoí rairuícamacina finódizie íaíoi fiénidífuiaí cue jicánolle mei, afémacina duere zefuítaiticue. Ie meífomo o comíni afénomona oni jáitiaíoi. Oni jaillano, bíniemo cuemo ñue caimare tájizaíbitiaíoi,” daide.

8 Juzíñamui Abrahamo daínauai íbana finóllifue llote. Afe llezica ie jítótiai bacano ícoí quetállena ocuállado afe finóllifue uáfuena onótate. Ie jira ie jító Isaac jócua mei ocho dígarui íllamona, Abraham ie jító bacano ícoí quetade. Daje izói Isaac ie jító Jacóbona finode. Afe izói Jacob nana ie jítótiaína finode. Afe jítótiai Israel doce díga nairai moona jáidiaíoi.

9 ‘Bie Jacob jítótiai cai nánoragímaciaí. Afémaci ie ama Josemo úradoidiaíoi. Afemona afémiena fecádiaíoi, Egipto éniemo úillena. Mei íadi Juzíñamui Joseri ite ie canóllena.

10 Nana ie zefuínaillamona zuitade. Ñue úrillana fibíllafue íemo ite. Faraón uícomo ñue comécíidimíena Juzíñamui Josena itátate. Afe Faraón Egipto nahíllaíma. Afe Faraón Josena Egipto jabóllaímana mamede. Afe llezica daje izói dama Faraón jofu illáímana mameca.



11 'Iemona júbietailafue nana Egipto éniemo baite aillo zefuínailafue diga. Daje izói Canaán éniemo ite. Ie jira cai móotiai güíllenidiaioi.

12 Mei íadi Jacob Egíptomo trigo íllana fídiano afénomo ie jitótiai orede. Afémaci cai jáiairagíma. Bifue íaioi fueñe güille uájillafue.

13 Ie mei dáanomo nane jáidiaioimo, José ie ámatiai ie abina onótate. Afe llezica José ie ámatiai Faraómo cíotate afémie íaioina onóillena.

14 Iemona José ie moo Jacob naa ie comíniri atítate. Afémaci setenta y cinco dígamiede.

15 Afe daií íaioimo íficaide Jacob Egíptomo jaiánillena. Dinomo afémie tíide; daje izói afénomo cai jáiairagimamona dáríe tíide.

16 Afe meífodo íaioi ícuruai Siquém illánomo uitá raiájidiaioi. Afe dinomo Hamor jitótiaimona Abraham ie comini ícuruai raillínuaí ibade. Jira afénomo raiájidiaioi.

17 'Jaiái ninomo Juzíñamui Abrahamo uire ñue íaioi íllena riírede uaido uáfuenta llote. Afe uícodo daínáuai fuizáillirui áinoziacademo, Israel nairai Egíptomo ñue jebuídíai; ua iere áillue náiraina jáidiaioi.

18 Afe llezica Egíptomo jíaie Faraón illáimaizaide. Afémie Josena onóñede.

19 Aféllaíma cai náiraina jífujete; cai jáiairagímacina duere finode. Cai como jococa úruiaína zóofetade íaioi tíillena.

20 Aféruillaído Moisés jococa. Afémie ie dúeza illáruimona Juzíñamuina íóbitade. Afe izói ie moona ie ei diga íóbitade. Afe íaillinoi daámani fiui jofomo íena móonaitadiaillinoi.

21 Mei íena zóofetarui dúcinamona Egipto illaíma nahí jiza íena abímo ote. Afengo jitó izóí afézana comúitate.

22 Ie jira afe Moisés Egipto comini nana onóigafuena llófuegamie. Iemona ie daínauaillai riírede. Afe izóí afémie finócafuiai jamánomoide.

23 Ja afe mei cuarenta fimona illa llezica, Moisés ie nairai israelita comini méiñuaiacade.

24 Afénomo Egipto ímie Israel náiraimona dámie duere finóinana Moisés cíoizaide. Ie jira Moisés ie nairai ímie riíduaíbillano Egipto ímie fate afe iba óllena.

25 Moisés comécido daide: “Cue ámatiai israelita comini Egíptomona fáicanocaillifue onódiaíoi. Ua Juzíñamui íaiíoi cuedo fáicanocaitafuena fidídiaíoi,” daide. Mei íadi áfena fidíñediaíoi.

26 Afe jítiramoidiruido Moisés Israel ímíiaillinoí fúirienaillana cíode. Iaillinoí fuiríllafuena llíicaitaacanano íaillinoína daide: “Omícoí daje ámadiomícoí. ¿Nibái conímana duere finódiomícoí?” daide.

27 Ie jira nabai duere finódímie Moisés oni ñuitade. Oni ñuita mei íaillinoímona dámie Moísenadaide: “¿Bu o cai cígímo illáimana jóonegao? ¿Bu cai fiénidifue jicánoraimana jóonegao?”

28 ¿Nauri Egipto ímie o faaja izóí birui cuena fáiacadió?” daide.

29 Daií daínana cacáillano, Moisés botade. Bótano Madián éniemo jaide. Dinomo jicánemie izóí ite. Afénomo mena jitórede.

30 ‘Cuarenta fimona méífomo, Moisés amena figo iñénazicimo mácajide. Sinái idu áinomo ite. Afénomo Juzíñamui abí ímie boode íázafedínamo

ciócaide. Afe irai bóoidinomo cíocaide.

<sup>31</sup> Afena cíonamona Moisés jabo fáigacaide. Afena ñue cíoillena áfemo jofo ánozide. Ainozillano Ocuíraima Juzíñamui úrillana cacade. Afe uai daide:

<sup>32</sup> “O nánoidimaci Juzíñamuidicue. Ua Abraham, Isaac, Jacob dieze Juzíñamuidicue,” daide. Jira Moisés jágieri cuidíricaide. Iemona dáanomo áfemo eróillana jacíruite.

<sup>33</sup> Iemona Ocuíraima Juzíñamui íena daide: “O eiba ico duiño, benó o naidáillano cue íllaza jamánomo ñúenoza.

<sup>34</sup> Cue comini Egíptomo duere zefuíllana cíódicue. Íaioi eehe cáilliana cacádicue. Jira ana íaioina zúitaiticue. Jira cue dainana cacai. Egíptomo ona óreiticueza,” daide.

<sup>35</sup> ‘Ja nano fueñe nana comini Moisená jámairuitaioi. Iena jaiái daízaidiaioi: “¿Bu illáimana mamécao, caimo jicánoraimana o íllena?” Mei íadi bóodinamo cíode Juzíñamui abi ímiedo Juzíñamui Moisená zúitaitimiena orede, íaioi illáimana.

<sup>36</sup> Jira Moisés cai jáíairagimaci Egíptomona jino bairódimie. Afémie bie éniemo cíorainina raa onótate raa diga finódimie. Afe izói Jáírede Monáillaimo cíorainina dainamona comuide raa finode. Afe izói cuarenta fimona íllamona zaféredizicimo íaioi illa llezica cíorainina raa finófirede.

<sup>37</sup> Afe dáamie Moisés Israel comínina daidímie: “Juzíñamui dani omoi ámatiaimona uai llóramana ómoimo óreite, cue ie ória izói. Afémiemo jeire omoi oíri.”

<sup>38</sup> Afe Moisés zaféredizicimo comíniri itímie. Afe Moisés Sinaí ídumo itímie. Dinomo Juzíñamui abi ímie íemo úrizabite. Afemona Moisés cai jáairagimamo aféuai jino llotímie. Afe Moisés cáatatuailai líinote, afe uáillaina caimo fiénocaillena.

<sup>39</sup> ‘Mei cai jáairagimaci íemo cacáreacañediaioi. Iena ruifruillano, meine Egíptomo jáiacadiaioi.

<sup>40</sup> Jira Aarona daidíaioi: “Cai uícodo ífoite juzíñamuillaina caimo finóllena jitáidicai. Baie Moisés Egipto éniemona cai otímie, íemo itífuenta onóñedicai,” daidíaioi.

<sup>41</sup> Ie jira juráreto jiza jana finódiaioi; jiáie rílleniai fatíaioi afe jízato jánaraina finócamo fia fecállena íena íóbitallena. Mei íaioi ónoído finoca raamo caimátaioidiaioi.

<sup>42</sup> Ie jira Juzíñamui íaioimona oni jaide. Afemona Juzíñamui íaioina fiénocaide mona úcuaimo íaioi comeci facáoillena. Mei daí uai llóraini rabénicomocuegáuai daide:

¡Israel comini, omoi cacai!

¿Cuarenta diga fimona íllamona zaféredizicimorílleniai fatíomoi cuemo fia fecállena?

<sup>43</sup> Ieñede. Jiáifodo finódiomoi.

Taino juzíñamui Moloc ráicaillacoji abimomáinuano úioicaidiomoi.

Afe llezica jiáie taino juzíñamui Renfán ucúduna eroide jánaraimo jeire otíomoi.

Afe jánarai dani omoi finoca íóbitalle jánarai.

Ie jira omoi éniemona omoi otá Babilonia batífenemo ómoína óreiticue, daide.

<sup>44</sup> ‘Cai jáairagimamo Juzíñamui gairíracocue. Aféno noficomocuega ocuica uailai énotiaioi.

Afe gairíraco Juzíñamui Moisémo ocuilla izói niga. Nano fueñe Juzíñamui íena daide: “O ciónaco omo cue ácata izói o nitátari,” daide.

<sup>45</sup> Cai jáiairagimaci afe gairíraco feci raa izói llínotiaioi. Ie mei Josué diga bitino jáie nairai énie báirua llezica afeco atídiaioi. Afe éniemo itínuiái Juzíñamui oni jiude, íaioi meífomo ie comini illino finóllena. Afeco daíí dinomo ite David illáruillaído.

<sup>46</sup> Illaíma David Juzíñamuina ióbitade. Iemona Juzíñamui afe Davidna canófirede. Aféruillaído ie jáiairagima Jacob ínoga Juzíñamui illico nitátaiacade.

<sup>47</sup> Mei íadi ie jitó Salomón Juzíñamui jofo ua nitátatimie.

<sup>48</sup> Mei íadi jamánomo caifoide Juzíñamui, comini ónoído niga gairíracuaimo ífinide. Afe izói uai lloraima daide:

<sup>49</sup> Caifo bie mona ua cue illáimana ráirano izoide. Ie mei bie énie cue idai bitáoinanie izoide.

¿Níie izóidico cúeiena nitátaitio?

¿Nee cue ocózinairano?

<sup>50</sup> ¿Ua meita nana bie ráaniaina cue ónoído finódicue?

Jíi finódicue, —daíí Ocuíraíma Juzíñamui daide.

<sup>51</sup> Nai Esteban afémacimo úrioicaide. Daide:

—Mei íadi omoi comeci jaca Juzíñamuina rairuífirede. Juzíñamuina onóñedimaci izói jefónidíomoi. Juzíñamuimo comécíñedimacídíomoi. Ñuera Joreño llétafue jaca jeire oñedíomoi. Omoi jáiairagima izóidímacídíomoi.

<sup>52</sup> ¿Ua meita omoi jáiairagima níi uai llórainina duere finódiaioi? Nana íaíoína duere finódiaioi.

Nii fígomie bíllana uícodo llotínona titádiaioi. Afe fígomie jae dúcide. Iena fécano fatíomoi.

<sup>53</sup> Omoi Juziñamui abi ímiaido llogámacidiomoi, mei íadi ñue cacáreñediomoi, —daí dínori Esteban daide.

### *Esteban tállafue*

<sup>54</sup> Aféfuiaina cacáillamona, rícaidiaioi. Estébamo fuedo gugúricaidiaioi.

<sup>55</sup> Mei íadi Esteban Ñuera Joreño úicaigamie. Afe llezica monamo érocaide. Dínomo Juziñamui ebírenafuena ciode. Afe llezica Jesús Juziñamui nabézimo naidáinana ciode.

<sup>56</sup> Ie jira daide:

—¡Ero! Mona túinana ciódicue. Nanoide ñima Jitó Jesús Juziñamui nabézimo naidaide, —daide.

<sup>57</sup> Mei íadi afémaci jefo íbáidiaioi. Rírerie caillíoicana illíñana íemo caízaidiaioi.

<sup>58</sup> Jófueмона oni uítá nóñena ie níjidiaioi. Níjídino íaioi emódodiroillaí jitócome Sáulona maméidimiena úiñotadiaioi.

<sup>59</sup> Nai ie íaioi níjia llezica, Esteban Juziñamuimo úrillano daide:

—Ocuíraima Jesús, cue joreño oni llíino, —daide.

<sup>60</sup> Ie mei ana dújullano, ríire caillide. Daide:

—¡Ocuíraima! Bie fiénidífue ícoinia bimácimo jitáñeno iri, —daide.

Daí daína meífodo tíbicaide.

## 8

### *Saulo Jesudo gairirani racade*

<sup>1</sup> Fatímaci izói Saulo afémacimo comécioide.

Aféruimona Jerusalemo ite Jesudo gairírani duere finóllena como fueñe judíuai júnuaidiaioi. Ie jira nana ínotimaci Judea énie fuédado ráidoizitiaioi; daje izói Samaria éniédo. Dani doce dígamie orécamaci Jerusalemo fiébitiaioi.

<sup>2</sup> Iemona Juzíñamui raana duéruitimaci Esteban raiájidiaioi. Ieri aillo éediaioi.

<sup>3</sup> Afe llezica, Saulo gairíramacina nai racáoide. Nágacuaido jenode. Afécuaimona íñiaí ringóniaí díga jino zónuano íaioina llavétate.

### *Jesucristo ñuera uai Samáriamo llujidiaioi*

<sup>4</sup> Ja birui Jerusalémona oni jáiredino, Cristo jíllonafue íaioi jáillanuaimo llujidiaioi.

<sup>5</sup> Afémacimona dámie Felipe Samaria jófuego jaide. Dinomo Cristo ráfuedo íaioimo úrizaide.

<sup>6</sup> Afe comini gairíllano Felipe dáinamo ñue cacáreidiaioi. Felipe finoca ciórainina onótate ráaniaí ciódiaioi.

<sup>7</sup> Mei jira aillo fiénide jóriaimona jíllotagaiaioi. Afémacimona fiénide jóriaí caillícana oni jaide. Afe llezica aillo tízitaitimíiaí aidáimaiaí díga jíllotagaiaioi.

<sup>8</sup> Aferi afe jofue comini iere caimátaioidiaioi.

<sup>9</sup> Mei íadi dámie Simona mámeciredimie afénomo ite. Afémie uícoidiruillaido aimana jaide. Afe jofue comini jífujete. “Jamánomoidimedicue” daífiredimie.

<sup>10</sup> Nana comini jabóidinomona ua nahíllaímamo díeze íemo iere cacáreidiaioi. Daídíaioi:

—Bímie cafoide Juzíñamui ríinona igámie, — daídíaioi.

11 Iere are ie aimánafuedo afémacina jífujete; ie jira íemo jeire otíaioi.

12 Mei íadi Felipe Juzíñamui illáimana illirui uai Jesucristo mámece diga, íaioimo llote. Aféuailaina cacáillano afemo ñue ínotiaioi. Íññiai ringóniari dájerize ínotiaioi. Ínuano báutizagaiaioi.

13 Afe dama Simón ínuano báutizaga. Iemona afémie Felipe nabaina jaide. Afémie Felipe finoca áillue cíorainina raa onótate raa diga, áferi fáigacaide.

14 Jae Samaria comini Juzíñamui úrillauai jeire otíaioi. Afe íaioi jeire uáfuenta Jerusalemite orécamací fidídiaioi. Fídiano afénomo Pedro Juan diga orédiaioi.

15 Dúciillano Samáriamo ite ínotinori Juzíñamuimo jicádiaioi, Ñuera Joreño íaioi llíinollena.

16 Mei afémacimona nímiemo Ñuera Joreño nai biñede. Dama Ocuíraima Jesús mámeceba báutizaga.

17 Afemona Pedro Juan diga íaioimo onoi bitade. Iemona daí Ñuera Joreño úicaigaiaioi.

18 Orécamací bimácimo onoi bitamona Ñuera Joreño bíllana Simón cíode. Cíonamona úcube orécamie íaillinoimo íoicana

19 daide:

—Jadíe ríino cuemo ine. Afe izói nie cómemo cue onoi cue jóoneadi Ñuera Joreño íemo bílleza, —daide.

20 Jira Pedro íena daide:

—¡Naa o úcube diga o táinocairi! Juzíñamui fecaca raa úcubedo íbárede daídio; daí comece facádio.



21 Bífuomo o dúiñedio. Bie coco táijinafuemo jaináñedio, o comeci jaícina Juziñamuimo jóoiñena jira.

22 Bie o fiénidifue o fáicanocai. Juziñamuimo izire o jicari o fiени comécido dañafue iba omo óñeilleza.

23 Ja onódicueza o comeci filliru izói eríredeza. Afe íaifuiaido cuinácamié izói itíoza.

24 Jira Simón uai ote:

—Ocuíraimamo cuedo jicari, nana o cuena dañáfuiaimona dafue cuemo níjiñeilleza, —daide.

25 Afénomo Crístomo ñúefue nitádiaioi. Daje izói Juziñamui uáillaído úritiaioi. Ie meífodo, orécamié íaillinoi Juziñamui jíllolluui aillo Samaria duera jófuiaimo llófuiaidiaillinoi. Ie mei Jerusalemo meine bitíaillinoi.

### *Felipe Etiopía ímiemo úrite*

26 Afefue meífodo Juziñamui abi ímie Felípena daízaibite:

—Náidacaillano, fuiri batí Jerusalémona Gaza jófuemo jóidíodo o jairi, —daide.

Afeo zaféredizicido jóidío.

27 Iemona Felipe náidacaillano áfeodo jaide. Dinomo uíécodo jaide Etiopía ímie éidajide. Afémie illaingo abi ríimie. Afémie Etiopía illaingo Candace úcube úñoraíma. Afe llezica afémie óinima. Naui uícodo afémie Jerusalemo Juziñamuimo cámaduaide.

28 Afémie abido ie éniemo jáizaide. Ie caballo zonóicaiga ráiralloicimo ráicana Juziñamui uai lloraíma Isaías cuezáuai facádote.

29 Afe llezica Ñuera Joreño Felípena daide:

—Jadilloicimo áinozillano afénomo nabairi, —  
daide.

<sup>30</sup> Ainozillano, Felipe afémie Isaías cuezáuaillai  
facáduana cacade. Iemona íemo jicánote:

—¿O facádoga uaina meita onódio? —daide.

<sup>31</sup> Jira afémie uai ote:

—Cuemo jino llóitimie iñédeza, ¿ñie izói  
ónoiticue? —daide.

Iemona Felípemo caifo ie diga dáanomo ráillena  
jicade.

<sup>32</sup> Juzíñamui Cuezáuaimona afémie facádoga uai  
áfena daide:

Oveja izói tíizaillinomo uiga.

Oveja jiza abi cuidódino uíecomo úriñedimie izói  
táide,

afe izói afémie jaca níífuedo úriñede.

<sup>33</sup> Afémie iere jámairuigamie; jáicinaidífuenta íemo  
rairuídiaiói.

¿Ie ñue illáfuedo mei bu úrille?

Mei ie cáajano bie éniemona niné táinocaide, —  
daide.

<sup>34</sup> Jira illaingo abi ríimie Felípemo jicánote:

—Cuemo llone, ¿bumo úrite uai lloraíma? ¿Ñibai  
dama íemo úrite? ¿Ñibai jáíimíemo úrite? —daide.

<sup>35</sup> Jira Felipe afémie facádoga Cuezáuaimona Jesús  
úrillauai íemo jino llote.

<sup>36</sup> Jainoi illánodo jailla llezica ríimie daide:

—Benomo ite jainoi. ¿Birui áfejido cue  
báutizanidícue? —daide.

<sup>37</sup> Jira Felipe daide:

—Nana o comécido o íinoiadi báutizarellio, —  
daide.

Jira afémie uai ote:

—Jesucristo Juzíñamui Jitoza áfemo ínoticue, —  
daide.

<sup>38</sup> Iemona jáiralloici mozíñota ille diné  
jáidiaillinoi. Dinomo Felipe ie báutizade.

<sup>39</sup> Illémona ari abido jáidiaillinoimo, Juzíñamui  
Ñuera Joreño Felípena oni uite. Iemona ríimie íena  
jaca nane cíõñede. Mei dama ie éniemo caimare  
jaide.

<sup>40</sup> Felipe nane Azoto jófuego cíocaizaide.  
Dinómona naga jófuedo jíllonauai llócade. Ua ba  
Cesarea jófuego fuizájide.

## 9

*Saulo começi jáífodo méidua fue*  
(Hch 22.6-16; 26.12-18)

<sup>1</sup> Afe llezica Saulo Jesumo ínotinona  
fáiacanafuedo úrioide. Ie jira lletárirairi illáimamo  
jicánuaide.

<sup>2</sup> Daide:

—Llavétallibiaina cue ine, Damasco jofue  
gairíracomo cue jáilleza, Jesús uaimo ínotino cue  
jénuailleza. Afemona íñiaí naa ringóniaíri maitá  
Jerusalemo cue atílleza, —daide.

<sup>3</sup> Mei nai iodo jailla llezica, Damasco jófuego  
ánozidemo, monámona bite úzefo nágafene ie  
abimo úzere egáñocaide.

<sup>4</sup> Iemona Saulo éniemo baiíde; baiílla llezica  
Jesús íena dáinana cacade:

—Saulo, Saulo, ¿nibái mei cue racáido? —daide.

<sup>5</sup> Mei jira Saulo uai otá jicánote:

—Ocuíraima, mei o ¿búido? —daide.

Jira aféuai ote:

—Cue Jesús dice. Dama o racámiedice. Aillue juráreto zaitácademo jáiredizimo jiide. Afe izói ízitagamiedo.

<sup>6</sup> Mei ímona Saulo jágeri cuidide; daide:

—Ocuíraima, ¿ona nie izói finóredice? —daide.

Jira Ocuíraima uai ote:

—Náidacaillano baie jófuego mai jofo jai. Dinomo o finóllifueña omo llóitiaioiza, —daide.

<sup>7</sup> Sáulodo jaide comini aféuaina cacádiaioi íadi mei buna cióñediaioi. Aferi iere jacínaitiaioi.

<sup>8</sup> Ie meífodo Saulo éniemona caífo ráinacaillano, érocaide. Mei ui botáicaide íadi éroinide. Mei jira daí ónoído jainátacana Damasco jófuego íena uitíaioi.

<sup>9</sup> Dinomo daruíamani uina cióñede. Afénomo minícana güñede, jiróñede.

<sup>10</sup> Afe Damasco jófuego ínotimie Ananías illa, nímiemo Ocuíraima nicáirilla izóidedo cíocaide. Iena daide:

—¡Ananías! —daide.

Afémie uai ote:

—Ocuíraima, benó itice, —daide.

<sup>11</sup> Jira Ocuíraima íena daide:

—Náidacaillano, Deréchana mámecirede iodo jairi. Dinomo Judas jofomo jicánori: “¿Ninomo ite Sáulona mámeciredimie, Tarso jofue ímie?” O dúcina llezica afémie Juzíñamuimo úrite

<sup>12</sup> Ie úrioina llezica nicáirilla izóidedo ie uimo onoi bitábitimie, Ananías mámeciredimien a cide; áfemona nane ie ui ñue cíoite, —daide.

<sup>13</sup> Afe uaina cacáillano Ananías daide:

—Aillo comini baie ímana cuemo llotíaioi. Afe llezica omo ínotinuiamo nana Jerusalemie ie fieni finócafuiái cuemo llotíaioi.

14 Ja birui afémie benomo bite. Lletáiraini illaini llavétallibiai diga bite nana o mámecido jicáfiredino maitá úillena, —daide.

15 Jira Ocuíraima daide:

—¡Mai jai! Afe úimana jae cue nizeca jíáie náiraímo cuedo úrillena naa íaiói illáiniri.

16 Afémie aillo cue náiraímo llóite. Afémie aillo cue ícoinia duere zefuállana íemo ácataiticue, —daide.

17 Iemona Ananías Saulo illácomo jaide. Jofo jáillano íemo onoi bítajano daide:

—Ama Saulo, Ocuíraima Jesús o billa iomo omo cíocaidímie cue o ui meine abido cíoilena ocuide. Afe dáanomo afémie Ñuera Joreño ona cue úicaitallena cuena daide, —daide.

18 Afe daíí dáinamona, chamu icogi izoide ie uímona cúcoizite. Iemona nane ie ui meine cíoide. Afemona Saulo náidacaillano báutizatata.

19 Afe meífodo güillano, ie riino meine comúitate. Afe mei nano nígarui Damáscomo ite ínnotinori fiébide.

### *Saulo Damasco jófuego jino llófuerite*

20 Ie meífodo Saulo garíracomo jino llófuerizaide. Afénomo daide: “Jesús Juzíñamui Jitó.”

21 Nana afémiemo cacádino fáigacaillano daidíaiói:

—¿Ua meita bie námiede, nauri Jerusalemo Jesús mámecido jicáfiredino racáidímie? ¿Ñie nauri benomo bitímie lletáiraini illáinimo cai maitá úillena? —daidíaiói.

22 Mei íadi Saulo jamánomo riire jino llófuerite. Jesús Crístonana jino uafodo ciótate. Mei jira Damáscomo ite judíuai Saulo ifona íritagaiaíói.

### *Saulo judíuaïmona jillode*

<sup>23</sup> Diga iruillaï jailla meífomo, judíuaï dáanomo comeci fácana Saulo fállena maméritiaïoï.

<sup>24</sup> Mei íadi aféfuena afémie fidide. Naa mona naïo diga jofue jino jáirazemo úñoidiaïoï ie fállena.

<sup>25</sup> Mei íadi ñnotimaci áillue cirígaimo íena jóonetiaïoï. Jóoniano afe jofue jinófene cirínuailla jinomo naïo íena agüinetiaïoï. Afe daíí afémie botade.

### *Saulo Jerusalemo illafue*

<sup>26</sup> Saulo Jerusalemo dúcillano, Juzíñamuimo ñnotinori gairíacade, mei íadi nana afémiena jacíruitiaïoï. Afémie ñnogafuena naï jeire oñédiaïoï.

<sup>27</sup> Mei íadi Bernabé íena uáidote. Iemona orécamiïaimo íena ácatajide. Afemona Saulo iomo Ocuíraïmana çónafue íaïoïmo llote. Ie mei Saulo Damasco comínimo méaicaiñeno Jesús mámecido úrillafue íaïoïmo llote.

<sup>28</sup> Jira Saulo Jerusalemo diga irui ite. Dinomo ñnotimaci diga macácaide.

<sup>29</sup> Ocuíraïma mámecido méaicaiñeno úrite. Griego uaido úritino judíuaïmo úrite. Conímamo jicánua uai ua daíí úrite. Iemona ie fállena mamédiaïoï.

<sup>30</sup> Jíáie ámatiaï afefue fidiano, Saulo Cesaréamo uitiaïoï. Dinómona Társomo íena orédiaïoï.

<sup>31</sup> Ie meífomo nana Judea éniemo ite Jesús mámecido gairídino fírazitiaïoï. Ja íaïoï ñnogafuemo caïmare náireoicaidiaïoï. Afe izói Galilea éniemo Samaria énie diga ite ñnotino fírazillamona riire náireoicaidiaïoï. Ocuíraïma

Jesús ñúefueri jáicaidiaioi. Ñuera Joreño íaioi cánuamona jebuíoicaidiaioi.

*Eneas jae jílloga*

<sup>32</sup> Pedro jáiae ámatiaí uáidualla llezica, daje izói Lida jófuego ite ínotino éroizaide.

<sup>33</sup> Dinomo Enéasna maméidimiena cíozaida. Afémie ocho diga fimona bíramo bíide ie tízitailla jira.

<sup>34</sup> Iena Pedro daízaida:

—Eneas, Jesucristo ona jíllogaiteza. Náidacaillano o bíira ñue fino, —daide.

Afemona Eneas raire jíllobicaide.

<sup>35</sup> Lida jofue nairaí aféfuena nana cíodiaioi naa Sarón náirairi. Iemona jaiaí nano íaioi ínogafuiaí fáicanocaillano Ocuíraima llogáfuego ínotiaioi.

*Dorcás tíide meine abido cáanafue*

<sup>36</sup> Aféruillaído Jope jófuego ite ínotingo. Afengo mámeceí Tabita. Afe mámeceí griego uaido Dorcas. Afe ringo ñúefuego jáicade. Jitáidinona canófirede.

<sup>37</sup> Aféruillaído afe Dorcas iráreizaide. Iemona tíide. Ie abí jócua meífoto oni caifóidicomo jónetiaioi.

<sup>38</sup> Lida áinori ite Jope. Aféruimo Pedro afénomo nai ite. Ínotino afénomo íllana fídiamona, ménamie orédiaioi íena daíllena:

—Jópemo jízíñeno raire biri, —daide.

<sup>39</sup> Iemona Pedro afémie íaillinoído jaide. Pedro dúcinamona, Tabita abí jóoinanomo íena uitíaioi. Nana fecíngotiaí abido ífoina naidározellano éediaioi. Afe llezica nana Dorcas nauí ie caana

llezica tifócauiruai íemo ácatatiaiöi. Emodo íroillai naa jíáie iníroillairi íemo ácatatiaiöi.

<sup>40</sup> Afécomona Pedro nana jino íaiöi orede. Ie mei caiñici ífodo dújuillano Juzíñamuimo úrite. Tídingomo eróillano daide:

—Tabita, mai caífo náidacai, —daide.

Iemona afengo ui botáicaide. Pédromo érocaillanona caífo ráinade.

<sup>41</sup> Onoido llínota ie caífo naidánete. Afe mei ailli jino oreca fecíngotiai íemo ámatiai dainámaci díga abído jírite. Iemona afengo caade íaiöimo izájide.

<sup>42</sup> Afefue nana Jope jófuemo jállecaide. Iemona aillo comíni Ocuíraimamo ínotiaiöi.

<sup>43</sup> Afe mei Pedro díga irui afe jófuemo fiévide. Igora ídiai jinítaraima Simón jofomo ífirede.

## 10

### *Pedro Cornelio uáiduafue*

<sup>1</sup> Afe Cesarea jófuemo Cornéliona maméidímie ite. Afémie fuíríraini áillogüelli illaíma. Afe áillogüelli mámece Italiano.

<sup>2</sup> Afémie naa dama ie comíniri Juzíñamuimo comece fácajano caímare úrite. Afe llezica Juzíñamuimo ñue jacíruioide. Daje izói aillo úcubena judíuaimo fecáfirede íaiöi canóllena. Iemo Juzíñamuimo nágarui úrifirede.

<sup>3</sup> Ie mei daarui jitoma ana ítemo nicáirilla izói cíode. Afe nicei anado Juzíñamui abí ímie uáfodo cíode. Afe abí ímie jofe Cornelio illánomo jaide; jáillano íena daide:

—¡Cornelio! —daide.



4 Cornelio afe Juzíñamui abi ímiemo jacíruioicana érocaillano jicánote:

—Ocuíraima, ¿bie minica?

Iemona abi ímie íena daide:

—O jicánua Juzíñamui jae jeire ote. Daje izói jitáidino o cánuafuiana jeire ote.

5 Mei jira Jope jófuego íñiaí ore, Simón járizaillena. Afémie jáífodo mameina Pedro.

6 Afe Pedro jáí Simón igoraí ídiaí jinítaraíma. Afémie jofo monáillai fuédamo ite. Afe Simón Pedro o finóllifue omo llóite, —daíí daide.

7 Afe íemo úrite Juzíñamui abi ímie jáidemo, Cornelio mena táijitagamie járrite. Ie mei ie abi ímiaímona daa ñúfuego ínofirede fuiríraíma járrite.

8 Nana Juzíñamui abi ímie íemo llogafue llua meífomo Jópemo íaíoina orede.

9 Afe jítiramoidiruimo, nai afémaci iodo jailla llezica, Jópemo áinozidiaímo, Pedro jaíciri illa llezica jofo emodo ibánimo Juzíñamuimo úrizaide.

10 Aillo jufínaillamona güíacade. Mei íadi nai güille íaíoi fínua llezica, nicáirilla izoide ciode.

11 Afe nicai anado mona túijicaillana ciode. Afénomona áillue iniroi izóidena nágafene zicai ícoínoga ana éniemo agüínana ciode.

12 Afe agüínega iníroimo naga táíide rílleníai ite, jaióníai féedínuaí diga.

13 Iemona daa uai dáínana cacade:

—Pedro, náidacaillano fatá ríi, —daide.

14 Jira Pedro uai ote:

—Jii, Ocuíraima, riñeiticue. Bácaca ríllena jaca riñédicue. Daje izói íáirede ríllena riñédicue naa rairuica rille diga, —daide.

<sup>15</sup> Afe uai nane dánomo íena daide:

—Naga Juziñamui dogá izói finoca rílleza íáire maméñeno iri, —daide.

<sup>16</sup> Afefue dacaiñoámani íemo íficaide. Ie meífomo afe iniroi meine abido monamo jaide.

<sup>17</sup> Nai Pedro afe nicáirillafuemo comeci facáoide. “Afe cue ciónafue nie izói daiíacade,” dáidemo, Cornéliomona orécamiái nazemo náidazaibitiaioi. Simón jofo jicánotiaioi.

<sup>18</sup> Dúciillano aillo uaido jicánotiaioi:

—¿Simóndimie bicomio ite? Afémie jiáifodo mameina Pedro, —daidíaioi.

<sup>19</sup> Nai Pedro nicáirillamo comeci facáoidemo, Ñuera Joreño íena daide:

—Cacai, damieámani o jenódiaioi.

<sup>20</sup> Náidacaillano ana billano jizire úriñeno íaioido jai, mei cue omo orécamiáiza, —daide.

<sup>21</sup> Mei jira Pedro jofo emódobanimona ana billano Cornelio orécamací, nazemo náidaidinona daide:

—Cue omoí jenócamiedicue. ¿Nibái mei bitíomoi? —daide.

<sup>22</sup> Jira afémaci uai otíaioi:

—Ellaíma Cornelio cai ória jira bitícai. Afémie ñúefuena nitácamie. Afémie Juziñamuimo ñue jacíruioide. Nana judíuai íena ñue llínotiaioi. Iena iere izíruitiaioi. Juziñamui abi ímie íena daide: “Jópemo comíni oreri Pedro uáidollena, afe mei o jofomo Pedro bílleza.” Jira o uáibitícai. Dinomo Cornelio íena o daiíacallífuena cácaite, —daidíaioi.

23 Ie jira Pedro jofu íaioina ote. Afe naio ie diga fiébidiaioi. Afe jiáiruido Pedro afémaci diga jaide. Afe llezica Jópemo ite ámatiaimona íena nabáioicaidiaioi.

24 Afe jiáiruido Cesaréamo dúcidiaioi. Dinomo Cornelio íaioina úiñote. Afénomo bíllena ie llogámaci ie comínimona, ie gaiga nabáñiaimona dáanomo gairídiaioi.

25 Afécomo Pedro dúcia llezica, Cornelio jino íena llínuaibite. Jino billano Pedro anamo dújude, ie cáimadollena.

26 Mei íadi Pedro íena náidacaitano íena daide:

—Náidacai. Cue o izói énie ímiedicue, —daide.

27 Nai afémie diga úrioina llezica, jofu jaide. Jáillano aillo gairídinona cíozaide.

28 Jira Pedro daide:

—Jae onódiomoi, judío ímie ie ínuafuiaido jiáizie ímie diga nabáirinide. Daje izói ie jofomo jaille rairuírede. Mei íadi Juzíñamui jae cuena llófuete. Buna jiáimana comécina íáiredímie daíñide. Daje izói rofóciredímie jiáimana daíñide.

29 Ie jira orécamiiai cue jíirilla llezica nie izói daíñeno jarire bitícueza. Mei jira nibái mei cue uáidotioza onóacadicue, —daide.

30 Ie jira Cornelio uai ote:

—Jae nagaámarui jáidemo, afe bie daje hóramo, benó cue jofomo güiñeno iticue. Aféruimo jitoma ja ana ítemo Juzíñamuimo comeci faiticue. Comeci faiano quenírede inícuiro jitáoidímie cuemo cíocaide.

31 Afémie cuena daide: “Cornelio, o jicánogafuiaina Juzíñamui cacade. Afe llezica jitáiredinomo o cánuafuiaimo Juzíñamui coméciide.

32 Jope jófuego ore Simón uájillena. Afémie jiáifodo mameina Pedro. Afémie jiáie Simón jofomo biruido ite. Jiáie Simón igorai ídiai jinítaraima. Ie jofu monaillai fuédamo ite. Pedro dúcia o diga úrizaita,” daide.

33 Daí raire ona jenótaticue. Jira o bille ñuera. Birui nana benomo Juzíñamui uiécomo iticai. Nana Juzíñamui omo llotátagauai caimo o daíillena cacáacadicaí, —daide.

### *Pedro Cornelio jofomo llófujeteza*

34 Jira Pedro ja úrillano daide:

—Ja birui Juzíñamui jiáimana daa úradotatañedeza onódicue.

35 Mei íadi nizíemo itino íeri jácicaillano ñúefuedo úritinona Juzíñamui íaioina llínofirede.

36 Israel cómogimacimo Juzíñamui úrite. Jesucristodo comeci caimare uái illafue íaioimo llote. Afémie nana nairai Ocuíraima.

37 Nana judío éniemo comuídifuena ñue onódiomoi. Juan Bautista jino llujilla mei, comini bautizailla meifodo afefue Galiléamo como fueñe taineca.

38 Nazaret ímie Jesumo Ñuera Joreño riino Juzíñamui ígaza onódiomoi. Afe Jesús ñúefue finócana jáillana onódiomoi. Afe izói nana Taife riino anamo duere zefuídina ie jillotafuiaina onódiomoi. Aféfuiaina daí finode Juzíñamui ie diga jáicana jira.

39 Nana Jesús judío éniemo finócafuiái uai nabáiraimacidicaí. Daje izói Jerusalén jófue mo ie finócafuiái uai nabáiraimacidicaí. Ie méifomo cruzmo íena coráiano íena titádiaíoi.

40 Mei íadi Juziñamui daruiámani íllamona abido íena cáatate. Ie mei afémiena caimo cíocaitade.

41 Nana comínido cíocaitañede mei íadi dani caimo cíocaide, Juziñamui uícomo nizeca uai nabáiraimacidicaíza. Afe mei afémie tíllanomona meine abido cáanamona ie méifomo, afémie diga güiticaí; ie diga jiródicaí.

42 Afémie Jesucristo rafue jino comínimo caina llotátate. Afe izói jíáífue caina ua nabáiritade. Afe fue daide: “Juziñamui afe Jesús tíidino cáadino diga íaíoi fiénidífuíai jicánoitimiena ocuide. Cai aféfuemo uaina nabáitagamacidicaí.”

43 Daje izói jaiái ninómona nana uai lloraini Jesudo úritiaíoi. Daídíaíoi: “Nana afémiemo ínotino íaíoi íáiredífuemona ie mámeçido ñue dóficaitiaíoi,” daídíaíoi, —daide.

*Judíuaiñedino Ñuera Joreño como fueñe úicaigaiáoi*

44 Nai Pedro úrioina llezica, ie úrillauaimo cacáreidimacimo Ñuera Joreño nana íaíoimo ana bite.

45 Jira Pédrodo bite ínote judíuai fáigacaidiaíoi. Ñuera Joreño judíuaiñedinomo daje izói úicaigafueri fáigacaidiaíoi.

46 Jae jíáizie uáillaído íaíoi úrillana cacádiaíoi. Afe llezica Juziñamuimo íaíoi íóbioinana cacádiaíoi.

47 Mei jira Pedro daide:

—¿Birui bu mei ráiruille bimaci báutizallena; mei daa cai izói Ñuera Joreño úicaigaiáoi? —daide.

48 Iemona Jesucristo mámeçido íaioi báutizazigaiáioi. Ie meífodo Pédro mo izire jicádiaioi: “Nano nígarui cai diga iri,” daidíáioi. Daí íena jeruídiaioi, nano nígarui íaioi diga íllena.

## 11

### *Pedro Jerusalemo ite ínotinomo llogafue*

1 Judéamo ite orécamaci ámatiai diga, cómoicana jíáifuena fidídiaioi. Afefue daide: Judíoñedimaci Juzíñamui úrillauaina jae jeire otíaioi.

2 Pedro meine Jerusalemo jáidemo, judíuaimona dámerie ínotino Pédrone zanódiaioi.

3 Zánuano daidíáioi:

—¿Nibái judíoñedino uáiduidio? ¿Nibái íaioi diga güitio? —daide.

4 Ie jira Pedro afefue nanómona nana ie finócafuiái llote; daide:

5 —Jope jófue mo cue íadi, Juzíñamuimo úrifiredicue. Afe llezica nicaí anado ciódicue. Afe nicaí anado áillue iniroi izóidena monámona ana bíllana ciódicue. Aferoi nágafene zícaino ícoinoga. Daí cue illánomo dúcide.

6 Afemo ñue eródicue ie eromo itínuiaina onóillena. Iemona afe eromo ite táicaide rílleniaina ciódicue. Afe dáanomo jacírede rílleniaina ciódicue. Daje izói afénomo jáizai, íemo féedinuiái diga íllana ciódicue. Nana afe ciona rílleniái bácaziga.

7 Iemo daa uai cuena dáinana cacádicue. Daide: “Pedro, náidacaillano afe ríllemona fatá ríi.”

8 Mei jira daidicue, “Ocuíraima, dama ite. Jaca nanómona cue fúedo íáiredena riñédicue bácaie diga.”

9 Ie mei afe monámona cacaide uai dánomo cuena daide: “Juzíñamui doga rílleza íáirede daiñeno o iri.”

10 Afefue dacaiñoámani meine íficaide. Afe meífomo dánomo nana monamo meine jaide.

11 Afe llezica daamieámani cue illánomo dúcide. Afémaci Cesaréamona cue jenóllena orécamaci.

12 Ñuera Joreño afémacido cuena orede: “Due jiza jizíñeno afémacido jairi,” cuena daide. Daje izói baie seis ámatiai cuedo jáidiaioi. Nana cai daaco jofomo jáidicai.

13 Afémie Juzíñamui abi ímiena ie jofo eromo ie ciónafue caimo llote. Afe Juzíñamui abi ímie náidaillano íena daide: “Jope jófuego nano nígamie ore, Simón jírizaillena. Dáamie jíáfodo mameina Pedro.

14 Afémie ona dáíteza, nie izói o nana o comini diga jíllotioza,” daide.

15 Cue fueñe íaioimo úrizaila llezica, Ñuera Joreño imaci acónimo bite, nano fueñe cai acónimo billa izói.

16 Mei íemona Ocuíraima daínáfuego úibicaidicue. Afefue daide: “Uáfueña Juan fia jáinoido báutizade, mei íadi Ñuera Joreño úicaigamacina íitiomoi.”

17 Mei jí Ocuíraima Jesucrístomo cai ínuano Juzíñamui caimo iga Joreño, bimácimo Juzíñamui íacade. Afena fidíillano Juzíñamuido jarífeicana úriacañédicue. Jamai cómedicueza, —Pedro daí daide.

18 Mei ie jira Jerusalemo ite ámatiai aféfuiaina

fidia llezica, lícaidiaioi. Lícaillano Juzíñamuimo caimátaidiaioi. Daídíaioi:

—Ua afe izói judíoñedimacimo íaioimo fiени itifue méidollena jae Juzíñamui íaioimo fecade. Afemona daí jaca zíiñona cáaillinona íaioimo ite.

*Antioquíamo ite Juzíñamuimo ínote gairídino*

19 Esteban íaioi faa llezica, jíaie ínotimacimo duere finótatiaioi. Dáarie Fenicia éniemo botádiaioi; jíaimaci Chípreno Antioquía díga botádiaioi. Dinomo afe ñúfue dani judíuai namácimo llotíaioi. Jíaimacimo llóñega.

20 Mei íadi dáarie Chipre imaci, Cirene imaci díga ínotino Antioquía jófueмо dúcidiaioi. Dúciillano judíoñedínomо úritiaioi. Afemona Ocuíraima Jesús úrillauai íaioimo llote íaioi jíllloillena.

21 Afe llezica Ocuíraima ríino íaioimo ite. Mei daí aillo comini nano íaioi jaiai ínogafuiai fáicanocaillano Ocuíraima Jesumo ínotiaioi.

22 Afefue Jerusalemo ite ínotinomo jállecaide. Iemona afémaci Bernabé Antioquíamo orédiaioi.

23 Bernabé dúciillano, Juzíñamui cáimadogamací izói ciode. Aferi afémie iere ióbicaide. Nana íaioi llófuete; daide:

—Nana caí Ocuíraimana fáicanocaiñeno ie llogáfuemo jaícina omoi coméciri, —daide.

24 Afe Bernabé comécina figomie, Ñuera Joreño úicaigamie. Afémie Jesucristomо izire ínofiredimie. Daí aillo comini Ocuíraima Jesucristo íena náamatade.

25 Afe meífodo Bernabé Társomо Saulo júnuaide. Baillano Antioquíamo íena úite.



26 Dinomo daa fimona namónaze ínotino cígimo ñue fuitádiaillinoi. Afénomo aillo comini llófuete. Afe Antioquíamo ínotino como fueñe Crístomo jaináidinona ja mamécaiaioi.

27 Aféruillaído dámierie Juzíñamuimona llínoga uaillai lloráimaci Jerusalémona Antioquíamo jáizaide.

28 Afémacimona dámie Agábona mámeciredimie. Nana ínotino cígiri náidaillano daide:

—Nana bie éniemo aillo jamánomo júbie biite, — daide.

Ñuera Joreño ie comécimo llúamona afefue jino lote. Afe júbie daí bite Claudio illáimana illáruillaído.

29 Ie jira Antioquíamo ite ínotino comeci facádiaioi Judéamo ite ámatiai canóllena. Naga come íaioimo ite úcube díerize bai jónetiaioi.

30 Afe daí ñeta, Bernabé Saulo íaillinoído afe íraica úcube Judéamo ite ínotino illáicomínimo orédiaioi.

## 12

### *Santiago tíllafue Pedro llavéinafue diga*

1 Aféruillaído Juzíñamuimo jaináidino duere finóllena illaíma Herodes nane jénuaide.

2 Iemo Herodes Juan ama Santiago lloéfaiido titátate.

3 Afémie titátari judíuai iere íobidiaioi. Aféfuena Herodes fidínamona nane Pedro lláitajide. Ja birui iráizillarullai. Afe iráizillarullaído fáitañega pan güitíaioi.

<sup>4</sup> Pedro llaitada mei Herodes llavéracomo íena íbaicuaide. Dinomo cuatro díagüelli íena úiñotiaíoi. Naga afe güéllimona cuatro dígamírie llaiízíriraíni ite. Herodes comeci facade pascua rafue meífoto Pédrona jino comínimo cíotallena.

<sup>5</sup> Ie jira Pedro llavéracomo llaveda ñue úiñoga. Mei íadi Juzíñamuimo gairídino íemo izire Juzíñamuimo jicáoidiaíoi.

*Juzíñamui Pédrona llavéracomona jino oreca*

<sup>6</sup> Herodes Pedro jino comíni uíécomo óiacanarui uícodo, afe naio Pedro llavéracomo iníde ñue úiñoga. Nágafene onoi llóejina maiga úiñoraíma íaillinoi jaináogari iníde. Afe llezica jíáie úiñoraíma íaillinoi jino llavéraco naze úiñoide.

<sup>7</sup> Iemo Juzíñamui abí ímie raíre cíocaizaíbite. Afe llezica llavéraco ero úzerecaide. Juzíñamui abí ímie Pedro círaigí teténote íena cazítate. Cazítano íena daíde:

—Mai raíre náidacai, —daíde.

Iemona llóejillai Pedro ónoímona ana cocide.

<sup>8</sup> Afe Juzíñamui abí ímie íena daíde:

—Mai o círaigí tirínorafe jofo riire tirino.

O éiba ico jíta, —daíde.

Pedro daíí abí fínua llezica Juzíñamui abí ímie íena daíde:

—O emodo jítaca árerói jítada, cuedo bi, —daíde.

<sup>9</sup> Iemona Juzíñamui abí ímie óodana Pedro jaide. Afe abí ímie finócafue Pedro onóñedeza; nibai uafue nibai táínofue. Comeci facáoide: “Nícaí anado ciona izóidífuena cíódicue.”

<sup>10</sup> Mei íadi fuéñeide jónetímíemona bai jújicaillano báifeicana jónetímíemo dúcíaillinoi.

Ie mei afémiemona jújicaillano bai nazemo dúci zaidiaillinoi. Afe naze ibaira lloébani. Dúci diaillinoimo afe naze ibaira daingo tújicaide. Jino jáillano bai iodo daallu macá diaillinoi. Ie mei Juziñamui abi ímie ie fiénocaide.

<sup>11</sup> Iemona Pedro ñue onócaillano daide:

—Ico iere uáfueza. Juziñamui abi ímie cuemo orede Herodes cue llavéinamona cue zuitállena. Afe izói nana judíuai cue duere finóacanafuemona cuena zúitaibite, —daide.

<sup>12</sup> Aféfuemo comécillano Juan ei María jofomo jaide. Afe Juan jíáfodo mameide Marcos. Afécomo aillo comini Juziñamuimo iere úrillena gairí diaioi.

<sup>13</sup> Pedro afeco abi ibiri llaveca nazemo náidazaide. Náidaillano jofo ero imaci jírite. Iemona Ródena mámecirede ringoza bu billa daíllena eróizaide.

<sup>14</sup> Mei íadi Pédrona uáimona onóillano, nazena tuiñoño, ióbicaillano meine jofo aizida lluájide:

—Pedro nazemo dúcina, —daízaidi.

<sup>15</sup> Jira íena daidí aioi:

—¡Uáiritaidio!

Mei íadi afengo daide:

—Uáfueña ñue lloticue; uáfueña Pedro dinomo ite, —afengo daífoide. Mei íadi afémaci ínoño daidí aioi:

—Pédroñedeza; fia ie joreño, —daidí aioi.

<sup>16</sup> Mei íaioi úrioina llezica, Pedro nazemo nai jírioidi. Afe meífomo naze tuiñoda íemo érocaidí aioi. Erocaillano jacínaití aioi:

—Ua meita Pédrodio, —daidí aioi.

<sup>17</sup> Mei íadi ónoido:

—Mai omoi úriño, lliçai, —daide. Iemona Juziñamui llavéacomona ie zúitafue llote. Iemo íaioina daide:

—Bifue Santiágomo llujiri nana jíáie ámatiairi, —daide.

Ie meífodo jino jaillano oni jíáinomo jaide.

<sup>18</sup> Jae monáizaidemo, llavécano úiñorainimo aillo riire júfidotiaioi, mei onóñediaioiza; daidíaioi:

—Benó cai úiñoa Pedro ¿niné jaide? —daidíaioi.

<sup>19</sup> Herodes Pédróna íaioina jenótate. Iena íaioi baiñenamona, nana úiñorainimo jícájianode. Ie mei Herodes afeúíñoraini fatátate, Pedro íaioi botata jira. Afe mei Herodes Judéamona jae oni Cesaréamo jaiánite.

### *Herodes tíllafue*

<sup>20</sup> Jae Herodes Tiro comini Sidón comini diga íaioiri icírioides. Mei íadi afémaci dani comeci facádiaioi ie uiécomo cíozabillena. Illaíma Herodes jabóidillaíma Blasto. Afémiena fairíotarediaioi íaioiri ñue nabáirillena. Afémiedo ñue caímare illifue Heródemo jícádiaioi. Ua izire jícádiaioi, íaioi gülleniai, illaíma Herodes éniemona íaioi ófírena jira.

<sup>21</sup> Ie jira Herodes íaioimo úrizailirui íaioimo llote. Aféruimo ebírede illaíma iniroi jíitano illaíma ráiranomo ráinade. Daií ñiano are íaioimo úrite.

<sup>22</sup> Mei íemona comini caillíoicana íena daidíaioi:

—Bie úritimie fia cómeñedeza, afémie juziñamui, —daidíaioi.

<sup>23</sup> Afe llezica Juziñamui abi ímie Heródena iráretade Juziñamuimo ñúefuena nitátañena jírari. Iemona afe Herodes aiáide tílla.

24 Iadi Juzíñamui lloga uai oni jalléicaide. Afe jalléinamona náganerie fidídiaioi.

25 Bernabé Saulo diga íaillinoi afe úcube fíiaillano meine abido Jerusalémona bitíaillinoi. Aféillinoido bite dáamie, Juan dainámie. Dáamie mámece Márcona.

## 13

*Bernabé Saulo diga como fueñe nágagobiai llócaidiaillinoi*

<sup>1</sup> Antioquíamo ite gairíracomo nano niga uai jino llóraini ite naa llófueraniri. Afémaci mámeceiai: Bernabé, Simón, Cirene ímie Lucio, Manaén, Saulo dígamiediaioi. Simón jíáifo mameina Negro. Galilea illaíma Herodes Manaén diga, dáanomo comuídiaillinoi.

<sup>2</sup> Aféruillaído afémaci güiñeno Juzíñamuimo caimátaidiaioi. Iemo Juzíñamui Ñuera Joreño íaioina daide:

—Bernabé Saulo diga oni eneno nizeri, cue ocuica raa íaillinoi jetállena.

<sup>3</sup> Güiñeno Juzíñamuimo úrilla meífodo éinamaci íaillinoina ónoído ézicita, daidíaioi:

—Mai, ómicoi jairi, —daidíaioi.

*Orécamaci Chipre éniemo llófuiaidiaioi*

<sup>4</sup> Ie mei daii Ñuera Joreño íaillinoimo lluájillamona oni Antioquíamona Selúciamo jáidiaillinoi. Dinómona áillocaedo monaillai cigi záfedu Chipremo jáidiaillinoi.

<sup>5</sup> Salamina ígobemo dúczaidiaillinoimo judío llófueriracomo Juzíñamui uaillai jino llotíaillinoi. Afe llezica Juan íaillinoi canócana nabáizaide.

<sup>6</sup> Nana Chipre éniedo llócadiaioi. Iiraínomo Pafó jófuemo dúcǵidiaioi. Dínomo judío aima Barjesuna mámeciredimie baizájidiaioi. Afe aima táinona llófuefiredimie. Afémie daiífiredede:

—Juzíñamui dibénedo úriticue, —daide.

<sup>7</sup> Afe aima ocuídillaíma Sergio Paulo dígamie dáanomo itíaillinoi. Afe Sergio ráfueña ñue onódimie. Aféllaíma Bernabé Saulo díga jíiritade Juzíñamui uailaí cacáillena.

<sup>8</sup> Mei íadi afe aima Bernabé Saulo díga llogáuai uáitano zanode. Ocuídillaíma ínnuana aima rairuácade. Afe aima jíáífodo mameína, Elimas.

<sup>9</sup> Saulo jíáífodo mameína Pablo. Afe Pablo Ñuera Joreño úicaigamie. Aima dánana cacáillano íemo riire érocaillano

<sup>10</sup> daide:

—Jíáíma jífuetimiedio! Íaiba Taife jítódio. Nana ñúefuíaína uáitaraimadio. ¿Ñibái mei ñuera Juzíñamui lloga uai oní cáitano féitaacadío? ¿Ñibái mei o táinofuíaína fáicanocaiñeno jino llóllodío?

<sup>11</sup> Mei jabe Ocuíraíma Jesucristo riire ona duere fínoite. O ui nírite. Nano nígarui jítoma egáíñuana cióñeitio, —daide.

Daií dánamona ie ui niríbicaide. Jae jítídine taino mellécade. Dámie íena ónoído jainátacana úite, ie ui cióñena jira.

<sup>12</sup> Ocuídillaíma Sergio Paulo áfena cióillano, llogáuaina ñue ínnote, mei Juzíñamui llófueinamo jacíruioicana aféuaimo ñue eroide.

*Pablo Bernabé díga Pisidia éniemo ite Antioquía jófuemo jáidiaillinoi*

13 Pablo ie nabáñiaí diga nocaedo Pafó jófue mona jáidiaí. Dínomona Panfilia éniemo ite Perge jófue mo jáidiaí. Afé nomo Juan íaíoina fiénocaillano abido Jerusalemo jaide.

14 Pablo ie nabáñiaí diga afe Pérgemo dúcillano, Pisidia éniemo ite Antioquía jófue mo arido jáicina jáidiaí. Dí nomo ocózinallaruímo llófueriraco eromo ráinazaidiaí.

15 Ocuícafuiaí illánicomona fueñe facádotiaí. Ie mei Juziñamui uai jino lloránicuaímona facádotiaí. Afe facádua fúillamona llófueriraco illaini íaillinoína daídíaí:

—Amatíai, ómicoi cacai. Omicoi llóiacagafuiaí íadi comíni cacáilleza jino ómicoi llóoiri, —daide.

16 Mei íemona Pablo náidacaillano, ónoído comíni llicaitade. Afe mei íaíoína daide:

—Israel nairai, omoi cácarei. Daje izói Juziñamuina jacíruoidino, omoi cácarei.

17 Israel nairai Juziñamui cai jái airagima nana íaíoína nize de. Iemona Egipto éniemo ónoñegamacina íaíoí illa llezica, aillo náiraina afé mie jebuitate. Afe mei aféniemona dama íemo ite ie ríinodo íaíoína oni ote.

18 Ua mei Juziñamui comeci jitáinafue nai figo fuitáñediaí, mei íadi afe táizicimo cuarenta diga fimona Juziñamui íaíoína zófeñeno úíñote.

19 Afe mei Canaán éniemo ite siete nairai Juziñamui niné táinocaitaga, afe énie cai jái airagima maiñóllena.

20 Afe meífodo diga ríire jicánoraini cuatrocientos cincuenta fimona ocuícíaí. Ua ocuícíaí uai llóraíma Samuel illáruimo.

21 Ie mei íaioina ócuite ríillaima jicádíaiói. Jira Juzíñamui Saúl cuarenta fimona afémaci illáimana jóonete. Afe Saúl Cis jitó, Benjamín nairai ímie.

22 Afe mei Juzíñamui Saúl na oni orede. Oni óriano David illáimana ie meífomo jóonete. David ífuedo Juzíñamui úrite; daide: “Cuena íóbitadímie David baiticue. Afémie Isaí jitó. Nana cue jitaiga raana jetáfirede,” daide.

23 Afe David cómogimamona Jesús jococa. Afe Jesús Juzíñamui uícomo daináuai izói Israel nairai jíllotaitimiena íaioi cígiconi Juzíñamui comuítate.

24 Jesús comínimo nai abí báifitañenia Juan nana Israel náiraimo jino llote; daide: “Nana omoi báutizaredíomoi. Omoi comeci ífuiái mai ñúefuena méidoziri.”

25 Juan uícodo llófuiailafue fúiacademo, daide: “Omoi comeci fácamiēñedicue. Jamáimiedicue. Mei íadi cue meífodo bitímie cue baimo baitadímie. Afémie idai ico igaina zuitánidicue, (jiba jamáimiedicueza),” daí Juan daide.

26 ‘Cáimaci, omoi cácarei. Abraham nairai urúcidíomoi; mai cácarei. Omoimona Juzíñamuina jacírioidino, omoi cácarei. Bie ñue jíllotaitíuái ómoie.

27 Mei Jerusalemo itino íaioi illáiniri Jesús nahí ífueña fidíñediaioi. Daje izói naga ocózinailaruimo facádoga uai llóraini llogáuailaina cacádíaiói, mei íadi aféuái daináfuena onóñediaioi. Aféuailaina íaioi onóñenado Jesús duere finótatíaiói. Daí jaiái ninomo mamécafuiái afémiemo fuitádíaiói.

28 Afe Jesús fatátallífuena due jiza jaca baiñediaioi; mei íadi Pilátomo ie fatátallena jicádíaiói.



29 Afe mei nana afémiedo Cuegáuailaimo jaiiai ninomo lloga uaillai fuitádiaioimo, crúzmona íena ana otá íena raiájidiaioi.

30 Mei íadi Juzíñamui tíllanomona íena meine cáatate.

31 Afe mei diga irui íllamona Galiléamona Jerusalemo ie diga jáicadinomo Jesús íaioimo cíocai. Afe iedo jáicadino ja birui comínimo afémie llócaigafue llotíai.

32 Juzíñamui cai jáiairagimamo uícomo llogáuaido úrite. Nñéfuedo úrite. Ja birui afe ñúefue ómoimo llotícai.

33 Ja cai bie afémaci cómogimadícai. Ie jira afémie uícodo llogáuai ja caimo fuilla. Afe uai daide: “Jesucristo tídena meine abido cáataticue.” Daí rúanicomo cuega; segundo ruamo cuega; llote: “Cue jítodio. Birui ona cáataticue.”

34 Diga ícaiño Juzíñamui ie cáailífueña llote. Ua tíllanomona íena cáataite, ie íeizi jaca ninomo rífaíñeillena. Juzíñamui aféfuena jaiiai ninomo Cuegáuailaido daide. Afe uai ie jító Jesuna daide: “Davidmo uícodo cue uafue lloga ñue cáimafuiai nahí omo jainaide.”

35 Ie jira rúanicomo jíáiruado daide: “O izíruiga ñue canódime íeizi ráiruitio ie rífaíñeillena,” daide.

36 Afe David ie llezica igímana ñue canode, Juzíñamui ie ocuilla izói. Afe meífomo David tíllano ie uzútiai cígimo íena raiájidiaioi. Iemo ie íeizi rifaide.

37 Mei íadi Juzíñamui cáatagamie íeizi rífaíñede.

38 Cáimaci, omoi cacai. Afe bie rífaítañeno

cáatagamie Jesudo omoi fiénidifuiái iba óñeillifue ja ómoimo jino lloga.

<sup>39</sup> Afémiedo nana íena ínotino nana íaíoi fiénidifuiáimona dóficaitiaíoi. Mei íadi Moisés ocuícáfuiái caí fiénidifuiáimona caina zuitáñede, mei cuinaca izói jaináidícaí.

<sup>40</sup> Ñue abí omoi rairuiri uai jino llórainí cueda mamécáfuiái ómoimo báíñeillena. Afe mamécáfue daíde:

<sup>41</sup> Ínoñeno uáitaoidino, omoi cácareí; cacáillano áferi omoi jacínaificairi.

Iemona niné táinocaitiomozá, aféruillaído jamánomo ñue jácí fue cue fínua jírari.

Aféfueña dámie ómoimo lloía, íadi áfena ínoñeitiomozá, —daíde.

<sup>42</sup> Pablo íe nabáíñiaíri judío garíracomona jino jáidiaíoi. Jáidiaíomimo judíoñedíno jocócaiaíoi íaíomimo aféfueña meine abído íaíomimo llúaíbillena jicádiaíoi. Afe úireite ocózinairuimo meine llúaíbillena jicádiaíoi.

<sup>43</sup> Afe llófuerriracomo íaíoi gairilla záillamona aillo judíuai Pablo llogafue jíeruitiaíoi. Iemona Pablo Bernabé díga íaillinoído jáidiaíoi. Daje izói aillo judío onóigafueña jeire otino íaillinoído jáidiaíoi. Pablo, Bernabé díga íaíomimo llote:

—Mai Juzíñamui caina izíruillafuemo nágarui aféfuemo ñue omoi comécíri, —daíde.

<sup>44</sup> Siete dígarui íllamona ocózinairuimo, nana jofue comíni dáanomimo gairídiaíoi, Juzíñamui uailái cacáreillena.

<sup>45</sup> Mei afénomimo aillo comíni gairíllana judíuai cíóillano, úrioina izói itíaíoi. Afénomimo Pablo uailái uáitano íena báíñotiaíoi.

46 Ie mei Pablo Bernabé diga abi mámano íaiõina daide:

—Judíuai, bie Juzíñamui uai fueñe ómoimo lolle iere jitárede; mei íadi ja aféfuena óiacañediõmo; afe ícoinia ziiñona cáallinona llínoñeitiõmo. Ie jira ja birui judíoñedinomo jáiticaí.

47 Mei jira Juzíñamui daií caina llotátate; Juzíñamui daide:

Cuedo náiraina fidítaramana o mamédicue.

Nana énie íraino imaci ñuera jíllonafue llóramana íitio.

48 Aféfuena cacáillano judíoñedino ióbicaidiaioi. Iaiõí úrilla fueñe táinia llezica:

—Juzíñamui uáillaina jamánomo ñuera, — daidíaioi.

Afémacimona aféfuena ínotino aillo ite. Ziiñona cáatatinona llínoitínona mamécaiaioi.

49 Iemona Juzíñamui uaillai nana afe énie náiraido jae ñue jalleide.

50 Afe jófuego Moo Juzíñamuimo izire jaináiacade ringóniamona dáingorie ite. Afe ringóniai illaingo izóidingotiai. Judíuai afe ringóniamo úrite, Pablo afe jófuegona oni oréllena. Daje llezica judíuai afe jofue illáinimo daje izói úrizaidiaioi. Iaiõí comeci fienu finua jira, jáie Páblona duere finóacanafue comuízailla, Bernabé diga. Afe jófuegona oni íaillinoi orédiaioi.

51 Afe ória meífodo afe íaillinoi eiba ico íaie íaioimo teténote; afe teténuafue baimaci comeci íaifuaímo íteza, daiíacade.

Daií ñiano Iconio jófuego jáidiaillinoi.

52 Mei íadi Jesús llogáfuego ínotino iere ióbioidiaioi. Afe llezica Ñuera Joreño úicaigaiõi.

# 14

## *Pablo Bernabé diga Icóniomo itíaiillinoi*

<sup>1</sup> Icóniomo dúcillano judío llófueriracomo daane jofo jáidiaillinoi. Dinomo jamánomo ñue úritiaillinoi. Afemona aillo judíuai Jesumo ínotiaioi; judíoñedinomona daje izóí aillo afefue ínotiaioi.

<sup>2</sup> Mei íadi ínoacañede judíuai jíáie judíoñedino comeci íáire finódiaioi. Daí Páblona Bernabé diga éoicana eróidiaioi.

<sup>3</sup> Ie jira dinomo diga irui ñue jáicina jacíruiñoeno Ocuíraima Jesús mámecido llófuetiaillinoi. Afe llezica Juzíñamui dama ie ñue ríino íaillinoimo fecade. Afemona onótate ráaniai cíorainina ráaniai diga finódiaillinoi. Aféniaido íaillinoi lloga Juzíñamui caina izíruillafue Juzíñamui ñue comínimo fidítate.

<sup>4</sup> Mei íadi jofue comini bózietaidiaioi. Dáarie judíuai dibénemo jaináiacadiaioi. Jáímaci Pablo Bernabé diga dibénemo jaináiacadiaioi.

<sup>5</sup> Afe meífodo ínoacañede judíuai jíáie judíoñedino diga naa íaioi illáiniri noficiaina íaillinoi níjiacadiaioi. Daí íaillinoína duere finóacadiaioi.

<sup>6</sup> Mei íadi aféfuena orécamaci uícodo fidídiaioi. Fídiano Pablo Bernabé diga Licaónia éniemo botáidiaillinoi. Dinomo ménagobemo macáoidiaillinoi, Litra Derbe diga naa afe áinori itíniaido.

<sup>7</sup> Dinomo ñue jíllonafue llotíaillinoi.

*Lístramo Pablo noficiaina níjidiaioi*

8 Iemo Lístramo macáñede aidaima ite. Ie jocóinanomona tizitaite izói macáñede. Jaca ie macánina jira dinomo ráiide.

9 Afémie Pablo daináfuego ñue cacáreide. Iemona Pablo íemo érocaillamona, tizitaitimie ñue ínuana Pablo comécido fidide. Ie ínuamona afémie jíllorede.

10 Iemona Pablo íena riire daide:

—O ídaido caifo jaícina naidai, —daide.

Afénomona afémie tícacaillano náidacaide; náidacaillano como fueñe mácajide.

11 Daií Pablo finócafuena cíoillano, nana comini Licaónia uáillaído caillíoicana daidíaioi:

—¡Juzíñamuillai jamai comini izói ana cai cígimo billa! —daidíaioi.

12 Bernabena Júpiter juzíñamui daidíaioi; Páblona Mercurio juzíñamui daidíaioi, jamánomo ráfuiái llotímiena jira.

13 Júpiter gairíraco naze fueri ite. Afeco úiñotimie juráretuai atide naa amena záfiaiai diga. Afémie naa comini íaillinoimo cáimadoacadiaioi. Juráreto fáillemona íaillinoína íóbitacadiaioi.

14 Mei íadi orécamací Pablo Bernabé diga fidídiailinoi. Aféfuena fidínamona, inícuero cúatacaillano, comini cígimo jáidiaillinoi. (Afe iniroi cuata daíacade íaillinoi comeci jamánomo ríicaide.) Jaillano caillíoicana daidíaillinoi:

15 —¡Nana omoi, cácarei! ¿Ñibái bie izói finódiomoi? Coco omoi izói jiba cómedicoco. Ñúefue ómoimo atídicoco. Afe bie tánofuiai omoi fáicanocaillena lluáibitícoco. Fáicanocaillano, ua caade Juzíñamui dine omoi jáillena daií

lluáibiticoco. Afémie mona, bie énie, monáillai dieze finode naa íaioimo itínuaíari.

<sup>16</sup> Jáiairagima illa llezica nana nairai íaioi comeci jitáillafodo macáoidiaioi. Aféruillaído Juzíñamui íaioina lletáñede.

<sup>17</sup> Mei íadi Juzíñamui ñúemie ífuená ñue ómoimo finócafuiaído ómoína fidítafirede. Ua ñue nocina ómoimo biítafirede. Nana aménaiaí llizíllajiaína ómoiri llizítate. Afedo omoí güille ñue ite, omoí comeci íóbillena, —daí úrite Pablo.

<sup>18</sup> Mei nana afe daínáuaillai daína íadi, nana comini íaillinoíri juráretuai nai fáiacadiaioi. Íadi ícoimo afétuai íaioi faana féitatadiaillinoi.

<sup>19</sup> Afe mei Antioquíamona Icóniomona dáarie judíuai dúcizaide. Listra comínimo júfiduano Pablo fállena mamédiaioi. Iemona Páblona nofíciaina níjidiaioi. Níjiano jofue jinófenemo íena zonóicaidiaioi. Comécido daídíaioi: “Níbai tíide,” daide.

<sup>20</sup> Mei íadi ínotino íemo gairídiaioimo Pablo náidacaillano meine jófuemo jaide. Afe jítiramoidiruido afémie Bernabé diga Dérbemo jáidiaillinoi.

<sup>21</sup> Dínomo jíllona uaillai jino llotíaillinoi. Afe jófuemo aillo comini Jesumo ínotiaioi. Afe mei meine abído Lístramo, Icóniomo íemo Antioquíamo dieze jáidiaillinoi.

<sup>22</sup> Nana afénuaí jofue ínotinuaí ñue caimare íociretadiaillinoi. Ñue jaícina ínuafuedo íaioi jáillena llófuetiaillinoi. Iemo íaioína daídíaillinoi:

—Juzíñamui illáimana illíruimo cai jáillena, aillo afe facátafuaí iere caimo jitáirede, —daide.

23 Afe llezica naga gairíracuaimo ócuite illáinina mamédiaillinoi. Afe mei güiñeno Juzíñamuimo iere úrilla meífomo nana como ocuidillaínina mamécamiái Juzíñamui úiñuamo jónetiaillinoi, Juzíñamuimo ñue íaioi ínua jira.

*Pablo Bernabé diga íaillinoi nano billánomo abido jáidiaillinoi*

24 Afe meífodo Pisidia éniemona jaillano Panfilia éniemo dúcidiaillinoi.

25 Perge jófuemo jillonafue llotíaillinoi. Afe llua meífomo Atalia jófuemo jáidiaillinoi.

26 Dinómona Siria éniemo ite Antioquía jófuemo nocaedo ruica jáidiaillinoi. Naui afe jófuemo ite ínnotino íaillinoína Juzíñamuimo jónetiaioi. Daií finódiaioi jiáie nairai ñúefuena llófuiaillena. Ja birui afe táijina fuilla.

27 Antioquíamo dúcidiaillinoimo, nana ínnotino Juzíñamui garíracomo gairídiaioi. Gairídiaioimo Pablo nana Juzíñamui íaillinoido finócafuiai jino íaioimo llote. Afe llezica judíoñedinomo Juzíñamui ñue jilloille io como túiñua llotíaillinoi. Afe izói áfemo afémaci ínorediaioi.

28 Afe meífomo Pablo Bernabé diga ínnotino cígimo are diga irui itíaillinoi.

## 15

*Ínnotino illaini Jerusalemo gairídiaioi orécamaci diga*

1 Aféruillaído dáarie iññiai Judea éniemona Antioquíamo ite ínnotino llófuiabite. Iaioina daidíaioi:

—Moisés ocuica íiza bacano icoi quétafuena omoi finóñenia, jílloñeiti omoi, —daídíai oí.

<sup>2</sup> Ie jira Pablo Bernabé diga íai oímo riírede uáillaido úritiaillinoi aillo júfiduafuiai diga. Iemona Antioquíamo ite ínotino Pablo, Bernabé, jíaimaci diga nizédíai oí, Jerusalemo ite orécamacimo aféfuena jicánuaillena; daje izói Jerusalemo ite Juzíñamuimo gairídino illáinimo jicánuaitiai oí.

<sup>3</sup> Mei daí nízia mei Antioquía ínotino afe nizécanona orédíai oí. Afe oréinamona, Fenicia éniédo Samaria énie diga jáidíai oí. Jaillano judíoñedino íai oí jaiai llóinauailai féitano Juzíñamui díbénedo jáillafue llotíai oí. Nana ámatiai aféfuena cacáillano iere ióbidíai oí.

<sup>4</sup> Pablo Bernabé diga Jerusalemo dúcídíai oímo, Juzíñamuimo gairídínodo caimare uáidogaiaillinoi. Daje izói orécamaci naa gairídino illáiniri íaillinoi na caimare uáidotíai oí. Dinomo Juzíñamui íai oíri finócafui ai íai oímo jino llotíai oí.

<sup>5</sup> Mei íadi fariséuaimona dáarie ínotino caifo naidáillano íai oí na daide:

—Ínote judíoñedíno afe cai izói quetáinafue jítáirede. Afe emódomo Moisés ocuícáfue ñue ínollena jítáirede, —daídíai oí.

<sup>6</sup> Iemona orécamaci naa ínotino illáiniri aféfuena ñue onóillena gairídíai oí.

<sup>7</sup> Aféfuiai are íai oí júfídua meífomo, Pedro caifo náidaillano daide:

—Amatai, omoi cácarei. Naui Juzíñamui cuemo finócafue na onódi omoi. Juzíñamui omoi cígimona cue nizeda judíoñedíno cígímo orede. Ua cuena



nizede afémacimo ñue jílloñafue uaillai cue llujállena; áfemona afémaci aféfuiaina ínotiaioi.

<sup>8</sup> Cai comécina onode Juzíñamui cuemo llote: “Afe judíoñedinona ñue líinoiticue,” daide. Afemona Ñuera Joreño íaioimo fecade caimo ie fecá ízoi.

<sup>9</sup> Juzíñamui cáimona afémacimo jiáifodo finóñede. Iaiói ínuado íaioi comeci íaifue Juzíñamui oni dote caie ie dua ízoi.

<sup>10</sup> Mei birui ¿níbái mei Juzíñamui finócafue jeire oñédimoi? ¿Níbái mei baie ínotino jamánomo riire ocuácadío? Afe ocuínafuena cai, cai jáiairagima diga finónidicai.

<sup>11</sup> Mei íadi jiáifodo ínoticai, cai jílloillena. Ocuíraima Jesús caimo dúecaide. Afemo cai ínuamona ibáñeno jíllobicaidicai. Afe izói judíoñedino Jesumo ínuamona ibáñeno jíllobicaidiaioi, —daide.

<sup>12</sup> Mei jira afémaci líicaidiaioi, Bernabé Pablo diga llogáfuemo cacáreillena. Nana judíoñedino cígimo Juzíñamui finócafuiái llotíallinoi. Dinomo íallinoido uaido finoca onótate raa ciórainina raa diga Juzíñamui finode. Aféfuiái jino llotíallinoi.

<sup>13</sup> Iallinoi llogafue fúillamona, Santiago daide:

—Amatiai, cue dáinamo cácarei.

<sup>14</sup> Simón Pedro jae Juzíñamui judíoñedinona como fueñe íaioina izire canóñafue caimo jino llote. Juzíñamui jae judíoñedimacimona dáazie como níziaibite dama ie náiraina.

<sup>15</sup> Afefue ua Juzíñamui jaiai uai llóraini ciegáfuiaimo jaícina dájena jóobide. Afe Ciegáuai

daide:

<sup>16</sup> Bifue mei, meine bíiticue.

Ua David jaiiai nairai, júdaizitaga íadi, meine dáaziena jofo gairítaiticue.

Aféziemona due fiébidino jaiiai íaioi ízaina izói meine jebuítaiticue.

Ríinidimaci jofo dáanomo otátaiticue, ñue ríirediziena íaioi íllena.

<sup>17</sup> Afe daíí fínuaíbiticue nana jáíamaciai Juzíñamuimo comeci fácajano íaioi ñnollena.

Daíí fínoíticue nana cuena náamarede judíoñede náiraiiai cuemo comeci facada ñnollena.

<sup>18</sup> Ua jaiiai ninómona aféfuiai onótate Juzíñamui daíí daide.

<sup>19</sup> ‘Te jira bifue lloticue. Afe como Juzíñamuido jáiacade judíoñedino mai, cai íaioina áifedoñeiticai. Jae íaioi jaiiai ñnoga tánofuiai fáicanocaidiaioi Juzíñamui llogáuaina íaioi ñnollena.

<sup>20</sup> Due llétafue íaioimo cai cúellena ja dieze figo baite. Afe bífuiai íaioimo llóiticaí. Mai jánaraimo fia fecaca güíllena omoi jetáñeno iri. Mai jiruífuemona abi omoi rairuiri. Dama áiredimie ie ai diga illa ñuena. Mai cimoina cigínoga rílleniai riñeno iri. Afe izói coróbaitaga rílleniai riñeno iri. Daje izói díena omoi jíroñeno iri.

<sup>21</sup> Daíí judíoñede como ñnotimacimo lletádicaiza, nibai nanómona nana jófuemo Moisés ocuícáfue llófueraini ite. Naga ocózinaillaruido llófueriracomo afe Cuegáuai jino facádotiaioi. Ací dino Santiago llote.

<sup>22</sup> Iemo orécamaci gairídímaci, nana íaioi illaini diga, “Jii,” daídíaioi. Iemona íaioi cigímona

dámierie nizéllena maméritiaioi, Antioquíamo oréllena Pablo Bernabé diga íaillinoi nabáillena. Judas dainámie nizédiaioi; afémie jáífodo mameina Barsabás. Daje llezica Sílasna nizédiaioi. Afe íaillinoi ámatiaí cígiri illaíma izóidiaillinoi.

<sup>23</sup> Iaillinoído ciegabe orédiaioi. Afébemo daide:

“Cai Antioquíamo ite judíoñede ámatiaímo uai orédicaí. Afe izói Siria éniemo ite ámatiaímo, Cilicia éniemo ite ámatiaí dieze nana ómoímo uai orédicaí. Nana orécamaci, Juzíñamuímo gairídino illaini, benó ite ámatiaí diga, ómoímo uai orédicaí.

<sup>24</sup> Cáímona ómoímo nauí bitino finócafue jae fidídicaí. Caimo lloñeno oni jáidiaioi. Cai óreñegaiaioi. Dani imaci uáillaído jae omoi ifoci írínuaídiaioi. Daíí ómoína áfeduaídiaioi. Omoi bacano icoi quetállifuaí lluájidiaioi; jáíe Moisés llogáuailai ómoímo ocuízaidiaioi.

<sup>25</sup> Ie jira cai comécido ñue jaide cai cígimona mena come mamedá ómoímo oréllena. Aféfuena nana jéruiticaí. Bie nizécaillinoi Pablo Bernabé diga omoi éroizaíbitiaioi. Pablo Bernabé diga cai iere izíruiga ámaillinoi.

<sup>26</sup> Cai Ocuíraíma Jesucristo ñúefue íaillinoi llua ícoína, jaci cácatagaillinoi.

<sup>27</sup> Daíí Judas Silas diga ómoímo orédicaí. Aféillinoi ómoímo jofo úritiaillinoi nana bífuaí jino ñue llóllena.

<sup>28</sup> Mei cáímona ñue cioide; afe izói Ñuera Joreñomona ñue cioide riírede rafue ómoímo cai mámeñeíllena. Dama jitáiredí fue mámeíticaí.

<sup>29</sup> Jánaráímo fia fecaca rílleniána omoi riñeno iri. Daje izói díena jiroñeno iri; cimoina cigínoga

ríllena omoí riñeno iri. Nana jiruífue mona abí omoí rairuiri. Dama áiredimie ie ai diga illa ñuena. Bífuiamona abí omoí rairuíadi, ñue ítiomoi. Jae ñie.”

<sup>30</sup> Daí Jerusalemo ite ínotino íaioina Antioquíamo oré diaioi. Antioquíamo dúcidiaioimo, dinomo ite ínotino dánomo gairítatiaioi afe rabe fecállena.

<sup>31</sup> Afebe ámatiai facáduamona iere íobidiaioi. Ua afe caimare llétafueri íobidiaioi.

<sup>32</sup> Judas Silas diga Juzíñamuimona oga rafue jino llórediaillinoi. Ie jira íaillinoi uáillaído afe ámatiai ñue náirecaitadiaillinoi. Afe llezica íaioina ñue comeci firazitadiaillinoi íaioi caimare íllena.

<sup>33</sup> Dinomo diga irui íllamona, Antioquíamo ite ámatiai comeci jacínaiñenafuedo íaioina jáitatiaioi. Daí íaioina uáidonocaidiaioi meine íaioi orécamací diné jáillena.

<sup>34</sup> Mei íadi Silas Antioquíamo fiébicaillena mamérite.

<sup>35</sup> Afe izói Pablo Bernabé diga Antioquíamo fiébidiaillinoi. Afe meí fodo, aillo jíáie llóraini diga, llófueritiaioi. Cai Ocuíraima Jesucristo uaillai jino llotíaioi.

*Pablo dánomo nane jáizaide ñúefue llujállena*

<sup>36</sup> Diga irui illa meí fomo Pablo Bernabena daide:

—Mai dánomo meine coco jai, nauí coco llófuegano coco uáiduaili. Nana íaioi jófuedo Jesucristo uaillai llófueticoco, ie jira afémaci nie izói itíaiioiza coco eróizai, —daide.

<sup>37</sup> Bernabé Marcos úiacade íaillinoi jaille dine. (Marcos jíáifodo mameina Juan.)

<sup>38</sup> Mei íadi Pablo íena úiacañede, nauí Panfilia éniemo íaiõina fiénocailla jira. Iemo íaillinoi táijicanado jáiñede.

<sup>39</sup> Afefue jamánomo íaillinoi riire júfidua meífodo, dáríe enénorie oni jáidiaillinoi. Ie mei Bernabé Marcos uite. Daíí ñiano, nocaedo Chípremo jáidiaillinoi.

<sup>40</sup> Afe llezica Pablo dama íeiena Silas nizeda ote. Nízia mei, afénomo ite ámatiai Juzíñamui íaillinoi izíruillena caimare jicádiaioi, daje izói Juzíñamui íaillinoina nabáirillena. Daíí jica meífomo, oni jáínomo jáidiaillinoi.

<sup>41</sup> Siria énie, Cilicia éniedo jáidiaillinoi. Afénomo Juzíñamuimo gairide ámatiai náicaitaídiaillinoi.

## 16

### *Timoteo Pablo Silas diga nabáizaide*

<sup>1</sup> Derbe, Lystra jofue diga dinomo Pablo, Silas diga dúcíaillinoi. Afénomo daa Juzíñamuimo ínotímie baizájidiaillinoi. Ie ei judíuaimona Juzíñamuimo ínotingo. Mei íadi ie moo griego ímie.

<sup>2</sup> Lystramo ite ámatiai afémiedo ñue úritiaioi naa Icóniomo ite ámatiairi.

<sup>3</sup> Pablo Timotéona ie nabaina úiacade. Ie jira ie bacano icoi quetátate, íaiõi jáillinomo ite judíuai afémiedo comeci fiene fácañeillena. Mei afémaci ie moo griego ímienana ñue onódiaioiza.

<sup>4</sup> Nana íaiõi jáillado ite jófuedo lletáinafue llotíaioi. Afe lletáinafue Jerusalemo ite orécamaci ocuide éinamaci diga llotátatiaioi.

<sup>5</sup> Daií Juzíñamuimo garídímaci íai*oi* ñnuafue ñue oni mónaioicaide. Afemona nágarui aillo jebuíoicaidia*oi*.

*Pablo Macedonia ímiena nícai anado ciona izói ciode*

<sup>6</sup> Asia éniemo Ñuera Joreño ñúefue íai*oi* lluájillana ráiruide. Ie jira Frigia énie, Galacia énie diga afe éniemo oni lluájidia*oi*.

<sup>7</sup> Ie mei Misia énie fuédamo dúcidia*oi*. Dinómona Bitinia éniemo jáillana comeci facádia*oi*, mei íadi Jesús Joreño dinomo íai*oi* jáillana rairuide.

<sup>8</sup> Ie jira jica Misia énie fuédado jáidia*oi*. Dinómona Troas ígobemo jáidia*oi*.

<sup>9</sup> Dinomo afe nai*o* Pablo nicáirilla izói ciode. Afe nicáirilla izói Macedonia énie ímiena ciode. Afémie náidaicana Páblona izire jicade; daide: “Bené Macedóniamo cai cánuaibi,” —daide.

<sup>10</sup> Daií Pablo nícai anado izói cionamona Macedóniamo cai jáillena mamériticai. Jae Juzíñamui cai jíirillaza ua onódicai dinomo ñúefue cai lluájillena.

*Pablo Silas diga Filipos jófuego illafue*

<sup>11</sup> Iemona Tróasmona nocaedo monaillai cigi idu Samotráciamo jaícina jáidicai. Ie jítiramo Neápolismo dúcidicai.

<sup>12</sup> Dinómona Filipos jófuego jáidicai. Afe Macedonia fueda Filipos jamánomo jalléidigobe. Romano comini afe jofue nauí nitátatino. Dinomo nano nígarui iticai.

<sup>13</sup> Afe ocózinaillarui afe jofue jinomo jáidicai. Ua imani fuemo íai*oi* Juzíñamuimo iere

úrizaifirenanomo jáidicai. Dinomo ráinaillano ñúefuedo gairídingotiaimo úriticai.

<sup>14</sup> Aféngotiaimona daango Lidia mámeciredingo. Afengo Tiatira jofue ingo. Afengo jáire jítirede ñuera iniroi fecáraingo. Afe ringo Juzíñamuimo áinozoidingo Juzíñamuimo caimare úrillaena. Iemona afengo afe ñúefuena cacáreacade. Jae Juzíñamui afengo comécina tuiñode, Pablo llogáuaillai jeire óllena.

<sup>15</sup> Afengo naa ie comíniri báutizagaiaioi. Báutiza mei izire jicada caina daide:

—Comeci anado omoi daíadi, Juzíñamuimo ua ñnotingodicue, mai cue jofomo omoi bi, —daide.

Iemona aféngodo jáidicai.

<sup>16</sup> Afe Juzíñamuimo úrizairanomo cai jailla llezica, fiénidena jóriairede ringoza baizájidicai. Afe fiénide joríaido come ónoñega éicina raire onófirede. Afengo izire jeruícango. Afe eici báillado aillo úcubena ie náamatiai íena ófirediaioi.

<sup>17</sup> Afe ringoza Pablo diga caido jáizaide. Caillícana jaide; daide:

—Bimaci caifoide Juzíñamuimo dúidiaioi. Omoi jílloille io ómoimo llotíaioi, —daide.

<sup>18</sup> Diga iruillai daí afengo caillide. Are ie caillícana ícoimo, Pablo zefuínaite. Meine gírecaillano aféngomo ite fiénide jóriaína daide:

—Jesucristo mámecido aféngomona ona oni orédicue, —daide.

Daí daína llezícamona afe fiénide joríaí aféngona fáicanocaillano jaide.

<sup>19</sup> Afe ringoza náamatiai daí ie finóinana ciódiaioi. Iemona:

—Jae aféngodo úcubena óñeiticai, —daidíaiói.

Daíí danano Pablo Silas diga llaítada ríimaci uícomo aillo gairírabirimo uitíaiói.

20 Riire jicánorainimo íaillinoína izájidiaíói. Daidíaiói:

—Bíaillinoi, judío ímíai cai jófuego comínina ríicaitaíbite.

21 Caimo lluíbigafuíaina jeire ónidicai. Afe izói cai ínidicai, cai bie románodicaiza, —daidíaiói.

22 Iemona afeno comíni íaillinoímo ríicaidiaíói. Riire jicánoraini íaillinoi inícuirona duiñoda rázido íaillinoína fatátate.

23 Iaillinoi aillo fáina meífomo, llavéracomo íaillinoína llavíaidiaíói. Afe llavéraco úiñoraíma riire ocuídiaíói íaillinoína ñue rairuúllena.

24 Afe riire ocuínafuena cacánamona llavéraco úiñotímie llavéraco jamánomo jofóidícomo íaillinoína orede. Dinomo come idai jíitara íredamo íaillinoína jíitate.

25 Afe naio dáaferuimo Pablo Silas diga Juzíñamuimo úrillano Juzíñamui ruai rotíiaillinoi. Afécomo jíáie llavécamiíai afe rúana cacádiaíói.

26 Iaillinoi rua llezica afe énie raíre iere riire docáiricaide. Nana afe llavéraco jíaillirai izói riire mozide nofíicai jaidínocaiga izói íficaide. Afe llezícamona llavéraco náziai túicoizite. Afemona nana llavécamiíai llójeuai tícoizite.

27 Iemona llavéraco úiñoraíma cazide. Cazídemo jae nana náziai túienana cíode. Comecí anado daide: “Nana llavécamací jae níbai botádiaíói.” Ie jira lloefai ota ie abi faitáacade.

28 Mei íadi Pablo íemo caillide:



—¡Dama o abina fiēni finóñeno iri; nana benó itícaiza! —daide.

<sup>29</sup> Mei jira llavéraco úñoraima bobaie jicade. Iemona Pablo diné aizícana bite. Dinomo afe jágieri abi cuidírioicana, Pablo Silas diga íaillinoi anamo dújude.

<sup>30</sup> Ie meífomo íaillinoina jino jiáinomo uillano, jicánote:

—Pablo, ¿cuemo ite fiénidifuemona cue jílloillena nie izói íitícue? —daide.

<sup>31</sup> Jira aféillinoi uai ote:

—O jílloillena cai Ocuíraima Jesucrístomo ñino. Iemona o dama jíllobicaitio. Daje izói o ai nana o úruiai diga ínuamona jíllobicaitiaoi, —daide.

<sup>32</sup> Iemona Juzíñamui uallai íemo llotíaillinoi naa ie jofe ero itínuári.

<sup>33</sup> Mei íadi daje naio llavériraima íaillinoi fáina boáfiai jocode. Afemona afémie naa íaillinoi úruiairi báutizaigaiaoi.

<sup>34</sup> Afe mei aféillinoina ie jofomo uillano ecade. Afémie naa ie comini diga Juzíñamuimo ínuari caimare íobidiaoi.

<sup>35</sup> Afe jítiramo riire jicánoraini jiáie llavériraini llavéracomorede, Pablo íaillinoi zuitállena.

<sup>36</sup> Iemona llavéraco úñoraima Páblona daide:

—Riire jicánoraini ómicoina cuena zuitátate. Mei ja birui ómicoi nífuenino uái íllena jino jáiredíomicoi, —daide.

<sup>37</sup> Mei íadi Pablo llavérirainina daide:

—Romano ímiedicoco, mei íadi cócomo jicánoñeno razido cócona fatíomoi. Faano cócona llavétatíomoi. ¿Mei íadi ja birui báinino cócona

zuitátatíomoi? Mei íeñedeza. Coco llavétatino mai coco zúitabiri, —daídíaiillinoi.

<sup>38</sup> Afefue llavériraini jicánorainimo llujáide. Lluájillamona jicánoraini jacinaitiaioi, aféillinoi romano ímienari.

<sup>39</sup> Ie jira Pablo Silas diga íaillinoimo jícajidiaioi: —Caimo ómicoi dúecai, —daízaidiaioi.

Iemona íaillinoi jino uano, íaioi jófueмона oni jáillana izire jicadiaioi.

<sup>40</sup> Afe llavéracomo jino billano, Lidia jofomo jáidiaillinoi. Amatiana cíoillano íaioina ñue náicaitadiaillinoi. Daí ñiano jáinomo oni jáidiaillinoi.

## 17

### *Tesalónicamo comuide aillo úrioinafue*

<sup>1</sup> Pablo Silas diga íaillinoi jaillano Anfípolis jófuedo jáidiaillinoi. Ie mei Apolonia jófuedo jáidiaillinoi. Afe mei Tesalónica jófueмо dúcidiaillinoi. Afénomo ite judíuai llófueriraco.

<sup>2</sup> Pablo ie fibilla izói, afe llófueriracomo jofo llófuerizaide. Daámani ocózinaillaruido íaioimo úrite.

<sup>3</sup> Juzíñamui jaiái Cuegáuai jino íaioimo llóollode. Aféuaimona Cristo duere finóinafue jítáirede, daí íaioimo jino llote. Daje izói Cristo tíida meine cáallena jítáirede daí jino íaioimo llote. Íaioina daide:

—Be ómoimo cue llogámie Jesús dámie Crístona, —daide.

<sup>4</sup> Mei íemona judíuaimona dámierie aféfuemo íinotiaioi. Afemona Pablo Silas íaillinoi dibénemo itábicaidiaioi. Afe izói aillo Juzíñamuimo jaináiacade

griego ímíai iere ñue ínotíai. Afe izóí aillo illaingo izóidingotíai aféuaina ínotíai.

<sup>5</sup> Mei íadi íñoñede judíuai aféfuerei úradoilla izóí itíai. Iemona cállemo ite fiénide ráiraiedinomo gairídíai. Ie mei judíuai cállemo ite itínoiri aillo úrioinafue finódíai. Daí jofue comini comeci fiени icíritadíai. Jasón jofomo ite Pablo Silas díga llaitállena, afeco cirínotíai, aféillinoi llaitada afeno comínimo izájillena.

<sup>6</sup> Mei íadi íaillinoina baiñédíai. Ie jira Jasón zocana uitíai, jíáie ámatíai díga. Jofue illaini uiécomo íaioina uitíai. Daí caillídíai:

—Bíaillinoi nágagobiaido fiени faillíñeinafuiai finódino ja benomo dúcia.

<sup>7</sup> Ie mei Jasón ie jofomo íaioina llínote. Nana afe bie bitino cai caifoide romano illaíma ocuífafuiai uáitaocana daide: “Jíáie ua cai illaíma ite, Jesús,” — daidíai.

<sup>8</sup> Aféfuena cacáillano ríimaci naa comíniri faillíñeidíai.

<sup>9</sup> Jasonmo daidíai:

—Cai o jífueñellena uícomo o úcube caímo ine. Uire aféillinoi o oréadi o úcube meine omo ííticai, — daidíai. Ie jira afe úcube íaióimo fécamona ja Jasón jíai ámatíai díga zuitadíai.

### *Pablo Silas díga Berea jófuego dúcide*

<sup>10</sup> Afemona afe naio ámatíai Pablo Silas díga Beréamo raire orédíai. Dinomo dúcillano judíuai llófueriracomo jáidiaillinoi.

<sup>11</sup> Bie judíuai Tesalónicamo ite judíuai baimo fígomaci. Caímare afe úrillauaina jeire otíai.

Nágarui Juzíñamui Cuegáuauillaimo jénofirediaioi, íaioimo llogáuauillaina uafue dai'llena.

<sup>12</sup> Afemona aillo afémacimona ínotiaioi. Daje izói griéguaimona ínotiaioi. Dájerize íñiaí íemo jíái ñue caimare jacíruigangotiaí ínotiaioi.

<sup>13</sup> Mei íadi Tesalónicamo ite judíuau Pablo Beréamo Juzíñamui llogáuau llófueillana fidíillano, dinomo nane comini fienu faillíñaitaitiaioi.

<sup>14</sup> Mei íadi ámatiaí dama Páblona raíre aféruido monáillai fuédamo orédiaioi. Ie mei Silas Timoteo diga Beréamo fiébicaide.

<sup>15</sup> Pablo nabaina jáidino Atenas jófuemo íena izáijdiaioi. Iaiioi meine jáidinodo Silas Timoteo diga Pablo íaillinoimo uai orede. Daide: “Cue diné iere raíre ómicoi biri, dánomo cai gairílleza,” daide.

### *Pablo Aténasmo illafue*

<sup>16</sup> Nai Pablo Aténasmo Silas, Timoteo diga úíñua llezica, afe jófuedo macade. Macádemo aillo íaioi jánaraiaí cióizaide. Aferui Pablo comeci iere zúucaide.

<sup>17</sup> Mei jira llófueriracomo judíuauiri úrite; daje izói jíáie Juzíñamuimo jáináiacadinori. Nágarui jofue gairírabirimo itínuaímo llote.

<sup>18</sup> Dárie “epicuro” daína llófueinafue facádotino como Pablo diga úrizaidiaioi. Daje izói, dárie “estoicos” daína llogáfuaí facádotino Pablo diga úrizaidiaioi. Dámierie daidíaioi:

—Bie aillo úrifiredimie, ¿nífue caímo llóite? — daidíaioi.

Mei íadi jíáimaci daidíaioi:

—Níbai jíáie juzíñamuillai llotímie, —daidíaioi.

Daí úritiaioi, Pablo Jesús úrillauai, ie meine cáanafue diga íaioimo llóiacana jira.

19 Ie mei Areópago daina illánomo íena uitíaioi. Dinomo gairífirediaioi llófueinafuena cacáillena. Dinomo íena jicánotiaioi:

—O atica cómue llófueinafuena cai onóacadícaí.

20 Mei ónoñegafuiaí caimo llotio. Afe bífuiái dáinana onóacadícaí, —daídíaioi.

21 Nana Atenas imaci naa afénomo ite onínemaciri, cómue ráfuiaina cacáillena járitaitiaioi. Afe izói cómofuiaí llóllena járitaitiaioi. Jáíe táijnamo járitañediaioi.

22 Ie jira Pablo Areópago comini cígimo náidaillano daide:

—Atenas imaci, omoi cácarei. Aillo juzíñamuillaido iere jaináidinodíomoi. Daí omoi íllana ciódícue.

23 Omoi juzíñamuillai ánozillena finócafuiái illánuiaido éroicaidícue. Dinomo daa omoi juzíñamuillaimo comeci facáranó ciódícue. Afénomo cuega uallai daide: “Bie cai ónoñega juzíñamui ie.” Bie omoi onóñeno jaináiacana Juzíñamui, ua birui ómoimo cue lluáibigamie.

24 ‘Afe énie finode Juzíñamui naa éniemo itínuiari, afémie bie énie Naama, mona diga. Afémie comini nigácomo íñede.

25 Aféniemo cai nífuena finónidicaí. Nífuena llónidicaí. Mei jira dama afémie nana comínimo cáatatinona fecáfirede; daje izói afémie jáfaicina cai ite. Ie emódomo nana ite ráaniaina afémie caimo íga.

26 ‘Naga náiraiai fueñe dáziemona Juzíñamui comuítaga, naga illa dígano íaioi éniemo íllena.

Iemona dájena diédicai. Nana íaioi illínuiyai mamede. Daje izói nano nié dino íaioi illíruillai mamede.

<sup>27</sup> Daií afémie finoca afe Juzíñamui íaioi jenóllena, nibai are illa ícoinia ie íaioi báillena. Mei íadi uáfuenta Juzíñamui cai illa dígamíemona jica íñede.

<sup>28</sup> Mei Juzíñamuido cáadicaí. Afémiedo cai jetácaga raana jetádicaí. Afe izói afémiedo iticaí. Afe daje izói ómoimona dáríe rua fínua izoide llote: “Juzíñamui comuítagamacídicaí; ie izíedicaí.”

<sup>29</sup> Iemona afe Juzíñamuina fia oro finoína jánarai daií comeci omoi facáñeno iri, mei Juzíñamui comuítagamacídicaíza. Afe izói afémiena plata finoína jánarai, ebírede nofici finoína jánarai, daií comécido omoi daiíñeno iri. Nana bie jánaraiaina dani comíni comeci faca izói finódiaíoi.

<sup>30</sup> Naui jaiáidíruillaído comíni abina onóñediaíoi; daií íllaza Juzíñamui íaióimo nai ibana oñede. Mei íadi birui náganomo itímiaína Juzíñamui ocuícana daide: “Omoímo fiéni itífuaína méidori,” —daide.

<sup>31</sup> ‘Nana comínimo itífuaí izire jicánollíruí Juzíñamui jae mamede. Aféruillaído afémie nizécamiédo jaícina caímo izire jicánoite. Juzíñamui afe nizécamiéna nana comínimo ñue jino uáfuenta onótate; tíllanomona íena meine abído cáatanado nana comínina uáfodo jino fidítate, —daií Pablo llote.

<sup>32</sup> Afe tíidimaci meine cáanafuenta cacáillano, dáríe itínomona Pablo jifánodoídiaíoi. Jíáimaci íena daídíaíoi:

—Íco jíáíruido aféfuéna meine nane dánomo ómona cácaíticaí, —daídíaíoi.

<sup>33</sup> Iemo Pablo íaioi cígimona oni jaide.

<sup>34</sup> Mei íadi dáarie iedo jáidiaioi. Jaillano ínotiaioi. Afe ínotimacimona dámie Dionísio. Afémie Areópago nimáiranimó jaínáidimie. Afe ínotimacimona Dámaris mámeciredingo ite, nai bai jáímaciri.

## 18

### *Pablo Coríntomo illafue*

<sup>1</sup> Afe meífodo Pablo Aténasmona oni Corinto jófue mo jáizaide.

<sup>2</sup> Dinomo dúcia meífomo Aquila mámecirede judío ímie baizájide. Afémie Ponto énie ímie. Afe Aquila ai Priscila. Afe íaillinoi cómoicana Itáliamona botádiaillinoi; romano caifóidillaíma Claudio nana judíuai Roma jófue mona oni íaioi oréina jira. Dinomo Pablo Aquila uáiduaide.

<sup>3</sup> Aquila ie ai diga jédaciede iniroi tífuano bizáinicai fe nitíaioi. Afe íaioi nílado úcube otíaioi. Pablo afe táijnana fibídímie. Ie jira Pablo afe íaillinoiri fiébicaide, dájena íaioi táijillena.

<sup>4</sup> Naga ocózinaillaruímo llófueriracomo Pablo llófuaifirede. Afemona judíuaimona dáarie ínotiaioi. Afe dájerize judíoñedimacimona ja ínotiaioi.

<sup>5</sup> Jae Macedonia éniemona Silas Timoteo diga dúcidiailinoímo, Pablo ie bizáinillai nilla fáicanocaillano, dama Juzíñamui ñúfue jino llóllena iere izire llocana uite. Judíuaina uáfodo daide:

—Jesús omoi úiñogamie Cristo, —daide.

<sup>6</sup> Mei íadi judíuai íena uáitaoidiaioi. Iemo fiénide uaillai nitádiaioi. Ie jira Pablo ie inícuero íaioimo faiánote. Afe faiánua daide: Iaioi íaire finócafue ícoinia afémie ícoiniañedeza, dani íaioi ícoinia.

Pablo íaioina daide:

—Dani omoi ícoinia timáritiomoi. Jae ómoiri nífuenedimedicue. Biruímona judíoñedimacimo llujíticue, —daide.

<sup>7</sup> Llófueriracomona jino jaillano, Justo maméidimie jofomo jaide. Justo Juzíñamuimo ánozillano caimare úritimie. Afémie jofó llófueriraco abímo ite.

<sup>8</sup> Afe llófueriraco illaíma Crispo. Afémie naa ie comíniri Ocuíraíma Jesucrístomo ínotiaioi. Afe llezica aillo Corinto jófuego itino, Pablo lloga ñúefuíaína cacáillano áfemo ínotiaioi. Ínuamona báutizagaiaioi.

<sup>9</sup> Afe mei Juzíñamui Páblona nicai anado daide:

—Jacíruiñoeno iri. Mai ñúefue llícaíñoeno lloíri, mei o diga itícueza.

<sup>10</sup> Fiénidífueña bu omo jíritanide. Nai bie jófuego aillo cuemo ínoitínona ite, —daide.

<sup>11</sup> Iemona Pablo Coríntomo nai daa fimona átuedo Juzíñamui uaillai comínimo llófullofuede.

<sup>12</sup> Mei íadi Galióna mámeciredimie, Acaya éniemo illáimana illáruido nana judíuai Páblona uáitaocana gairídiaioi. Iemona íena lláitano, rímaci uiécomo uitíaioi.

<sup>13</sup> Illáimana daidíaioi:

—Bímie comini cígido llófuericaide. Jíáifodo Juzíñamuimo ánozillí uaillai llófuecaide. Iemona



afe uáillaimo cacáreidiaioi. Mei íadi afefue caimo ocuica uailai uáitaoicaide, —daídiaioi.

<sup>14</sup> Pablo como úrizaidemo, illaíma Galión judíuaina daide:

—Judíuai, cue omoi áifedoñoeno iri! Bímiemo aillo fiénidifue ícoinia íadi, cómena fájafue izói, come merírinafue izói, ua afémie daí íadi ómoimo cacáreiticue.

<sup>15</sup> Mei íadi fia omoi uáillaido, omoi mámeциаido júfidotiomoí, ómoimo judíuai ocuícáfuiái diga. ¡Mai dani jaícina omoi finori! Aféfuiaimo izire jicánoraimana íacañedicue, —daide.

<sup>16</sup> Ie mei afémie nana íaioina jino jicánoracomona orede.

<sup>17</sup> Iemona nana griéguaí Sóstenes maméidimie llaitádiaioi. Sóstenes llófueriraco illaíma. Iena lláitano, riillaíma Galión uíecomo íena fáfadiaioi. Mei íadi Galión afe finócafuiaina raa daíñede.

*Pablo Antioquíamo meine jaide dinómona ja da-caiñoámani nane llujide*

<sup>18</sup> Dino Coríntomo Pablo diga iruillai ite. Ie jáiacanaruimo, ámatiaí íraicaiño íena facádonocaidiaioi. Afe mei Pablo nocaedo Siria éniemo ruica jáizaide. Aquila ie aí Priscila diga Pábloiri jáizaidiaioi. Nai Cencrea ígobemona nai jáiñediaioimo, Pablo ie ifo cuidode. Daí finode, jae ie nauí Juziñamuimo llogáuai fuilla jira.

<sup>19</sup> Ruica jáillano jae Efeso jófuemo dúcidiaioi. Dinomo Pablo, Aquila Priscila diga fiénocaillano, llófueriracomo jaide. Afénomo gairide judíuaimo Pablo úrizaide.

<sup>20</sup> Afémaci ie íaioi diga are íllena izire jicádiaioi, mei íadi Pablo fairíoñede.

21 Iiraicaiño íaiõina uáidonocaillano íaiõina daide:  
—Ja Jerusalemo íacade iráizillafuemo raire  
jáiacadicue, mei íadi Juzíñamui óiacania dáanomo  
abido ómoína éroizaibiticue, —daide.

Iemona nocaedo Efésomona oni monáillaido  
jaide.

22 Cesarea jófuemo dúciillano, Pablo arido  
Jerusalemo jaide, dinomo ite Juzíñamuimo  
gairidino uáidollena. Afe mei oni Antioquíamo  
jaide.

23 Diga iruillai dinomo illa meífomo, meine nane  
nana Galacia jófuemo Pablo oni jáizaide, Frigia jo-  
fue diga. Naga jófuemo dágoberie llófuecade. Daií  
Pablo nana Juzíñamuimo ínotimaci comécina ñue  
náirecaitate.

### *Apolos Efésomo ñúefue jino llote*

24 Aféruillaido judío ímie, Apólona maméidímie  
Efésomo dúcizaide. Afémie Alejandría jofue ímie.  
Afe iima uai jino llúana ñue fibídimie. Afémie  
Juzíñamui Cuegáuaina ñue onode.

25 Ocuíraima Jesucristo llogáuallaina afémie  
llófuegamie. Aféfuiái jino llúana iere méaicaiño  
caimare llote. Jino uáfodo Jesús ífuiáido llófuerite.  
Mei íadi dama Juan íaiõí báutizafuena onode. Afe  
izóí Juan Jesudo llogáfuena Apolos onode.

26 Apolos llófueriracomo comeci jácicaiñenado  
úrizaide. Mei jira Priscila Aquila diga Apolos  
llófueillana cacáillano, ie eneno uitíailinoi,  
Juzíñamui uillai baímo ñue jino jáicina llóllena.

27 Afe mei Apolos Acaya éniemo jáiacade.  
Iemona ámatiai ie abina jafue oñeno, ñue íena  
náicaitadiaõí. Daje llezica uícomo rabe afénomo ite

ínotinomo cuetíai, íai afémiena ñue llínollena. Afémie Acáyamo dúcillano, afénomo ite ínotinona ñue canode. Juzíñamui jae íaiimo dúecaillano íaiina ínotade.

<sup>28</sup> Nana comini eróicana judúai lloga taino uai Apolos íaiimo cíotate. Afémaci Apolos jamánomo ñue jaícina jóidiuaina jáanonidiai. Afémie Juzíñamui Ciegúauillado ñi íai úiñoga Cristo dáme Jesuna jino íaiimo uáfodo llóteza.

## 19

### *Pablo Efésomo meine dúcinafue*

<sup>1</sup> Apolos nai Coríntomo illa llezica, Pablo Galicia éniemo jaillano, íduai íllado jaide. Jáillano Efeso jófuemo dúcide. Dinomo ite Juzíñamuimo ínotimacina cíoizaide.

<sup>2</sup> Íaiimo jicánote:

—¿Meita omoi ínuamona Ñuera Joreño úicaigaomoi? —daide.

Jira afémaci uai otíai:

—Afe Ñuera Joreño íllana, jaca due cacáñedicaí, —daidíai.

<sup>3</sup> Mei jira Pablo nane jicánote:

—¿Mei bu mámeçido báutizagaomoi? —daide.

Jira afémaci uai otíai:

—Juan mámeçido báutizagacai, —daidíai.

<sup>4</sup> Jira Pablo íaiina daide:

—Juan lloga báutizainafue comini comécimo ite fiénidifuiái méiduana jino náiraímo cíotate. Mei íadi Juan meífodo bitímiemo ínorediomoí ómoína

daidicue. Afe bitímie Jesús; afe Jesús Juzíñamui Nizécamié Cristo, —daide.

5 Aféfuena cacáillano cai Ocuídímie Jesús mámecido báutizagaiaioi.

6 Pablo íaioimo onoi bítamona, Ñuera Joreño íaioimo bite. Iemona afémaci jíáimaci uáillaído úritiaioi. Juzíñamuimona oga úrilla uailai jino llotíaioi.

7 Afémaci nibai doce dígamiediaioi.

8 Pablo afe llófueriracomo daámani fiui jáicade. Dinomo comeci jáicaiñeno jino íaioimo llófuerite. Juzíñamui illáimana illáfuedo izire íaioimo jino llote íaioi ñnollena.

9 Mei íadi dámierie comeci rairuállano aféfuena ñnoacañede. Comini eróicana Juzíñamui ñúefuiaído fieni úritiaioi. Iemona Pablo íaioi cígimona oni jíáicomo jaide. Jaillano Pablo afe Juzíñamuimo ñnotinona jíáie comini llófueracomo uite. Afe llófueraco naama Tiranno. Dinomo Pablo nágaruillaído llófuaide.

10 Daií dinomo mena fimona llófuerite. Iemona nana Asia énie nairai Ocuíraima Jesús llogáfuaímo cacáreidiaioi. Judíuaimona nano diga ímíai ñnotiaioi. Afe dájérize judíoñedinomona ñnotiaioi.

11 Juzíñamui diga áillue ciórainina ráaniai Páblodo finode.

12 Uiéco dóraroillai Páblomo atídiaioi jinófene jítáaroillai diga. Aféroillai Pablo jétanona iráredimacimo uitíaioi. Afe jetácaroi íaioi llínuamona jílobcaidiaioi. Daje izói jíáimacimo ite fiénide jóriaí oni jáizítiaioi.

13 Afe mei macáraini judíuai dáríe dúcidiaíoi. Afémaci:

—Fiénide jóriaiai comínimona oréredicai, — daidíaíoi. Ja Ocuíraima Jesús mámecido afe fiénide jóriaiai jino oréacadiaíoi. Jiáimacimo ite jóriaiaina daidíaíoi:

—Pablo lloga Jesús mámecido ja birui ómoína jino orédicai, —daidíaíoi.

14 Afe izói judío ímie Esceva siete diga jitótiai daidíaíoi. Afe Esceva lletáriraini illaíma.

15 Afémie jitótiai daí dainamona afe fiénide joríaiaíoi uai ote:

—Cue Jesuna onódicue. Daje izói Páblona onódicue; mei íadi omoi mei ¿búdiomoi? —daide.

16 Daí daina mei, fiénidena joríairedímie riire íaioína llaitade. Nana íaioína anáfenuano iere duere íaioína finode. Ja iere jamánomo duere íaíoi finóinamona, afécomona émuiromaiái naa boáfiaíri jino botádiaíoi.

17 Nana Efésomo ite comini, judíuai naa judíoñedinori aféfuena fidíillano iere jacíruitiaíoi. Iemona Ocuíraima Jesús mámecina jamánomoideza daidíaíoi. Afemona aillo ñúefue Jesumo nitádiaíoi.

18 Aillo áfemo ínotimacimona jaiái íaíoi finoca fiénidífuiaí uáfodo jino llotíaíoi.

19 Daje llezica aillo nauí aiñíniaí uaimo fibídino, íaíomimo ite fiénino úrilla rabénicuai átiano nairai eróicana jobáidiaíoi. Afe jobáicanicuai comécido facádiaíomimo, jamánomo ráifide izoide, daidíaíoi. “Cincuenta mil úcubetunillai dieze ráifide,” daidíaíoi.

20 Daí Juziñamui lloga uailai jamánomo oni móonaioicaide. Afedo Juziñamui riino jino cíotaioicaide.

21 Afe meífodo Macedonia éniemo Acaya énie diga dino comini uáiduaillena Pablo mamérite. Afeno comini uáidua meífomo, abido Jerusalemo jáizaillena Pablo comécido daide. Afe emódomo daide:

—Jerusalemo cue jaille mei, dinómona Rómamo jáiacadicue, —daide.

22 Mei jira Macedóniammo mena ie canóraima Timoteo Erasto diga uícodo orede. Mei íadi Pablo nai Asiammo nano nígarui fiévide.

*Efésomo fiénidifuedo faillíñeidiaioi*

23 Aféruillaído Jesús lloga ñúfuiari aillo fieni faillíñeidiaioi.

24 Afe faillíñeinafue Demetrio como fueñe taineca. Afémie aillo ebírede ráaniai plátamona finóraima. Juzíñamuina íaioi mamécango Artemisa, nofici finoina jánarai. Aféngomo gairíraco izói, plátamona ráiracojina finoda, Demetrio fecáfirede. Afedo afémie ie diga táijiraimaci íena aillo úcube otíaioi.

25 Iemo Demetrio naa jáie daje izói táijinana fibídinori dánomo gairídiaioi. Dinomo íaioina daide:

—Cáimaci, omoí cácarei. Bie cai táijinado ñue ráaredicai, onódiomoi.

26 Mei íadi baie Pablo llócaigafuena cacádiommoiza. Afémie daide: “Comini finoca juzíñamuillaina íeñede,” daide. Ie llogáfuemo Pablo aillo comínina íinotade. Daa benó Efésomoñede daí íinotade, mei íadi nana Asia éniemo íinotaacade.

27 Afefue iere jacire cacaide. Afedo cai fecácaiganiana táinocaitaíbite. Daje izói cai áillue juzíñamui cai daínango Artemisa gairíraco

jalléinafuenta féitaite. Afe izói bie juzíñamui daínango jamánomo ebírenafuenta jámaíruiatibite. Nana Asia énie naa jíáie éniáiri aféngomo áinozifirediaíoi, –daí Demetrio daide.

<sup>28</sup> Aféfuena cacáillano, iere comécido ríicaidiaíoi. Iemona caillíoicana daídíaíoi:

–¡Cai Efeso imaci juzíñamui cai daínango Diana, jaca ninomo záíñeno iri! –daídíaíoi.

<sup>29</sup> Iemona nana afeno jófuedo aféfuiaí iere riire júfidotiaíoi. Aillo afeno comini ífo irínote. Afe llezica mena Pablo nabaide íaillinoí llaitádiaíoi. Afe íaillinoí mámece Gayo Aristarco diga; Macedonia ímie íaillinoí. Iaiíoi llaita mei afémaci nairai uícomo íaiíoi gairíracomo íaillinoína zocana uítíaíoi.

<sup>30</sup> Pablo afeco jofomo comínimo úrizaiacade, mei íadi ñúefuenta ínotino afe jofo jáillena rairuítiaíoi.

<sup>31</sup> Afe llezica Asia ríimaci Pablo diga caimare úriraini, Pablo afeco jofo jáíñeillena uai íemo orédiaíoi.

<sup>32</sup> Iaiíoi gairilla llezica, dárie jíáfodo llotíaíoi; jíáimíiaí jíáfodo júrioicana llotíaíoi. Mei aféfuiaíri jamánomo fieni faillíñeidiaíoi. Ja nabénairai aféfuena onóñediaíoi, nífuerei gairídiaíoiiza.

<sup>33</sup> Mei íadi gairídino cígimona dámíerie jino Alejándromo aféfuiaí llotíaíoi. Afe Alejándrona judíuai, afeno comini uícomo judíuai abi ríiduafuedo úrillena, bai íena naídánetaíoi. Bai náidaillano ie ónoído íaíoína, “Mai omoi llícai,” daide.

<sup>34</sup> Mei íadi afémie judío ímienana íaiíoi comécido onónamona, mena hora nana caillíoicana daídíaíoi:

—¡Cai Efeso nairai naango Artemisa, jaca ninomo záíñeno iri! —daídíaiói.

<sup>35</sup> Iemona afeno jofue jabóllaíma ícoínia comini líicaitade. Líicaitano íaióina daide:

—Efeso nairai, omoi cácarei. Naga énie náiraií cai iere jalleide juzíñamui dainango Artemísamo gairíracona úiñotagamacidícaí, afe cai úiñuafuena onódíaiói. Afe daje izói aféngona mameca monámona ana baíide jánaraina úiñotagamacidícaíza onódíaiói.

<sup>36</sup> Mei bifue buna jaca jáanonideza, mai omoi líicai. Comecí facáñeno níifuena lloñeno iri.

<sup>37</sup> Mei bie omoi atíca íaillínoi, omoi juzíñamui dainango Artemísari fiénidífuena úriñediaillínoi. Aféngona ríicaitañediaillínoi.

<sup>38</sup> Demetrio zúucaillafue níimiemo íadí, mai jícanoraímamo llujíri. Daje izói afémieri tájíraíni zúucaillafue íadí llujíri. Jaca ríimaci úícomo meine abído óllena afémaci llóredíaiói.

<sup>39</sup> Mei jíáífodo omoi jícanoíacaniadí, mai ríimaci daína izói omoi gairiri.

<sup>40</sup> Ja birui jácifue mo baízaidícaíza. Birui omoi finócafue ícoínia, illaíma anáfenuafuena caímo nítaítíaiói. Bie omoi faillíñeínafue caímo íaiói jícanoíadí, íaiói uai cai ollífué jaca due íñede, — daide.

<sup>41</sup> Daí daína meífodo, aféno mo gairídino oni rainode.

## 20

*Pablo Macedóníamo Grecia díga díne jáillafue*



1 Afe íai*oi* faillíñeinafue llícailla meífomo, Pablo Juzíñamuimo ínotino ñue llófuellena jíiritade. Daií íai*oi* llófua méífomo íai*oi* llínuano íraicaiño uáidonocaide. Uáidonocaillano Macedóniam*o* jáizaide.

2 Nana afénomo itígobiai comini uáiduaide. Ie uáillaide afénomo ite ámatiai náicaitade. Afe mei Pablo ja Grecia éniemo dúcide.

3 Dinomo daámani fiui llófuete. Dinómona nocaedo Síriamo jáizaidemo, judíuai íena llaitáacanafuena fidide. Ie jira ari éniemo Macedóniam*o* abido jáillena comeci facade.

4 Dinómona ie nabáidino: Berea ímie Sópater; Tesalónica ímie íaillinoi Aristarco Segundo diga; Derbe ímie íaillinoi Gayo Timoteo diga; jíaie Asia énie íaillinoi Tíquico Trófimo diga.

5 Afe bie ámatiai uícomo Troas jófue*mo* caina uíñuaidia*oi*.

6 Fáitara jóneñega pan güilla iráizilla meífomo, Filípomona nocaedo ruica jáidicai. Ja cinco dígarui íllamona Tróasmo dúcidicai. Dinomo daa semana iticai.

### *Pablo Troas comini uáiduafue*

7 Semana nanóidiruido gairídicai pan ditada fecállena. (Afe pan ditada güillamona Jesucristo íraicaiño güillamo úbicaidicai.) Güilla mei Pablo Jesumo ínotino llófuete. Afe jítiramo afémie ja jáiacade. Ie jira úrioidemo ja dáaferui ite.

8 Caifo jica ite caifóneco ero icomo gairídicai. Afe dinomo aillo unéracheco*oi* bóotatia*oi*.

9 Dinomo ite daa jítócome, Eutícona maméidimie. Afémie jino eróirafomo ráiide. Pablo iere are úrillamona, afe jítócome jamánomo ínietaide. Ícoinia

izire íniama, caifona ana baiíde. Afécomo da-baniámani ite. Dinómona ana éniemo baiíde. Tíde caifo llínotiaioi.

<sup>10</sup> Mei jira Pablo ana afémiemo jáillano, ie acónimo dújuillano íena meníñote. Afe mei ámatiana daíde:

—Cáadeza, omoi jacínaiñeno, —daíde.

<sup>11</sup> Daíí daína mei Pablo meine caifo jaide. Caifo meine dúcillano, pan ditada güillano nai íaioimo nane úrite. Da úritemo monaíde. Monáillamo oni jaide.

<sup>12</sup> Afe baiídímiena ñue caade uitíaioi. Iemona nana comíni ñue caimare íficaidiaioi.

*Pablo Tróasmona Milétomo jáillafue*

<sup>13</sup> Ie meífomo Pablo Asonmo iodo jáiacade. Ie jira cai jáíimaci nocaedo uícomo Asonmo jáídicaí dinomo Pablo otá cai úillena.

<sup>14</sup> Afémiena Asonmo cai báillamona, dinómona cai nocaedo nana Mitilénemo jáídicaí.

<sup>15</sup> Dinómona jáillano jítiramoidiruido Quío jofue ánode jáídicaí. Afe jáíruido Samos ígobemo zíjídicaí. Dinómona Trogíliomo ocózinaidicaí. Afe jáíruido Milétomo dúcidicaí.

<sup>16</sup> Pablo Asia éniemo are íacañede. Ie jira Efésomo meine jáíacañede. Mei íadi Pablo raire Jerusalemo dúciacade, afénomo íacade Pentecostés ráfuena cíoillena, íadi nibai cíoiñeite.

*Pablo Efeso éinamacimo úrillafue*

<sup>17</sup> Nai Mileto jófuego cai illa llezica, Efésomo Juzíñamuimo gairíraini éinamací jírítate.

<sup>18</sup> Iaioi dúcinamona Pablo íaioina daíde:

—Nano fueñe Asiamo cue dúcinamona cue ífírenana ñue onódiomoi.

19 Nágaruillaído comeci mánainafuedo éeiafuedo omoi cigiri iticue. Daí cai Ocuíraima Jesumo tájifiredicue. Afe llezica judíuai iere aillo duere cuena finóacadiaioi. Afedo aillo facátafuiyai cuemo nitádiaioi.

20 Mei íadi fáicanocaiñeno nana ómoimo ñue illífuena llófufiredicue. Daí uáfodo omoi gairiracomo ómoimo llófueriticue. Daje izói naga omoi jofomo llófufiredicue.

21 Judíuaimo lloticue; daje izói judíoñedinomo lloticue. Nana íaioina daidicue: “Omoi fiénidifuiyai ñúefuiaina Juzíñamui comeci jitailla izói omoi meídori. Iemona cai Ocuíraima Jesucrístomo omoi ñnori,” daí íaioina daidicue.

22 Mei birui benómona Jerusalemo jáiticue; afénomo cue jaille Juzíñamui Ñuera Joreño cue ocuilla izói. Dinomo cuemo cómutifuenta ónoñedicue.

23 Dama dafue cue comécido onóigafue: nana cue jailla jófuedo Ñuera Joreño cue llavébillifue aillo duere cue finóbillifue diga cuena fidítate.

24 Mei íadi aféfuena due lloñedicue. Ocuíraima Jesús cuemo jóonega tájinafuena ñue ícoimo cue fuitáadi cue cáanano cúemona ráifiñede. Afe tájinafue Juzíñamui ñue caina izíruillafue comínimo llócadicue. Ua comini áizia izóidinomona cue tájina ícoimo caimare ñue dúcítaiacadicue.

25 ‘Omoi cígido Juzíñamui illáimana illafue llócadicue; mei birui ua onódicueza, ómoimacimona buna cuena meine cíoñeite.

26 Ie jira biruido daííacadicue, ja ómoimona nífuenidimiedicue.

27 Mei jira nana Juzíñamui caimo llófuegafuiai ómoimo uáfodo llotícue. Nífuena báinino lloñédícue.

28 Ie jira afe izói daní abí omo rairuiri. (Jae einamácidíomoi za.) Daje izói nana Juzíñamuimo gairídínona úñori, mei jira Ñuera Joreño íaioina úñotade. Ua Ocuíraima Jesumo gairídínno úñotagaomoi. Afe gairídínona Jesús dama ie túllado, ie die tóillamona dama ie comínina meine maiñode.

29 Cue jailla mei jíáimaci Juzíñamuimo gairídínona jífueridino bíítiaioi. Ua riírede jicóniaí ovéjaina fázia izói Juzíñamuimo omoi ínogafuena féitataíbitiaioi.

30 Daje izói omoi cígiri táinofuiai llóitínona iite. Afémaci uáfueña féitajano táinofuiai ómoimo llóitiaioi, ínnotino afe uai jeire otátallena.

31 Mei jira abí omoi rairuiri. Naui omoi diga cue illáfueño omoi uibíoiri. Dafimonaámani, mona naio diga éebicaillano izire ómoimona nágamiaimo fáicanocaiñeno ómoimo jino llotícue.

32 ‘Mei cue ámatiaí, ja birui Juzíñamuimo ómoína jóoneitícue, omoi úñollena. Daje izói Juzíñamui caína izíruilla uaimo omoi comeci uibíoillena jítaídícue. Afe uai ómoína náirecáitaite. Afe daje llezica, aféuaido Juzíñamui dibénemo ñue rairuícamacina ja itíomoi naa jíáie ie rairuícamaciri. Mei afe rairuícamací Juzíñamuído ñue finócamacídíomoi.

33 Jíáimíemo ite úcubiaíri íaioimo ite ínroillairi dama cúeiena jaca úradoiñédícue.

34 Mei íadi jíáfodo, dama cue jítailla raa óllena

dama cue ónoído táijidicue. Daje izói cue diga itino íena oticue.

<sup>35</sup> Daií omoi táijillena lloticue. Afe izói raana jitáidino omoi canóllena ómoína llófueticue, Ocuíraima Jesús daina uaimo comeci omoi facáoicaillena. Afémie daina uai daií daide: “Fia iga raa líinotimie baimo, fecáfiredimie jamánomo ióbide,” —daide.

<sup>36</sup> Daií íaioina daina meífodo, Pablo cañici ana dújuillano Moo Juzíñamuimo nana afémaciri úritiaioi.

<sup>37</sup> Iemona nana éenaitiaioi. Afe llezica Páblona meníñuano ñitada cáimadotiaioi.

<sup>38</sup> Afe llezica Pablo “Ja meine abido cuena cíõñeitomoi” dainari iere zúucaidiaioi. Afe mei fei nocaemo íraicaiño íena nabáidiaioi.

## 21

### *Pablo Jerusalemo jáillafue*

<sup>1</sup> Amatiai fuénocaillano, Cos jófuemo nocaedo jaícina jáidicai. Afe jítiramo Rodas jófuemo jáidicai. Dinómona Pátara jófuemo jáidicai.

<sup>2</sup> Afe Pátaramo Feníciamo jáiacade nocáe baiticai. Dinómona afécaedo jáidicai.

<sup>3</sup> Jaillano, monaillai cigi idu Chíprena jicana ciódicai. Afe éniena jarífezi dibénemo fíanona Siria éniemo jáidicai. Afe cai jáillacaemo Tíromo fielle ráaniai illa jira afégobemo zíjidicai.

<sup>4</sup> Afégobemo ite Juzíñamuimo íinotinona cióizaidicai. Dinomo siete dígarui íaioi diga iticai. Dinomo Ñuera Joreño llogáiaioi. Ie jira Páblona daidíaioi:

—Benómona Jerusalemo jáiñeno iri, —daidíaioi.

<sup>5</sup> Mei íadi afe siete dígarui illa meífodo jáidicai. Cai jáizailla llezica nana Juziñamuimo íinotino, íaioi ringóniai naa úruiairi jofue féimo caina nabáidiaioi. Dinomo ite guamácimo ana dújuillano Juziñamuimo iere úriticai.

<sup>6</sup> Ie mei meníñota íiraiçaiño íaioi facádonocaidicai. Daií ñiano nocaemo caífo jáidicai. Afémaci íaioi jófuemo meine jáidiaioi.

<sup>7</sup> Tíromona biticai Tolemáidamo dúcina. Dinomo ite ámatiai uáidollena darui nabáidicai.

<sup>8</sup> Afe jítiramo Pablo naa íedo jáidinori dinómona Cesarea jófuemo dúcidicai. Dinomo ite ñúefue llóraima Felipe jofomo jáidicai. Afémie siete dígamiede güille fecárainimona Juziñamuimo gairíraco táijiraima. Dinomo afémie jofomo iticai.

<sup>9</sup> Afe Felipe jiza nagaámazade. Nai inínidiaioi. Aféngotiai Juziñamuimona cacana uailai jino llotíaioi.

<sup>10</sup> Afénomo diga irui iticaímo, uai jino llóraima Agabo Judéamona cai uáiduaibite.

<sup>11</sup> Afémie Pablo çiraigi ife zuitáicaillano dama ie idai onoi diga maiano daide:

—Ñuera Joreño daide: “Jerusalemo judíuai bie çiraigi ife náamana bie izói máite. Maiano íena jicánemacimo fécaitiaioi,” daide, —daií Agabo lluaíbite.

<sup>12</sup> Aféfuena cacáillano, Cesarea imaci naa çairi, Pablo Jerusalemo jáiñeillena íemo izire jicádicai.

<sup>13</sup> Mei jira Pablo uai ote:

—¿Ñibái cuena zúucaitatomoi? ¿Miníçari éediomoi? Cue íaioi maille baimo comécido mamériticue. Juziñamui jítaiadi Jerusalemo cai Ocuíraima ícoinia tíitícueza, —daide.

14 Afémie mámiafuenta jáanonidicai. Ie jira afefue fáicanocaillano daidicai:

—Juzíñamui começi jitailla izói omo íficaiteza, — daidicai.

15 Afe meífodo, Jerusalemo jáillana finóbidicai.

16 Cesaréamona dárie Juzíñamuimo ínotino caina nabaide. Afémaci cígimona daa Chipre ímie Mnasón ite. Afémie jae diga fimona Juzíñamuimo ínote. Afémiemo ite Jerusalemo dúciracomo jáidicai.

### *Pablo Sanatiago uáiduafue*

17 Jerusalemo dúcidicaimo dinomo ite ámatiai caimare caina llínotiaioi.

18 Afe jítiramo Pablo naa cairi Santiago uáiduaidicai. Daje izói nana illáicomini afénomo itíaiioi.

19 Pablo íaiioi uáidote. Uáiduano Pablo nana iedo judíoñedinomo Juzíñamui finócafuiiai jino illa dígafuiiai íaiioimo llote.

20 Iemona aféfuiaina cacáillano Juzíñamuimo caimátaioidiaioi. Jira Páblona daidíaioi:

—Mii, o llogáfuiiai iere ñuera, mei íadi judíuaimona diga mil comini afe ñúefuemo ínotiaioi ciódioza. Nana afémaci Moisés ocuica uai izói cai íllena iere jítáirede daidíaioi.

21 Mei íadi dáarie o nana jica jáínomo ite judíuaimo llogáfuenta lluáibitiaioi. Afe íaiioi cacánafue daide: “Moisés ocuica uaina jeire omoi oñeno iri.” Afe izói íaiioi jítótiai bacano icoi quetátañedio, daidíaioi. Ie emódomo cai fibíllafuiaina finótañedio, daidíaioi.

22 Iemo bífuiaina cai dibénedo ¿nie izói llóitio? ¿nie izói ñéiticaí? O billáfuena comini fidíillano ua dáanomo gáiritiaioi, —daide. Iemo Santiago nai úrillano íena daide:

23 —Cai daínauai jeire o úamona aféuai izói o finolle jitáirede. Cairi benomo ite nagaámamie. Afémiaí uícomo Juzíñamuimo nauí íaioi llogáuai fuitáacadiaioi.

24 Bimaci o uíri. Uillano nana omoi comécimo íaífue múiñuafue mai omoi fínuairi. O úcubemona omoi ífue cuidótalle ibari. Iemona dani cuidótaitaioiza. Afe daí o fínuamona, benó ite íinote judíuai, o ñue ífirena izói ónoitiaioi. Moisés ocuícáfue jeire o úana fídítiaioi. Daje izói ja ónoitiaioi nana o rafue benó comínimo jíáimaci lluaíbiga táinofuaí.

25 Mei íadi íinote judíoñedinomo jíáífodo jae cuéticaí. Aillo judíuai finócafuaímo íaioi jíeruiñeillena lloticaí. Daa bifue íaioímo lloticaí: “Jánaraí izóidemo fecaca llíciaina omoi riñeno iri. Díena jiróñeno iri, daje izói cimoina cigínoga rílleniaina riñeno iri. Mai nana jiruífuaímona abí omoi rairuiri; dama áredimie ie ai diga illa ñuena,” —dinóride Santiago llogafue fuilla.

### *Pablo gairíracomo llaitáinafue*

26 Ie mei Pablo afe nagaámamie uite; uillano afe jíitiramo, íaioi comécimo ite íaífuaí múiñuafue finódiaioi. Afe meífodo jofu Juzíñamuimo gairíracomo jáidiaioi. Dinomo íaioi comécimo ite íaífuaí muiñóilliruillaí fuillírui llujáidiaioi. Afe



daí íaioi llúamona illa dígamierie íaioi raa fia íaioi fecállirui llotíaioi.

27 Afe siete dígarui ja fúiacademo Asia éniemona bite judúuai Páblona Juzíñamuimo gairíracomo cíozai bitiaioi. Iena cíozai billano nana afeno comínina fieni faillíñaitadiaioi. Iemona Pablo llaitádiaioi.

28 Llátano caillíoidiaioi:

—¡Israel nairai, cai cano! Bímie nágagobiaido nana comíniammo cai nairai uáitaoicana llófuecaide. Daje izói Moisés ocuífafuena uáitaoide. Bie cai Juzíñamuimo gairíracona uáitaoide. Ie emódomo jae mena griego ímie íaillinoi jofo uite. Daí bie Juzíñamuido ñue finócaco ero bácajaibite, — daidíaioi.

29 Naui Pablo afe jófuedo judíoñedimie Trófimo diga nabáirillana íaioi ciónamona daí daidíaioi. Afe Trófimo Efeso ímie. Afémaci comeci facádiaioi, nibai Pablo Trófimona gairíraco eromo jofo uite, daidíaioi.

30 Iemona nana afeno comini aféfuiai júfidotiaioi; aféfuerei fieni faillíñaidiaioi. Afe llezica nana comini áizíai bitiaioi. Billano Pablo llaitádiaioi. Llátano gairíraco jinomo zocana iena uitiaioi. Daí ñiano afe llezica gairíraco náziai ibáidiaioi.

31 Ja iena titáacadiaioimo, soldados igüelli illaíma ja afe aillo comini fieni faillíñainana fidide. Daje izói Pablo ja íaioi titáacanafuena fidide.

32 Mei jira afe illaíma ie jabóidillaímaíai naa ie llaizírainiri jírrite. Jírillano afe comini illánomo aizícana jáidiaioi. Iemona nana comini llaizíraini illaíma naa ie llaizírainiri bíllana cíóillano, Pablo fáajana fáicanocaidiaioi.

33 Afe mei afe illaïma Páblomo áinozide. Ainozillano Pablo llaitádiaioi. Llaitano mena llóejina íena maitátate. Afe mei illaïma íena daïde:

—O mei ¿búdio? ¿Níifue finódio? —daïde.

34 Mei íadi comini jamánomo jiáifodo caillíoidiaioi. Jiáimíai jiáifodo daidíaioi. Illaïma ifona jamánomo írinote. Jaca jefomo uibíñede, jamánomo íaioi úrioinaza. Jira illaïma llazíraini gairíracomo íena uitátate.

35 Afeco caïfo jáirabicimo íaioi dúcina llezica, llazíraini Páblona caïfodo rocádiaioi, comini íena llaitada íaioi fáiacana jira.

36 Aféme uilla óodana caillícana daidíaioi:  
—¡Pablo dama tíideza! —daidíaioi.

*Pablo ie abi ríidollifue comini uiecomo llo*

37 Afécomo íena uizájidiaioimo, Pablo afe llazíraini illáimamo griego uáillaïdo jicánote:

—¿Meita comínimo úriredicue? —daïde.

Jira aféllaïma uai ote:

—¿O griego uai úrillana ónodio?

38 ¿Mei o egipcio ímieñedio? Aféme nauí jiáie illáimana benó jóoneacade. Táizicimo cuatro mil come fáraini uite, —daïde.

39 Jira Pablo íena daïde:

—Tarso jófuemo jococa judíodicue. Cilicia éniemo ite ñue onórede jofue ímiedicue. Comínimo cue úrilleza cuemo izire cácarei, —daïde.

40 Iemona afe illaïma Páblona fairíote. Iemo Pablo afe caïfo jáirabicimo náidaillano comínina ónoïdo llícaïtade. Iaiioi úrioina llícaïllamona Pablo

afémaci uáillaído íaioimo úrite. (Afémaci úrilla uai ‘hebreo’ daina.) Íaioina daide:

## 22

<sup>1</sup> —Cai comini naa illáicomini diga, omoi cácarei. Cue abi ríidua fue jino llóiticeuza, —daide.

<sup>2</sup> Hebreo uaido íaioina dáinana cacáillano, iere tii daidíaoi. Iemona Pablo íaioina daide:

<sup>3</sup> —Cue judíodicue. Cilicia éniemo ite Tarso jófuemo jocócacue. Mei íadi benó Jerusalemo comútagacue. Afe mei Gamaliel llófuegacue. Cai jaiáidigima ocuícafuiai llúana iere áfemo jíeruiticue. Jaca Juzíñamuimo táijinafuemo comeci cue facai izói naa cue ríinodo iere járitaifiredicue. Ua ja birui Juzíñamui ocuícafuemo omoi járitailla izói jaiiai daí járitaifiredicue.

<sup>4</sup> Jaiiai Jesumo ínotinona daje izói fállena racádicue. Afe dáruido ííñiai ringóniari llavéracomo llávaidicue.

<sup>5</sup> Lletáriraini illaini nauí comini cue lláviafuemo uai nabáiraini itíaoi. Daje izói nana illáicomini rábiai cue fécamo uai nabáiraini. Afe rábiaído Damáscomo ite cai ámatiai judíuai jénuaidicue. Dinomo ite Jesumo ínotino jénuaidicue, atida Jerusalemo íaioina duere cue finó tallena.

*Pablo íemo ite fiénidifue méidua jino llote  
(Hch 9.1-19; 26.12-18)*

<sup>6</sup> ‘Mei íadi Damasco iodo jáidicue, ja jaíciri ítemo afe jófuemo dúciacadicue. Afe llezica monámona jamánomo riire cuemo egáíño caide.

<sup>7</sup> Iemona éniemo baídicue. Afe llezica monámona cuena daina uai cacádicue; aféuai

cuenta daide: “Saulo, Saulo ¿nibái mei cue racádio?”

<sup>8</sup> Mei jira jicánoticue: “¿O mei búdio?” Jira afémie cuenta daide: “Nazaret ímie Jesús dice. Daa o racácamiedice,” daide.

<sup>9</sup> Cuedo jáidino afe egáñuana cióillano jacínaitiaioi; mei íadi cuemo úrite uaina cacáñediaioi.

<sup>10</sup> Jira íena daidice: “Ocuíraima, ¿mei nñe izói íitice?” Jira afémie cuenta daide: “Náidacaillano o jailla Damasco jófue mo jai. Dinomo o finóllifuaína omo llóitiaioi,” daide.

<sup>11</sup> Afe rñre egáñua cue ui dúitaga. Ie jira cue nabáñiaí Damáscómo ónoído jainátaoicaigacue.

<sup>12</sup> ‘Afénomo ite Ananíasna mámedimie. Afémie iere Moisés ocuífue mo ínofirede. Nana Damáscómo ite judíuaí ññefuena íemo nitáfrediaioi.

<sup>13</sup> Iemo afe Ananías cue uáiduaíbite. Billano cuenta daide: “Cue ama Saulo, o ui meine nane cíoteza,” daide. Daí daina llezica meine cue ui ñue cíode. Afémiena cíodice.

<sup>14</sup> Mei jira afémie cuenta daide: “Cai jáiairagima Moo Juzíñamui nizécamedio. Afémie jaiái nínómona ona nize de íemo o tájillifuaí jino omo llóllena. Ua dama Jesús fuémona ie úrilla uáillaina cácaítio. Afe llezica jaícina ñue finófredimiena Jesuna cíoitio.

<sup>15</sup> Mei o cacánafuaí o cíónafuaí díga nana comini uícomo jino llóitio.

<sup>16</sup> Mei birui ¿minícarí jizídio? Náidacaillano o báutizatori. Ocuíraima Jesús mámedimo ñue íñori. Afedo o fiénidifue jae muiñócaza,” díñori Ananías daide.

*Pablo Judíoñedíno me orécafue jino llote*

17 Pablo nai úrite. Iaióina daide:

—Jerusalemo meine cue billa llezica, Juzíñamuimo gairíracomo úrizaidicue. Díno me nicaí anado ciódicue.

18 Cai Ocuíraima Jesuna ciódicue. Afémie cuena daide:

—Jerusalémona mai raire oni jai. Afémaci cuedo o úrillana jíruiñeitiaíoi, —daide.

19 Jira Ocuíraimana daidicue:

—Nana afémaci omo ínotinona llófuera como cue lláitainafuena onódiaíoi. Llavéracomo íaióina fácana cue uilláfuemo uibíoidiaíoi.

20 Esteban o mámecido úrite táijitagame. Afémie tíide die tota llezica afénome iticue. Aféfuemo “Ji” daidímiedicue. Ie emódomo Esteban fatímie inícuirona oni llidicue, —daidicue.

21 Mei íadi Ocuíraima cuena daide:

—Mai jai. Judíoñedíno cígimo jica ona óreiticue, —daide.

*Pablo llazíraini illaíma anamo illafue*

22 Afe díno afeno comíni íanori tíi daidíaíoi. Mei íadi dánome nane caillíoicana daidíaíoi:

—¡Bie íima dama tíideza! ¡Afémie cáainlona íñeite! —daidíaíoi.

23 Nai are caillíoideaíoi. Iere icírillano daní íaióí inícuiruai cúacoideaíoi. Afe llezica eníchomaíai caífo táíno me júcoideaíoi.

24 Ie jira llazíraini illaíma Páblona íaióí gairíracomo orede. Oriano díno me zechénotade íe finócafue jino llóllena, comíni ríire íemo fieni caillíoinafuena onóillena.

25 Ja maítá fállena naidánega, íemo Pablo dínomo ite jabóllaimana daide:

—¿Jicáñoñoeno romano ímiena fárediomoí? — daide.

26 Afena cacáillano jabóllaima llaizíraini illáimamo llujáide; llujáillano daide:

—Bímiemo o duere finóacanafue o jíricaiñoeno iri; afémié romano ímieza, —daide.

27 Jira afe llaizíraini illaima Páblomo jicánuaibite; daide:

—¿Ua romano ímiedio?

Jira Pablo:

—Ie mei, —daide.

28 Jira afe illaima daide:

—Aillo cue úcube baílla baímo romano ímiena jáidicue, —daide.

Iemo Pablo daide:

—Cue jaca romano ímiena jocócacue, —daide.

29 Afe daií ie dáinamona, ie zechénotino afémiemona oní raídiaíoi. Nana afémaci naa aféllaimaoiri jacinaitiaíoi ie íaíoi llaítari; afémié romano ímienana íaíoi fidínamona.

### *Pablo judúuai Nahí Ríillaini uícomo naidánetaíoi*

30 Afe jáíruido afe llaizíraini illaima Páblomo íaíoi jitácafuiaina ñue jaícina onóiacade. Ie jira lletáriraini illaini naa íaíoi ríillainiri dánomo gairítate. Afe mei Pablo llaveina llójeji zúitano íaíoi uícomo bai naidánete.

## 23

1 Dínomo Pablo Nahí Ríillainimo éroicaillano daide:

—Cue ámatiai, cácarei. Jaca birui comeci mánainafuedo Juzíñamui uícori caimare iticue, —daide.

<sup>2</sup> Ie jira lletáriraini illaíma Ananías Pablo abimo itino fúena putátate.

<sup>3</sup> Jira Pablo íena daide:

—¡Afe izói Juzíñamui ona fátaite! Jae jinóidíuaido ñue úritio, o comeci fiénide íadi. ¿Jadí ráiidio ocuica uai daina izói cuemo jicánollena? Iemona ¿ñibái mei ocuícáfue uáitano cue fúena putátatio? —daide.

<sup>4</sup> Iemona afénori itino íena daidíaioi:

—¿Ñibái daí Juzíñamui caifoide lletáriraimana báíñotio? —daidíaioi.

<sup>5</sup> Jira Pablo daide:

—Amatiai, afémie caifoide lletáriraima ie íllana onóñedicue. Onódicueza Cuegáuailai daide: “O jofue ríimacina báíñoñoeno iri,” —daide.

<sup>6</sup> Iemona Pablo Nahí Ríillaini cígimo itínona fidide. Afémacimona dárie fariséuaimo jaináidiaioi. Jiáimaci saducéuaimo jaináidiaioi. Ie jira íaioina riire daide:

—Amatiai, cue fariséodícue. Afe emódomo fariseo ímie jitódícue. Ja birui cuemo jicánotiaioi, mei tíidimaci meine abido cáailiruimo cue úíñua jira, —daide.

<sup>7</sup> Daí daina meífomo, fariséuai saducéuai diga conímamo jofu afefue riire júfidotiaioi. Iemona afénomo garírdino dázierie bozíetaidiaioi.

<sup>8</sup> Afe saducéuai tíidinona meine cáañeite daidíaioi. Afe emódomo Juzíñamui abi imácina íñede, daje izói joríaiaina íñede daidíaioi. Mei íadi fariséuai nana aféfuiaimo íñotiaioi.

9 Nana caillídiaioi. Ie mei dáríe ocuícuaui llófueraíni naidáidiaioi. Afémaci fariséuai dibénemo jaináidiaioi. Caífo naidáillano daide:

—Bímíe fiénidífuiaína caído llócaíñede. Níbai joreño íemo úrilla; níbai Juziñamui dibénedo úaitañeíticai, —daídíaioi.

10 Afe júfiduafue riire anado jaide. Iemo llaizíraini illaíma Pablo íaioi tibéruari jacínaite. Ie jira aféllaíma íaioi cígimona Páblona llaizírainina oni uitátate. Uillano meine íaioi gairíracomo íena orétate.

11 Afe jíáíe naio Ocuíraíma Jesús Páblomo cíocaillano daide:

—Pablo, jacíruiñeno, abí mame. Benó Jerusalemo cuedo o úrilla izói, daje izói Rómamo úrizaitio, —daide.

### *Pablo fállena mámiafue*

12 Afe jíáíruido judíuaimona dáarie Pablo fállena mamértiaioi. Dani íaioi abí faidódiaioi. Jira fiénide uáillaido daídíaioi:

—Páblona nai cai fáñeille dino güñeíticai, jíroñeíticai, —daídíaioi.

13 Afe daíí úritimíai cuarenta baímo jaide.

14 Iemona afémaci lletáriraini illáinimo naa judíuai éinamacíri jáidiaioi. Dinomo daízaidiaioi:

—Dani cai abí fiéni daináfuedo faidódicai. Pablo cai fáñeille dino güñeíticai, jíroñeíticai.

15 Mai omoí naa jíáíe Nahí Ríillainíri llaizíraini illámamo Pablo uire jiti atíllifue jica. Fia daíí íemo lloíri, meine nane íemo itífue izire omoí jicánollena. Afémíe nai dúcíñeite, afe atica llaítada íena títaíticai, —daídíaioi.



16 Mei íadi Pablo comoma afe Páblona íai*oi* fáiacanafuena fidíizai*bite*. Iemona afémie llaizír*aini* gairíracoma Páblona lluájide.

17 Mei jira Pablo jabólla*ima* jíirillano daide:

—Bie jitócome llaizír*aini* illáimamo úi. Afémiemo llollífuena íteza, —daide.

18 Afe jabólla*ima* íena uillano, llaizír*aini* illáimana daide:

—Afe llaveca Pablo cue jíirillano bie jitócome benó cue atíllena jicade, afémiemo da llollífuena íteza, —daide.

19 Afe llaizír*aini* illa*ima* afémie ónoído oni eneno jicánollena uite; daide:

—¿Níi fue cuemo llóiacadio? —daide.

20 Jira afémie daide:

—Judíuai jae nana dáfuerillano meine comeci facádia*oi*. Uire jiti Pablo Nahí Ríill*aini* uícomo meine o atíallifue jicaitia*oi*, meine íemo izire íai*oi* jicánollena.

21 Mei íadi íai*oi* jicállifuemo íinoñoeno iri. Afémacimona cuarenta baimo dígamie báinino Pablo fállena jóonetia*oi*. Afe fáiacadino daní íai*oi* abi faidódia*oi*. “Pablo nai cai fáñeille dino, güíñeitica*í*; daje izói jíroñeitica*í*,” daidía*oi*. Ja birui afémie fállena ñue finóbidia*oi*. Mei íadi o uai ollífuemo nai úiñoidia*oi*, —daide.

22 Iemona afe llaizír*aini* illa*ima* afe jitócomena:

—Mai o jairi, —daide. Afe íemo ie lluáibigafuena jíáimacimo “Lloñoeno iri,” daide.

*Caifóidilla*ima* Félixmo Páblona orédia*oi**

23 Mei jira afe llaizíraini illaïma mena jabóidillaïma uáidote. Uáiduano íaillinoïna daïde:

—Mai doscientos diga llaizíraini mácaïtinona finóbitari. Afe llezica setenta dígamie cabállodo jáïtinona finóbitari. Afe emódomo doscientos dígamie zídaïari jáïtinona finóbitari. Nana afémaci nauilla baido Cesaréamo jáïtiaïoi, —daïde.

24 Afe llezica Pablo jaille cabállona finóbitade. Daje llezica Pablo ñue fañeno cáanori caifóidillaïma Félixmo uitátate.

25 Afémacido ciegabe orede. Afe ciegabe daïde:

26 “Cue Claudio Lisias mamécacue. Jamánomo cáïmafuerede caifóidillaïma Félix, o uáidotiecue.

27 Judíuai bímie lláïtano duere finótaacadiaïoi. Iena fáïacadiaïoi. Mei ie romano ímie íllana cue fidínamona cue llaizírainido íena ríïduaidiecue.

28 Iemo íaïoi jítácafuenta onóacadiecue. Ie jira judío Ríïllaini uícomo íena uitátaticue.

29 Ie mei aillo íemo júfidogafue záïlla meífomo íemo nífuena baiñédiecue. Dani íaïoïmo ocuica uai ie jeire ie oñena íemo nitádiaïoi. Mei íadi ie cue fallífuena iñede. Daje izóï ie cue llavéllifuena iñede.

30 Dani afémie íaïoi nane fáïacanafuena cue fidínamona, íena omo orédiecue. Afe llezica nana íemo fiénidífuiai nitádinona daïdiecue: Mai Páblomo nífue o nitáadi caifóidillaïma Félix uícomo o daïzairi. Mai, jae ñie.”

31 Mei jira nana llaizíraini íaïoi illaïma ocuilla izóï Pablo uitíaïoi. Afe naïo Antípatris jófuemo íena uitíaïoi.

32 Afe jítiramo eíbado jaide llaizíraini meine íaïoi iníracomo bitíaïoi. Ie mei cabállodo jáïdino Pábloïri nai Cesaréamo jáïdiaïoi.

<sup>33</sup> Dinomo afe Cesaréamo dúciillano, afémaci uiga ciegabe caifóidillaímamo izájidiaioi. Daje izói Pablo íemo fecádiaioi.

<sup>34</sup> Afebe facádua meífodo, caifóidillaíma jicánote:

—¿O nino ímiedo?

Pablo uai ote:

—Cilicia énie ímiedicue, —daide.

<sup>35</sup> Ie jira íena daide:

—Omo fiénidífuenta nitádino bíadi ona cácaiticue, —daide.

Afe mei Félix Páblona Herodes illaíma illaco áillocomo rairuítatínona uitátate, afécomo íena íaioi ñue rairuíllena.

## 24

### *Félix uiécomo Pablo abi ríiduafue*

<sup>1</sup> Jubécuiro dígarui illa meífodo lletáriraini illaíma Ananías Cesaréamo bite. Afémiedo dáríe éinamaci bitíaioi. Dáruido, caifóidillaíma uiécomo raire úritímie bite. Afémie mámecei Tértulo. Nana afémaci caifóidillaíma Félix uícomo Páblomo jítacafuiai nítaíbitiaioi.

<sup>2</sup> Pablo íaioi átia llezica, Tértulo íemo jíidífue riire nítade. Félixna daide:

—Cai izíruiga caifóidillaíma, ori ióbiacadícaí. Ñue záillafue caimo ite; íemo caimare llícaillafuemo itícaí. O fibíllafuedo nana ñue ocuícacai.

<sup>3</sup> Nana bífuiairi nágagobiaído ióbioídícaí. Félix o iere jamánomo fígomiedo.

<sup>4</sup> Mei íadi are o cue áfedoñeilleza cai úrillamo o cacáreillena omo izire jicádicue.

<sup>5</sup> Bímie fiénide duico billa izói bíllana ciódícaí. Naga éniáido llócaide judíuai oni énenorie

bozíetaillena. Afémié Nazaret ímie Jesumo ínotino ífódímie.

<sup>6</sup> Icoimo cai Juzíñamuimo gairíracó ero bácajide. Ie llaítádícaí ñue afémiemo cai ocuina uai daína izóí jicánollena.

<sup>7</sup> Mei íadí llaízírainí illaíma Lisias aféfuemona caína rairuide. Iemona cai anámóna íena ríífuedo oní baírode.

<sup>8</sup> Afe emódomo caína daíde: “Bie cómemo bi-fue jítádino odo bírediaíoi.” Dama o afémiemo jicánorena, nana íemo cai jítácafue uáfueíteza. Daíí áfena uáfueña onóítio, —daíde.

<sup>9</sup> Afénomo jaide judíuai nana aféfuiaína uáfuiái daídíaíoi.

<sup>10</sup> Jira Pablo úrillena caifóidíllaíma ónoído llote. Jira Pablo daíde:

—O uícori cue abí rííduafue jino caímare llóíticue. Jaíai díga fimona bie nairái o jicánoraímana o íllana onódicueza.

<sup>11</sup> Ja doce dígaruí íllamona Jerusalemo Juzíñamuimo áinozillano íemo caímare úrillena dúcidicue. Aféfuena dama o jicánorena, ñue o ónoillena.

<sup>12</sup> Bumo ríire cue úrillana cacáñediaíoi. Daje izóí Juzíñamuí gairíracó como comínina fiéni faillíñaitañedicue. Iemo jíái Juzíñamuí llófueriracóo daje izóí júfidogafuíái finótañedicue. Daje izóí nairái jófuedo nífuena lloñedicue.

<sup>13</sup> Nana bimací cuena nitácafuiáína bu áfena ua-fue daínina.

<sup>14</sup> Mei íadí dafue jino llóíticue. Judíuai fiéni mameca fiénidíodo jáidicue. Afe como Jesús lloga íodo cue jáillamona cai uzútíai Moo Juzíñamuimo táijidicue. Mei nana cuega ocuica uáillaína

ñnoticueza. Afe daje izói nana uai jino lloraini Cuegánicuaïmo ite uáillaina ñnoticue.

<sup>15</sup> Iaiói Juzíñamuïmo úiñoïnafue daïde: “Tíidino ñúemaci fiénidimaci diga meine abido cáaitiaïoi.”

<sup>16</sup> Ie jira Juzíñamui uiécomo nífuenidimïena cue illena jaca nágarui cue comeci ñue finófiredicue. Afe izói comini uícomo nífuenidimïena íacadicue.

<sup>17</sup> Ja diga fimona jiáinuiaïmo cue maca meífomo, meine cue éniemo Juzíñamuïmo fia fecaca úcube izáibiticue. Afe izói dúredimacimo dúecaillano úcubena fécaibiticue.

<sup>18</sup> Afe daií cue feca llezica, cue comécimo ite íaïfuaï cue múiñuafuemo nícidoticue. Daií cue comeci nícidua meífodo afe úcube cue fecalle llezica, dárie Asia énie judíuaï Juzíñamuïmo gairiracomo cuena baitíaïoi. Afénomo nai comínina figo iñena llezica iticue. Afénomo ite comínina jaca buna faillíñaitañedicue.

<sup>19</sup> Afénomo cuena ciódino benomo cuemo jítaibirediaïoi, cuemo ní fue íaïoi nitáadi.

<sup>20</sup> Mei jiáïfodo nauï judíuaï Nahí Ríillaini uiécomo cue illa llezica fiénidifue cuemo nauï íaïoi báïadi, benomo ite aféfuena cacádino mai jino lloiri.

<sup>21</sup> Aféruillaido íaïoi cígiri cue illa llezica dafue riire íaïoïmo lloticue. Daïdicue: “Ja birui cuemo jicánotiomoï tídimaci meine abido cáaillifuemo cue ñnua jira.” Dïno Pablo úrite.

<sup>22</sup> Félix Pablo daií dánana cacáillano, aféfuena dïno fiénocaide. Afe Jesucrístomo dibénemo itino finócafuaïna Félix ñue fibídimïe. Ie jira aféfuena dïno fiénocaide. Fiénocaillano daïde:

—Fui llaiáiraini illaima Lisias dúciadi bie ómoimo itifue afémie cuemo ñue jino llóite, —daide.

<sup>23</sup> Iemona Félix, jabóidillaimana ocuúde Páblona nai zuitatañellena. Mei íadi ie comini ie uáiduaibillena rairuñede. Afe izói ie íaioi cánuaibillena jeruñede. Afe daí Félix Pablo figo riire llavétañede.

<sup>24</sup> Afemona afe mei dígarui íllamona, Félix meine dúcide ie ai Drusila diga. Afengo judío ingo. Félix Pablo jíritade Jesucrístomo ínuafuedo úrillena.

<sup>25</sup> Afe ínuafuedo úrilla llezica Pablo ñue jaína jáillifuedo úrite. Afe daje izói ñue comini íllena abi rairuínafuiai llote. Ie émodomo írairuimo comini jícanollifue jino llote. Aféfuiaina cacáillano, Félix jacínaite. Jacínaillano daide:

—Mai birui jai, uire cue jítaílliruido nane ona jíriticueza, —daide.

<sup>26</sup> Afe jíáfue Félix, Pablo ie zuitalle úcube fecalle úiñote. Ie jira diga ícaíño Félix íena jíjírude ie diga úrillena.

<sup>27</sup> Mena fimona daí íhidiaioi. Afe mei Félix ie illáimana illano faicanocaide. Ie meífomo Porcio Festo illáimana jóonetiaioi. Félix judíuai uícori ñue íacanamona llavécamié Páblona zuitáñeno oni jaide.

## 25

### *Pablo Festo uícori abi ríiduafe*

<sup>1</sup> Ie meífomo Festo ja illáimana bite. Afe mei daruíamani íllamona Cesaréamona Jerusalemo jaide.

<sup>2</sup> Dinomo lletáiraini illaini naa judíuai ríimaciri Páblomo íaioi nitácafuiái nane Féstomo llotíaioi.

<sup>3</sup> Jerusalemo abido Pablo oréllena izire jicádiaioi. Pablo io anamo íaioi fallífuena maméritiaioi.

<sup>4</sup> Mei íadi Festo íaioi uaimo daide: Pablo nai Cesaréamo llaveca. Nano íanori íllamona afénomo nane jáitícue.”

<sup>5</sup> Jira íaioina daide:

—Ie jira omoi cígiri ite ríimaci mai cuedo Cesaréamo jairi. Aféniemo ní fue íadi dinomo íemo ní tajiredíomoi, —daide.

<sup>6</sup> Festo afe Jerusalemo nano ocho nibai diez dígarui illa meí fodo meine Cesaréamo bite. Afe jíáiruido ie ríire jicánoranomo ráinazaide. Páblona atítate.

<sup>7</sup> Pablo afénomo jofó jáidemo, Jerusalémona como dúcide judíuai íemo áinozidiaioi. Áinozillano aillo fiénide ráfuiái íemo ní tádiaioi. Mei íadi aféfuiaimo íinollífuena íñede.

<sup>8</sup> Mei jira Pablo ie abí ríiduafuena daide:

—Cue nie fiénidífuena finóñedicue. Judíuai ocuícafuiái uáitaoiñedicue. Íaioi gairíracó ero bácañedicue. Daje izóí romano caifóidíllaima uáillaina uáitaoiñedicue, —daide.

<sup>9</sup> Mei íadi Festo judíuai cígiri ñue íacade. Jira Páblomo jicánote:

—¿Jerusalemo abido jáiacadió omoi ní tácafuiái dínomo cue jicánolleza? —daide.

<sup>10</sup> Jira Pablo uai ote:

—Ja birui romano illaima uí como náidadicue. Ja benomo cuemo ní tácafuiái jicánorede. Mei judíuaimo ní fuenidímedícueza ñue onódío.

<sup>11</sup> Cue títaite fiénidí fue cuemo íadi, áfemona abí jáanoñeitícue, mei íadi nana cuemo íaioi ní tácafuiái

táinofue íadi, buna íaioimo cuena ríifuedo izájinide. Dama romano jamánomo ocuídillaíma cuemo jícano daidícue, —daide.

<sup>12</sup> Iemo ie fidítatimíiaímo úrilla meífomo, Festo daide:

—Mei “Jamánomo ocuídillaíma cuemo jícano” daidíóza, ie jira afe jamánomo ocuídillaímamo ona óreiticue, —daide.

*Pablo illaíma Agripa uíécomo illafue*

<sup>13</sup> Diga irui illa meífomo illaíma Agripa ie ai Berenice diga Cesaréamo Festo uáiduaide.

<sup>14</sup> Afénomo diga irui itíailinoímona, Festo Pablo rafue Agrípamo llote. Iena daide:

—Félix fiénoaiga llavécamié nai benomo ite.

<sup>15</sup> Naui Jerusalemo cue jailla llezica, lletáriraini illaini, naa judíuaí éicomíniri íemo íaioí nitácafuiái cuemo llotíaioí. Ie duere cue finótallena cuemo jícadíaioí.

<sup>16</sup> Jira íaioí uai otícue. Iaioína daidícue: Romano ríimaci íaioí fibilla izóí, afefue nitádimie íemo nitácamie uíécomo conímamo jofo eróicana nai úriñenia, nitácamiena fañédiaioí. Afe daíí táinofue nitácamie ie abi ríiduafuena finórede.

<sup>17</sup> Ie jira afémaci benomo billa llezica, raíre afe jíáruído cue jícanoranomo ráinazaidícue. Ráinazaillano afe cómena atítaticue.

<sup>18</sup> Mei íadi afémiemo nitáдино cue comeci daína izóí nitáñediaioí.

<sup>19</sup> Daa íemo íaioí nitácafue fia íaioí íinogafuiáimo jaináidífue. Daje izóí da Jesudo úritiaioí. Afémiena tíide daidíaioí; mei íadi Pablo “Caade” daide.



<sup>20</sup> Mei aféfuena onóñedicueza. Nie izói aféfuena níbaíticue, daídícue. Jira Páblomo jicánoticue: ¿Jerusalemo meine jáiacadio dínomo omo nitácafuiái ñue jicánollena?

<sup>21</sup> Mei íadi afémeie jamánomo ocuídillaíma Augusto íemo jicánollena jicade. Ie jira nai íena zuitáñedicue. Iena rairuídícue jáíruido afe caifóidillaímamo ie cue oréllena, —daíde.

<sup>22</sup> Jira Agripa Féstona daíde:

—Cue jáíi daje izói afe íima uaimo cacáreacadícue, —daíde.

Jira Festo uai ote:

—Uire jiti cácaítio, —daíde.

<sup>23</sup> Afe jítiramo, Agripa Berenice díga dúcillano, áillue gairíraco nana jofo jáidiaíoi, naa llaíziraini illáiniri, naa jofue ríimaciri. Ua aillo ebire finóbillano jofo jáidiaíoi. Dínomo Festo Pablo jíiritade.

<sup>24</sup> Afe mei Festo illaíma Agrípana daíde:

—Illaíma Agripa, nana cairi benó gairídinori, omoi cácarei. Bímiemo omoi eroi. Aillo judíuai afémiedo cuemo úritiaíoi. Benó Cesaréamo cuemo úritiaíoi; daje izói Jerusalemo izire cuemo jicádiaíoi. Jaca fáinocaiñeno ie titácanafuena cuemo llotíaíoi.

<sup>25</sup> Mei íadi afémiemo comeci facádicue, íadi ie cue titállifuena íñede. Mei caifóidillaíma Augusto íemo jicánollena dama jicade. Jira afémiemo íena oréllena mamédicue.

<sup>26</sup> Mei caifóidillaímamo afémeie rafue cue cuellífuena íñede, ¿nífue mei cúeiticue? Ie jira, Agripa, bímie o uiécomo atídícue íemo

omoi jicánollena. Afedo caifóidillaímamo cue cuellífueña ónoíticue.

<sup>27</sup> Mei cue comeci daide: Da llavécamié cue oréadi, íemo íaioi nitácafueña óñoñenia, nibai afefue táinofue, —daide.

## 26

### *Illaima Agripa uícori Pablo abi ríiduafue llote*

<sup>1</sup> Jira afe Agripa Páblona daide:

—O dama o abi ríiduafueña llórena, —daide.

Iemona Pablo como fueñe íaioimo úrite; daide:

<sup>2</sup> —Illaima Agripa, cue abi ríidollifue o uícomo cue llóleri íóbídícue. Nana judíuai cuemo nitaca táinofuiai jino jaícina llóíticue.

<sup>3</sup> Nana judíuai fibíllafuiaiña ñue onódioza. Daje izói conímamo cai úrillafueña onódio. Aferi iere íóbídícue. Ie jira fiaicana cue úrillamo o cacáreillena jicádicue.

### *Pablo íemo itifue méiduafue uícomo finócafui*

<sup>4</sup> Nai cue úruenamona dama cue éniemo, daje izói Jerusalemo íaioi cígiri nana judíuai cue illáfueña onódiaioi.

<sup>5</sup> Daje izói cue jitócomenanomona fariseo ímiena cue illana onódiaioi. Afémaci jitaia aféfueña jino llóredícue. Cai ínogafuiaiimo afe fariséuai jamánomo riire jaináidino.

<sup>6</sup> Iaioi ínogafue izói Juzíñamui tíidino meine abido cáatallifueño ínotícue. Juzíñamui daje afe cáallifue cai jáairagímamo llote. Afefue ícoinia birui bie jicánollifueño cuena atídiaioi.

7 Cai Israel doce nairai afe uícomo llogáuai fuizájillinomo úiñoidiaioi. Ie jira mona naio diga Juzíñamuimo áinozillano caimare úritiaioi. Afe izói íemo táijidiaioi. Illaima Agripa, afe bie daje úiñogafue ícoinia, judúuai fiénidifuiái birui cuemo nitádiaioi.

8 ¿Nibái mei daí comeci facádiomoi? ¿Nibái mei afe Juzíñamui tíidino meine abido cáatallifuemo buna ínonide, daidíomoi?

*Pablo nauí Jesucrístomo ínotino rácafue*

9 ‘Nazaret ímie Jesús mámecimo jaináidino duere cue finótallena, nauí aféfuemo comeci facáoidicue.

10 Iemona Jerusalén imácina duere finótaticue. Lletáriraini illaini ríibiaido aillo Jesumo ínotinona llavéracomo íbaicotadicue. Comini afe llavécamací titáacana llezica aféfuena fairíoticue.

11 Diga icaíño íaioina duere finódicue, íaioi ínogafue féitallena. Afe duere finótafue naga llófueriracuaido daí finódicue. Afe ínotinona jamánomo fiéniruidicue. Ie jira afémacina onínemaci jófuemo racádicue.

*Pablo íemo itifue méidoinafue nane llote  
(Hch 9.1-19; 22.6-16)*

12 ‘Bie daí comeci mamérrillafuedo Damasco jófuemo jáidicue. Lletáriraini illaini ríibiaido comini llaitállena orécaque.

13 Mei íadi jáiciri ia iodo jáidicue, jamánomo monámona riire cuemo egáíñoacide. Afe egáíñua jítoma egáíñua baimo meáirede. Cue abimo egáíñoacide naa cuedo jáidíori.

14 Iemona nana éniemo bajídicaí. Hebreo uáillaido monámona cuena daínana cacádicue;

cuenta daide: “Saulo, Saulo, ¿nibái mei cue racáidío? O dama o abi fiendi finódío. Aillue juráreto jírúrainomo ite jáirede razi. Afe rázimo juráreto záitacailla jilla izói, afe izói dama abi daí finódío” daide.

<sup>15</sup> Jira uai oticue: “Ocuíraima, ¿mei o búidío?” Jira afémie cuenta daide: “O racácamie Jesúdicue.

<sup>16</sup> Mai náidacaillano macácana jai. Jae cuedo o táijillena omo cíocaidicue. Afemona birui o cíónafuemo uai nabáiraimana íitío. Ie meífomo jíáiruido jíáifuiái omo ácataiticue. Aféfuiaimo nane uai nabáiraimana íitío.

<sup>17</sup> Ja judíuaimona jíáie jicáneziemo ona orédicue. Dinomo ona lláitaitiaíoi íadi ona jíllotaiticue.

<sup>18</sup> Dinó afeno imácimo ona orédicue, íaíoi comeci o zuitállena. Afemona, jítifodo íaíoi macáñeno úzefodo íaíoi macállena o orédicue. Daje izói nana íaíoimo ona orédicue Taife íaíoi náamatañellena, mei íadi Juzíñamui dibéfomo íaíoi jaináillena. Afe izói íaíoimo ona orédicue cuemo íaíoi ínollena. Iemona íaíoimo ite fiénidifuiái dóficaite. Afe fiénidifuiaina dóficaidino íaíoi feci raa máíñoitiaíoi naa jíáie Juzíñamui ñue finócamaciri,” daí Jesús cue ocuide.

*Nícaí anado Jesús íemo ocuícáuai Pablo jeire ote*

<sup>19</sup> ‘Mei jira, illaíma Agripa, monámona cue cacánafuena jámairuiñedicue; mei íadi áfena jeire uano fueñe Damasco imácimo afe úrilla uai jino lloticue.

<sup>20</sup> Afe meífomo Jerusalén comínimo daje izói nana judea éniédo llócaidicue. Afe izói jíái judíoñedinomo llócaidicue. Nana íaíoimo itífuiái íaíoi meídollena riire lloticue. Iemona Juzíñamui

dibénemo íaiói íficaillena íaiói llófueticue. Ñúefuiaido íaiói macállena llotícue íaióimo ite meídogafue jino ácatallena.

<sup>21</sup> Afe bífuiaí cue llua ícoínia, judíuai Juzíñamuimo gairíracomo cuena llaítada fáiacadíaíoi.

<sup>22</sup> Mei íadi Juzíñamui cue cánuado nai biruimo ñue jáicadicue. Naga cómemo, illáicomíni naa jamái comíniri Juzíñamuido úricaidícue. Moisés llua izóí llotícue. Jaiái uai jino llóraini llua izóí llófueticue. Nana íaiói lloga caímo íficaitífuiaí jino llotícue.

<sup>23</sup> Jaiái ninomo uícomo llotíaíoi: “Cristo duere finólleza,” daídíaíoi. “Afe meífomo tíite; tíillano meine abido cáate. Afe daí fueñe tíidímiemona meine abido cáaitímiemona maméllímiemona.” Daí aféfuena daídíaíoi. Afe emódomo jíáífue daíde: “Cristo cáaillemona, comíni jíilloíllí fue jino llóite. Ua caí náiraimo llóite. Daje izóí jíáíe náiraiaina fidítaite,” —díno Pablo úrite.

*Pablo Agripa Jesucristo dibénemo jáináillena llote*

<sup>24</sup> Daí Pablo afe abí ríiduaí fue llua llezica, Festo caillíoicana daíde:

—¡Pablo, o uáírítaidío! Aillo rábiaí o facáduamona o ífoci uáírítaíde, —daíde.

<sup>25</sup> Jira Pablo uai ote:

—Fígómie Festo, cue uáírícoíñedicue. Mei jíáííodo cue daínáuái ñue comécido facádorede. Aféfuiaí uafue.

<sup>26</sup> Benori illáima Agripa ite, bífuiaína ñue onódímie. Ie jira comeci mánainafuedo afémie uíécori úritícue. Afémie nana bífuiaína ie onónana ñue onódicue. Afémie nana bífuiaí báinino izúgumo lloñégaza onode.

27 Illaïma Agripa, ¿uai jino llóraini llogáuaimo ïnotio? O ïnuana onódicue, —daïde Pablo.

28 Jira Agripa daïde:

—¿Jesucrístomo afe dibénemo cue jaináïllena raïre cuena íficaitaacadio? —daïde.

29 Jira Pablo íena daïde:

—Raïre Crístomo jaináïdimïena o íficaiadi, o are ïllamona Crístomo jaináïdimïena o íficaiadi, nai birui Juzíñamui uaillai ñue jeïre o ollifue jicádicue. Afe izói dama óieñedeza mei íadi cue Jesucrístomo ïnuua izói nana cue úrillamo cacáreïdino Crístomo ñue ïnotinona jitáidicue. Mei íadi llójeina cue máïina izói ómoïna maitátacañedicue, —daïde.

30 Pablo aféfuiai llua meïfomo, illaïma Agripa caïfo náidacaïde, afe caïfóidillaïma Festo diga. Afe llezica ie ai Berenice nana dinó ráïiedino diga caïfo náidacaidiaïoi.

31 Náidacaïllano bai eneno jáidiaïoi aféfuiaïdo úrillena. Dinomo jofo conímana daïdíaïoi:

—Baïe cómemo ie titállifuena ïñede. Daje izói llavéracomo ie llavéïllinona ïñede, —daïdíaïoi.

32 Jira Agripa Féstona daïde:

—Bímie nauï jamánomo ocuïdillaïma íemo jicánollena jicáñeniadi ja birui zuitárede, mei íadi báïllaïmamo jicádeza zuitánide, —daïde.

## 27

### *Pablo Rómamo oréïnafue*

1 Pablo Itáliamo oréïllifuemo maméritiaïoi. Iemona Pablo naa jáïe llavécamiïari jabóidillaïma Júliomo izájidiaïoi. Afémie Augusto llaizíraini igüéllimo jainaïde.

2 Iemona Adramitio ígobemona áillue nocaedo jáizaidicai. Afecae nana Asia énie ígobiaido zíjicana ja jáizaide. Daje llezica Tesalónica ímie Aristarco caído jaide. Tesalónica Macedonia énie jofue.

3 Afe jítiramoidiruido Sidón ígobemo dúcidicai. Afégobemo Julio iere caimare Páblomo úrite. Iemona Páblona rairuíñeno ie onóigamiaina uáiduajitade. Afe daí ie onóigamiaina Pablo jitaica raana fecárediaioi.

4 Sidón ígobemona jáidicai. Jaillano monáillai cigi idu Chipre jarífezimo fiéoicaidicai, mei jairifo jáífodo cai ñuitáocaillamona.

5 Dinómona Cilicia énie áinodo Panfilia énie diga baido monaillai cigido jaitádicai. Afe mei Licia éniemo ite Mira ígobemo zíjidicai.

6 Dinomo llaizíraini illaíma Alejandríamona bite, Itáliamo jáizaide áillue nocaena cíozaide. Afécaemo afémie caina nana jofo orede, afénomona afécaedo cai jáillena.

7 Dinómona diga irui fíaicana juare jáidicai. Icoímo Gnido jofue féifenemo dúcidicai. Mei jairifo nai jáífodo oni cai ñuitáocaillamona monaillai cigi idu Salmón féifenedo jáidicai. Ie jira monaillai cigi idu Creta onido nefícana jáidicai.

8 Afe monaillai fue áinodo fíaicana juare jáidicai. Icoímo Buenos Puertos mámeciredinomo dúcidicai. Afégobe Lases jofue áinori ite.

9 Jae diga iruillai fia fíaicana jáidicai. Iemo ja uáicimo áinozidicai. Iemona monaillai cigido cai jaitalle jamánomo jacírede. Ie jira Pablo íaioina izire llote;

10 daide:

—Cuemo úrillamo omoí cácarei. Bie cai ruica cai jaille onódicueza iere jacíreite. Cai uiga ráaniai niné táinocaite. Cai jaille nocáe daje izói táinocaite. Daje izói cai nibai coróbaizaiticai, — daide.

11 Mei íadi llaizíraini illaima nocáe naama jáiacanafue Pablo dainafue baimo jeire ote. Daje izói afecae illaima daina uai llaizíraini illaima jeire ote.

12 Afégobe uáiciai úiñollena figo jínoinede. Ie jira nana comécido daidíaiói: “Nibai Fenice ígobemo jáidicaina figora izoide,” daidíaiói. Afégobe Creta énie mona icoi dibénemo ite. “Afe dinomo uáici záillena úiñoiticai,” daidíaiói.

*Monáillaimo jamánomo riírede jairifo noci diga jáiñuafue*

13 Afe jíáiruido mona átue dinena jairifo fíaicana fúuoide. Jira áfemo ínotiaíói ruica íaiói jáitallena. Afemona jáizaidicai. Afe Creta énie áinodo jáidicai.

14 Mei íadi due afe meífodo riírede jairifo cai jailla nocáe riire ñúitáibite. Ua afecae riire aiñóicaide.

15 Mei cai jáiacananomo jáinina jira, “Dama jairifo niné uigacai,” daidíaiói.

16 Iemona duera monaillai cigi idu Claudia jinófenedo jáidicai. Dinomo jairifo caina riire fúuoinede. Ie jira cai abido uiga dúecae, fíaicana juare caifo bitádicai.

17 Dúecae bita meífomo, áillocae jéerie ñécigaído riire jofo mozidicai. Afe mei guamáeamo íaiói bíjizai dáíi jacíruitiaíói. Afe guamáesai mámecei Sirte. Afe jágiedo íaiói ñuite vela daina áillue



inirroi ana zúicoidiaioi, cai nocáe fia jairifo fíaicana úillena.

18 Afe jáíruido afe jairifo riire jaiñode. Ie jira íaioi uiga ráaie como fueñe afécaemona monáillaimo dócoidiaioi.

19 Ja daruíamani íllamo nocáe ero táijina ráaniai dani cai ónoido monáillaimo fádoídicaí.

20 Aféruillaido diga irui jitoma naa úcuai diga cióñena. Dinomo afe riirede jairifo llavécamiiai izói duere cai finode. Iemona nana jílloillena cai comécinafuiai niné táinocaide.

21 Ja diga iruillai güiñeno iticaí. Ie jira Pablo íaioi cígimo naidáillano daide:

—Nana omoí cácarei. Naui Crétamona jáiñeiticaí cue daina uaina jeire oñédiomoí. Afe cue daina uaina ñue ínotiomoinia bie izói duere zefuíñedicaí. Daje izói nana cai atica ráaniai niné táinocaiñede.

22 Mei íadi, birui omoí jacíruiñeno iri. Bie no-caena niné táinocaite mei íadi ómoimona buna tíiñeite.

23 Mei ja naio Juzíñamui oreca ie abi ímie cuemo daiízabite. Afe Juzíñamuimo jaináidimiedicue. Afe izói íemo táijidimiedicue.

24 Afe oreca abi ímie cuena daide: “Pablo, jacínaiñeno iri. Romano jamánomo ocuídillaíma uícomo náidazaitioza. Ie jira o illa ícoinia nana nocaedo odo jáidinona Juzíñamui tíillinomona jílloitaite.” Dinó Juzíñamui oreca ie abi ímie cuena daide.

25 Ie jira abí omoí mameri. Juzíñamui uaimo ínoticueza. Ie oreca ie abi ímie cuena daina izói

bie cai duere zefuállafuemonã ñue jino jáiticaiza. Afe bífuena ñue onódicue.

<sup>26</sup> Mei íadi benómonã daa monaillai cigi ídumo jairifo caina nétaite, —daide Pablo.

<sup>27</sup> Mena semana cai jailla meífoto daa naio Adria monaillai cai illa llezica, riírede jairifo meine abido caina úioicaide. Iemo dáaferui illa llezica, marinéruai éniemo cai áinozillana comécido onódiaioi.

<sup>28</sup> Jira nié dinó afórede daínano facádiaioi. Facádiaioimo treinta y seis metros afórede. Nane afe baimo dáanomo facádiaioi. Ja veintisiete metros afórede.

<sup>29</sup> Noficiaimo íaioi ñáijizaillana jacíruillano moi dibécaemonã cuatro diga nocáe cuinara lloéloici monaillai anamo dotádiaioi. Afe mei comeci jacíruioicana monã monaille úiñotiaioi.

<sup>30</sup> Afe llezica afecae marinéruai “Bie áillocaemonã mai cai botallí” daní conímana daidíaioi. Afe daíí íaioi botácanamonã emódomo bitaca dúecae ana jáinoimo agüínetiaioi. Afe llezica jáíimacina jífueacana daidíaioi: “Bie dúecaedo áillocae ifo dibécaemo jáíie cuinara lloéloici dótaiticai,” daidíaioi. Daíí afe nocáe ana agüíniado jífuercadiaioi.

<sup>31</sup> Mei jira Pablo llazíraini illáimamo naa ie llazírainiri lluanõ daide:

—Baimaci bie nocaemo fiébiñeno botáadi ómoimona buna jíllõñeilleza, —daide.

<sup>32</sup> Ie jira llazíraini dúecae agüina ñécigai jaitádiaioi, afecae illemo baiíllena.

<sup>33</sup> Afe monáidemo Pablo íaioina daide:

—Mai omoí güiri. Ja menã semana güíñédiomõiza; iniñédiomõi.

34 Izire ómoína güitátaticue. Afe omoi güille jítáirede ñue omoi jilloillena. Uafue ómoimona buna córobaiñeite. Daje izói omoi abímona minícana due jiza báiiñeite.

35 Daií daínano, Pablo daa pan llínuano nana comini eróicana Juzíñamuina “Iere figura” daide. Daií ñiano afe pan ditade güite.

36 Afemona nana náirefcaidiaioi. Afe daje llezica jáino güitíaioi.

37 Afe áillocaemo doscientos setenta y seis dígamiedicaí.

38 Ja íaioi güiácala güille güilla meífodo, fiévide trigo illemo dotádiaioi, afecae féecocaillena.

### *Afecae buíllafue*

39 Jae monáidemo, afe éniena onóñediaioi, mei íadi guamai díga ñue itízuguaina ciódiaioi. Onóñegaza afénomo íaioi zíjizaillena maméritiaioi.

40 Iemona afecae cuinaina lloélloici igai jaitádiaioi. Afe lloélloici monáillai anamo fiébicaide. Afecae datara jairábiai zuitádiaioi. Afe mei afecae uite iniroi ifófecaemo caifo jairífomo jónetiaioi. Iemona afecae oni guamáemo áinozioicaide.

41 Mei íadi mena meine ábiedo totínuaímo dúcídiaioi. Iemona afecae afénori ite guamáemo bíjide. Ifófecae afe guamáemo jamánomo riire bíjide. Mei íadi móifecae nai ñue fairídemo, monaillai bagua niné llaizéraga.

42 Jira afécaemo ite llaizíraini llavécamiiai fáiacadiaioi, “fihíi bótaitiaioi” daínano.

43 Mei íadi afe llaizíraini illaíma Julio Páblona jíllotaacade. Mei jira íaioína fatátañede. Jáífodo

ocuide nana íiana onódino illedo ícana raire uícomo dúcillena.

<sup>44</sup> Jiáimaci íiana onóñedino afe nocáe lláicoizillabici emódodo jáitate. Daií nana oni fuédamo dúcidiaioi. Afe daií ñue jíllodiaioi.

## 28

### *Pablo monailai cigi idu Máltamo dúcinafue*

<sup>1</sup> Nana ari éniemo ñue jíllobicaidicaimo, afe monailai cigi idu, comini cai llúamona Máltana mámecirenana onódicaí.

<sup>2</sup> Afedu nairai ñue caina llínotiaioi. Aillue irai bonódiaioi noci jáiñua rozírena jira. Aferai bónuana nana caina: “Mai omoi agáizabi” daide.

<sup>3</sup> Afe llezica Pablo záfegai llínota aféramo jóoniaide. Aferai uzire cácanamona titade jaio jino billano Pablo onoi ainide.

<sup>4</sup> Afedu nairai afe jaio ie ónoimo agüínana cióillano, conímamo llotíaioi:

—Nibai baie íima come fáfiredimie. Meiti monáillaimona ñue jillode íadi, Juzíñamui jaícina jóidifue nana comínimo onótaiacanamona íena raamo jíritate ie jílloiñeillena, —daií daidíaioi.

<sup>5</sup> Mei íadi Pablo afe jaio iraimo jaidínota dotade; íena ñie izói nibáiñede.

<sup>6</sup> Nirui íena fáitaite dainano áfemo nana ocuúridiaioi. Jiáifodo nino llezica íena ana dotada títaite daidíaioi. Mei íadi íena ja are úiñodiaioimo ñie izói íena nibáiñede. Ie jira nano comécido íaioi daináuai jiáifodo meídotiaioi. Iemona bie Pablo Juzíñamui izóidimie daidíaioi.

7 Afe áinori afedu illaíma Publio illánuiái ite. Dinomo daruiámani afe Publio caina ñue llíinote. Cai jitaica raana ñue caimo fecade.

8 Aféruillaído afe Publio moo irárede. Bírallumo diga irui bíifirede, ie abí cuaríllari. Iemo jamánomo lluide. Afénomo Pablo íena uáiduaide. Dinomo Juzíñamuimo íena jicade. Daíí ie jica mei Pablo onoi íemo bitade. Iemona afémie jíllobicaide.

9 Afena íaiói fidínamona nana afédumo ite iráredinuiái Páblomo atídíaiói. Iemona nana jíllozítíaiói.

10 Aferi íóbillano aillo ñúefuíái caimo nitádíaiói. Afe mei nane dánomo cai jáiacanaruimo, nana cai jitaica ráaniai caimo atídíaiói.

### *Pablo Rómamo dúcínafue*

11 Afe monaillai cigi ídumo dauíámani itícai. Afe meífodo, jíáie nocaena cíóizaidícai. Afecae nauí bie ídumo uáici zaille dino úíñote. Dinómona afecae jáillado ruica jáidícai. Afecae Alejandría jófuemona bite. Afecae ífomo mena taino juzíñamui uíecona cueda. Afe íaillinoi mámece Castór Pólux. Afecae aféillinoína náamaredena mameide.

12 Dinómona Siracusa ígobemo dúcidícai. Afégobemo daruiámani itícai.

13 Dinómona fueda áinodo Regio ígobemo jáidícai. Afe jíáíruido jairifo mona átue dinena bíllamona Régiomona jáidícai. Ja ménarui íllamona Puteoli ígobemo dúcidícai.

14 Afénomo ite ámatíai cíóizaidícai. Iaiói diga da semana cai íllena jícadíaiói. Afe mei ja Rómamo jáidícai.

15 Jae Rómamo ite ámatíai cai bílláfueña uícodo fidídíaiói. Ie jira io anamo conímamo caimo

dúçillaena úícomo bitíaiói. Conímamo íaiói dúçinano “Foro de Apiona” mameide. Jiáifodo daína, Apio iomo ite fecáriraco. Jiáino mámeçi “Tres Tabernas.” (Afe mámeçi dobáíñuano daína Daámani Dúçirachupi.) Afénuiaimo Pablo éroicaillano Juzíñamuimo “Tere figura” daide. Iemona Pablo começi caimare íficaide.

<sup>16</sup> Ie mei Rómamo dúçidicaimo llaizíraini illaíma Julio ie uiga llavécano rairuídino illáimamo izájide. Mei íadi Pablo oni eneno dama ícomo uiga. Aféno mo daa llaizíraíma íena rairuide.

*Pablo Rómamo Juzíñamui uai jino llote*

<sup>17</sup> Rómamo íaiói dúçinamona daruiámani íllamona Pablo Roma judíuai illaini jíiritade. Iaiói gairilla llezica Pablo íaióina daide:

—Amatíai, judíuaimo fiénidífue lloñédicue. Afe izói cai jaiáidígima fibíllafuena uáitaoíñedicue. Mei íadi Jerusalem romano comínimo lláitano izájigacue.

<sup>18</sup> Dinomo cuemo íaiói jicánua mei, cuena zuitáacadiaíói cue íaiói titállífue íñena jira.

<sup>19</sup> Mei íadi judíuai jiáifodo cuena zuitátañediaíói. Ie jira romano jamánomo ocuídillaíma cuemo jicánorena daídícue. Mei íadi afe llezica cue náiraímo cue jíitállífue íñede.

<sup>20</sup> Mei jira omoi diga cue úrillena jíiritícue. Mei cai bie daje Israel náiraídicaí. Daje cai Mesías billífue mo coméçidicaí; daje izói meine abido cai cáailífue mo úíñooidicaí. Afe cai úíñoigafue ícoiniadi birui benó llavécamié cue llavéinana ja cíódiomoiza.

<sup>21</sup> Jira íena daídíaíói:

—Jaca daabe o finócafuiái lluabe caimo dúciñede. Daje izói afénomona bite ámatiai judíuai o mámeçido fiénidifuiaina nítaibiñediaioi.

22 O comeci fácafuiaimo cacáreacadicaí. Mei náganíaimo afe bie comue Jesumo jaináidinona onódicaíza uáitaoidiaioi, —daí íena daídíaioi.

23 Ie jira meine íaioi cacáillirui mamédiaioi. Afe maméinaruimo aillo nairai Pablo illácomo nane gairízaíbitiaioi. Jítiramona ua nauízaidemo Pablo Juzíñamui illáimana illafue íaioimo llote. Moisés ocuica uáillaído Pablo Jesús dibénemo íaioina ínotaacade. Afe llezica Juzíñamui uai jino llóraini cuela uáillaído Jesumo íaioina ínotade.

24 Dárie Pablo llogáfuemo ínuaidiaioi, ie mei jiáimaci ínoiacañediaioi.

25 Mei íadi nana dáafuemo comécíñenamona raízítiaioi. Como raíacadiaioimo Pablo íaioina daide:

—Ñuera Joreño cai jaiáidigimacimo uai jino lloraima Isaíado ñue úrite. Afémie daide:

26 Baimácimo bifue llujiri, daide:

Omoí uafue aféfuena cácaítomoi íadi áfena ónoñeitomoi.

Omoí uafuena cíoitomoi íadi ñue fídiñeitomoi.

27 Mei bie comini comeci meine fiéni rírenamona bie ñuefuena óiacañediaioi.

Iaioi ífoci jáiaínamona fiéni cacádiaioi.

Iaioi uíjiaí nitáoidiaioi dani íaioi uído áfena íaioi cíoi daíi.

Daje izói íaioi jefodo cácañeillena jefo íbáidiaioi.

Afe izói comécido cacáacañediaioi.

Daje izói meine cuemo bíacañediaioi, íaioi cue jíllotallena, —daí Isaías daide.

28 Bifue omoi onoiri: biruímona bie Juzíñamui lloga jílloillifue judíoñedimacimo lluájiga. Aféfuemo afémaci ñue cacáreitiaoí, —daide.

29 Pablo daií dáinamona, judíuai aillo conímamo úricana jáidiaíoi.

30 Afénomo Pablo ie ibaca jofomo mena fimona fuitade. Nana íemo ráfuiái jicánuaibifiredinona ñue caimare llínofirede.

31 Aféruillaído Pablo Juzíñamui illáimana illafue jino uáfodo comínimo llote. Afefue ie jino lolle rairuide cómena iñede. Daje izói Ocuíraíma Jesucristodo diga irui llófuerite. Aféruillaído ie llófuerilla buna llótaidoñede. Mai. Jae ñie.



**Juziñamui Ñuera Uai**  
**New Testament in Huitoto, Minica**

copyright © 2011 Wycliffe Bible Translators, Inc.

Language: Minica Huitoto (Huitoto, Minica)

Translation by: Wycliffe Bible Translators, Inc.

**Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Huitoto, Minica

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

CXXX

PDF generated using Haiola and XeLaTeX on 18 Apr 2025 from source files  
dated 29 Jan 2022

740f11a2-2e26-57f5-a3a7-5deb2d20bd24